

二十四史九通政典類要合編

皇朝

第 五 冊

欽定四庫全書

皇朝

PDG

二十四史九通政典類要合編皇朝目錄

卷二百九十三 皇朝一

食貨一

田賦

卷二百九十四 皇朝二

食貨一

田賦

卷二百九十五 皇朝三

食貨三

戶口

卷二百九十六 皇朝四

食貨四

錢幣

卷二百九十七 皇朝五

食貨五

征權

卷二百九十八

皇朝六

食貨六

市糶

卷二百九十九

皇朝七

食貨七

漕運

鹽法

卷三百

皇朝八

選舉一

文科

武科

任子

吏道

卷三百一

皇朝九

選舉二

文選

武選

卷三百一

皇朝十

選舉三

考課

卷三百三

皇朝十一

學校

學校

卷三百四

皇朝十二

職官一

官制

卷三百五

皇朝十三

職官一

官品

封階

祿秩

卷三百六

皇朝十四

禮吉一

南郊

雩

朝日夕月

天神地祇

太歲

風師雨師等祠

北郊

社稷

堂子

山川

先農

先蠶

卷三百七

皇朝十五

二十四史九通政典類要合編
皇朝目錄

二 聚雅堂藏板

禮吉一

太廟 時享 祫祭 功臣配享 奉先殿 壽皇殿 恩佑寺 安佑

宮 永佑寺 上陵

卷三百八 皇朝十六

禮吉二

歷代帝王廟 釋奠 闕里祀典

卷三百九 皇朝十七

禮吉四

京師崇祀 直省專祀 諸臣祠 家廟

卷三百十 皇朝十八

禮嘉一

元旦朝賀 冬至朝賀 聖節朝賀 皇太后三大節朝賀 皇后三大節朝賀

常朝 御門聽政 登極 巡幸 經筵 臨雍 附鄉飲酒

卷三百十一 皇朝十九

禮嘉二

上尊號徽號 尊封 冊立皇后 冊封妃嬪 冊立皇太子 冊封諸王貝

勒貝子 冊封公主 冊封福晉夫人 冊封郡主縣主郡君鄉君縣君 皇子

皇孫婚 親王以下婚 公主下嫁 郡主以下出嫁 品官庶士庶人婚

卷三百十二 皇朝二十

禮軍

大閱 大狩 親征 命將出征 凱旋郊勞 受降 獻俘受俘

卷三百十三 皇朝二十一

禮賓

朝貢 附信節館餼 敕封外國 相見儀

卷三百十四 皇朝二十二

禮凶

國恤 山陵 服制

卷三百十五 皇朝二十三

樂

樂制 樂章 樂舞 樂律 樂器

卷三百十六 皇朝二十四

兵

兵制 軍令 教閱 軍器 馬政

卷三百十七 皇朝二十五

刑

刑制 詳讞 赦宥 贖刑

卷三百十八 皇朝二十六

象緯

天象 兩儀 地體 七政宿度 太陽行度 太陰行度 日月實徑與

地徑 日月食 五星 極度偏度 天漢 儀器

卷三百十九 皇朝二十七

輿地

京師 盛京 行省 蒙古 青海 西藏 新疆

卷三百二十 皇朝二十八

四裔

朝鮮

日本

琉球

安南

暹羅

緬甸

廣南

英吉利

呂宋

南掌

荷蘭

法藍西

布魯特

博爾都鳴爾亞

意達里亞

俄

羅斯

哈薩克

二十四史九通政典類要合編卷二百九十三

皇朝一

食貨田賦

國家民田之目直隸有更名田農桑地蒿草籽粒地葦課地歸併衛地河於地 盛京有退園地山東有歸併衛所地更名田竈地江南江蘇有山蕩漫灘地安徽有草地江西有山塘等地浙江有山蕩塘湖桑茶竈地等地陝西有更名地廣東有泥溝車池地廣西有稻田種田狼田貴州有苗田甘肅有熟田蠡地皆為民田均相其肥瘠為科則

田賦有二曰民田曰屯田皆分上中下三則有本徵者有折徵者有本折各半者本徵曰漕漕有正

糧有雜糧

正糧米雜糧豆麥蕎麻等類

折徵者始定以銀繼則銀錢兼納

以上通典

崇德二年令民別地卑濕高阜擇所宜以樹藝 諭曰昨歲春寒耕耘失時以致乏穀今歲春復寒然農率不可違也宜勤耕種而加耘籽焉夫耕耘及時可望有秋若其失之蟲災水害穀何由登其令各屯該管官通行督率任土宜以樹秫稷黍穀毋曠惰又 諭鎮守噶海阿巴泰曰爾當令鎮守各官勸飭農事不可以天寒姑緩種植誠王貝勒大臣勿聽人踐民田禾違 命者鞭責罰贖

順治元年禁天下毋得正賦外再加火耗令各直省文臣齎錢糧冊籍以朝當是時民承故明加派之後望治甚切巡接順天御史柳寅東言解京錢糧頭緒紛雜有一縣正額止三千餘兩而條分四

十餘項有一項錢糧止一兩六七錢而加費至二三十兩宜總計各款彙解以免賠累山東撫臣方大猷亦言錢糧款項宜清并刻由單俾熟地糧米實數定為一編使民易曉而御史寧承勳以賦役之制未頒官民無所遵守請敕所部於賦役全書外給易知由單一應無藝之徵通行裁革悉照

恩詔內或全免免半免三分之一者判定冊書令天下識所遵行又綏明季內官縱恣紳衿優免踰額部臣議將各廠地租照御用監近例歸併有司徵解保定巡撫王文奎請免優免舊習魁小民取

盈攤派之困

以上通考

御史衛周祚請行正定地方清丈編審之法山東總河楊方輿疏請清丈田畝以見在熟地為數其拋荒者無論有主無主盡數豁除俱從之始定開墾荒地之例凡州縣衛所荒地分給流民及官兵屯種有主者令原主開墾官給牛種三年起科二年准新墾荒地免租一年又定原荒之田三年後

起科原熟而拋荒之田一年後供賦

通典

三年特遣大學士馮銓與公英俄爾岱往戶部察核錢糧原額在京責成各管衙門在直省責成撫按彙造賦役全書頒行天下是時天下財賦最重之區莫如江南江西浙江三省而蘇松嘉湖諸府尤最撫臣黃徵請以漕白二糧與歲貢絹布俱官兌官解以紓民累江西南昌瑞州袁州三府荒地浮糧懸欠日久巡按黃贊元請丈出荒地永行豁免其近山易旱近水易潦者上則改為輕則俱從之六年頒易知由單將各州縣衛所額徵起運存留本折分數漕白二糧及京庫本色俱條悉開載

通行直省按戶分給七年定衛所屯田科徵先是衛所屯田分給軍丁因有操練城守捕盜領運之責科徵較民田輕減至是裁汰衛軍凡有運糧衛所仍舊徵收其無運衛所照民田起科通志

八年蘇松巡撫秦世楨疏言八事一田地令業主自丈見田制篇一額定錢糧俱壞易知單設有增減分

給小單以防侵蝕一由單詳開總散數目花戶名姓以便磨對一催科不許濫差衙役設立滾單以次追比一收糧聽里戶自納簿櫃俱加司府印封以防抽換一解放先急後緩勒限掣銷毋許存留胥役之手一民差按田均派與排門冊對驗無使不均一備用銀兩不得預支從之通志

十一年訂正賦役全書四月戶部言賦役全書關一代制度查考舊籍貴詳盡無遺創立新規期間明易曉請敕臣部右侍郎將舊籍全書作速訂正董率各司官照所管直省創造新書仍同戶科詳加磨勘有應增減變通者小則部科酌定大則具疏奏請務求官民易曉永遠可行戶部又言入丁地土乃財賦本根故明舊例或三年或五年一行編審繕造黃冊呈進我朝定鼎以來尙未舉行宜自順治十二年爲始責布政使彙造以便查稽隙地漏糧之弊俱從之十三年諭戶部右侍郎

王宏祚將各直省每年額定徵收起存總冊實數編撰成帙詳稽往牘酌量時宜凡時參差遺漏悉行駁正錢糧則例俱照萬厯間其天啟崇禎時加增盡行豁免至若漕白雜項或已改折或解本色或有昔未詳而今宜增昔太冗而今宜裁者俱細加清核條貫井然綱舉目張勒成一編頒示天下庶使小民遵茲定式便於輸將官吏奉此章程罔敢苛斂爲一代良法垂萬世成規時賦役全書外

又輔以會計赤厯丈量諸冊賦役全書者先開地丁原額繼開荒亡次開實徵又次開起運存留起運分別部寺倉口存留詳列款項細數繼有開墾地畝招徠人丁續入冊尾每州縣各發二部一存有司查考一存學宮令士民檢閱丈量冊以田爲主諸原隲墳衍下濕沃瘠沙鹵之形舉具而黃冊則準於戶口詳其舊管新收開除實在之數條爲四柱與賦役全書相表裏赤厯每年頒發二扇開列戶口錢糧數目一備臚貢一令百姓自登納數令布政使歲終磨對會計冊則備載州縣正項本折錢糧凡起解到部逐項駐明年月日期解戶姓名以杜侵欺併稽完欠其徵收則行一條鞭法給以易知由單一條鞭者以府州縣一歲中夏稅秋糧存留起運之額通爲一條總徵而均支之至運輸給募皆官爲支撥而民不與由單之式則每州縣開列上中下地正雜本折錢糧末編總數刊成定式每年開徵一月前給散花戶使民通曉而又佐以截票申票印簿循環簿及糧冊奏銷冊截票之法開列實徵地丁錢糧數目分爲十限每月限完一分截票其票用印鈐蓋就印字中分而爲兩一給納戶爲憑一留庫櫃存驗卽所謂申票也印簿由布政司頒發令州縣納戶親填入簿季冬繳司報部糧冊則以各區納戶花名細數繕造成冊務與一甲總額相符易於摘比循環簿者照賦役全書款項急者居先緩者居後按月循環徵收奏銷冊者以各直省錢糧支解完欠按年分款彙造清冊歲終送府由府送司由司送部據以銷算考核時直省奏報錢糧又有所謂無序冊者其所載條件卽奏銷冊數目也順治初議定每歲造送康熙四年以其糜費無益令永行停止

通考

十八年御史何可化疏言蘆課六弊一坍塌賠累宜蠲一徵收解費宜革一豪強隱佔宜清一書吏飛灑宜禁一佃蠹侵欠宜究一蠲免條例宜溥工科給事中王曰高疏言蘆政四條一嚴催征以懲積欠一清踏勘以核實數一按地形以清課額一酌久任以專責成均從之 按蘆地惟江蘇安徽江西湖北湖南五省有之其地有草麥籽粒蕩灘熟田低田泥灘水光灘水影荒白塗水窪基草荻草市地蘆墩埂划塘水套湖墟白沙草場地等名又有密蘆稀蘆上地中地下地上草地中草地下草地中蘆田下蘆田胡荻之別均按畝分別徵收

通典

康熙元年以山東民地錯雜竈地有在本省者有在直隸南皮鹽山縣者令巡鹽御史及地方官清丈各正疆界 特諭直省有隱匿地畝不納錢糧及反圖冒功報為新墾者州縣衛所官及該管上司分別處分是時海內初平人民未盡復業雖順治十五年開墾之例通行直省地廣人稀汙萊多有未闢者乃申地方官開墾勸懲之例其議敘例略如前而又戒凡州縣衛所荒地一年內全無開墾者督撫題參其已墾而復荒者削去開墾所加紀錄如前任官墾過熟地後任官復荒者照例議處以康熙二年為始寬限五年如六年之後察出荒地尙多將督撫以下分別議處其同知通判不與知府同城自勸民開墾者照前州縣例議敘其後又准貢監生員民人墾地自二十頃至百頃以上者試其文藝通否酌量以知縣縣丞百總武職等官用復採川湖督臣蔡毓榮言蜀省可墾之地敕現任文武官員招徠流民三百名以上安插得所墾荒成熟者不論俸滿卽陞其各省候選佐雜

及舉貢監生有力招民者授以署縣職銜俟起科時實授本縣知縣其開墾之限始定五年旋卽有停止限年之令又有取具里老無包賠甘結始准議敘之令所以杜捏報灘派之弊也其起科之例

國初定制准以三年

聖祖軫念黎元尤爲備至十年准予三年後再寬一年十一年令寬至一

六年之後十二年復寬至十年及至十八年始復六年起科之例

通志

二年工科給事中吳國龍疏言直省解京各項錢糧

國初原總歸戶部自順治七年令各部寺分

管催收以致款項繁多易滋姦弊請以一應雜項俱稱地丁錢糧作十分考成除扣撥兵餉外其餘

通解戶部各造簡明賦役冊其易知由單頒給民間者盡除別項名色各部寺應用錢糧卽向戶部

支給從之四年革隔年預征之例凡錢糧均以夏秋分征申加添火耗之禁 五年諭民間多闢尺

寸之土卽多收升斗之儲乃往往任其閒曠不肯致力者或因報墾則必陞科或因承糧易致爭訟

以致愚民退縮不前嗣後凡邊省內地零星地土可以墾墾者悉聽本處民夷墾種並嚴禁豪強首

告爭奪其在何等以上仍照例陞科何等以下永免陞科之處各省督撫悉心定議續議准直隸零

星地土在二畝以下者山東山頭土角以及河濱溪畔在中則以上不足一畝及下則以下不足二

畝者山西瘠薄下地不及邱段在十畝以下者河南上地不足一畝中地不足五畝高岡砂磧下隴

低窪之地江蘇山頭土角溝畔田塍奇零隙地安徽水田不及一畝旱地不成二畝者江西山頭土

角不及二畝砂石間雜坳漲不一者福建奇零田地不及一畝或雖及一畝而地角山頭不相毗連

者浙江臨溪傍崖零星不成邱段者湖北旱地不足二畝水田不足一畝者湖南奇零土地高灘阪
隔種植稱禾不及一畝雜糧不及二畝並峯頭湖澤之隙不成邱段者陝西甘肅其山頭地角砂磧
之地聽民試種至平原空地開墾未及起科之年地或鹹鹵者四川上田中田不足五分下田上
地中地不足一畝山頭土角間石雜砂者廣東山梁岡陀砂磧夾雜者廣西平原成片段之地上則
中則水田不足一畝旱地不足三畝下則水田不及五畝旱田不足十畝者雲南砂石磧确水耕火
耨更易無定及不能引溉或低窪不能定其收成者貴州依山傍嶺工多獲少土淺力薄者均免陞
科其餘減則分別年限起科通典

六年諭各省由單款項繁多小民難以通曉令嗣後務將上中下等則地每畝應徵銀米實數開明
至湖廣陝西二省每糧一石派徵本折數目向未開載行令照例開注其由單報部之期有遠限八
月者州縣衙所及轉報官均行議處戶科給事中姚文然言蠲免災荒除本年應蠲錢糧卽於本年
扣免外亦有本年納戶之錢糧收完在前奉蠲在後則以本年應蠲錢糧抵次年應納正賦名曰流
抵欲使人人均沾實惠必須將流抵一項載入由單但部題定例次年由單於上年十一月頒發計
該州縣磨算錢糧數目款項造成式樣送布使司磨對必須在上年九十月間而各撫題報災傷夏
災報在六月秋災報在九月計題報到部又需月日部中具覆行查被災分數必候該撫查回部覆
奏允然後行咨該撫又轉行各地方官雖至速已至本年十一月十二月及次年正月二月久已在

頒發由單之後矣何從填入乎然流抵不填由單部中所取者地方官印結耳印結出於官吏之手民未盡知也姦胥貪官因此侵冒者不少惟有於流抵之下年填入由單之一法譬如康熙五年免災錢糧應流抵康熙六年者自應於康熙六年抵免訖即於康熙七年由單之首填入一項內開某府某縣於康熙五年分蒙恩蠲免重災田若干畝每畝免錢糧若干或次災田輕災田合縣共該免銀若干兩除本年已完若干兩外尚該流抵銀若干兩俱於康熙六年分內於原被災本戶名下額賦各照分數流抵訖並無官吏侵欺等情此後列入康熙七年分額丁額賦等項如此則應蠲之分數與抵免之銀數每戶各報一單一目了然官吏自無所藉手矣至於蠲免者亦於蠲免之下年由單之首照依此式但改流抵字樣為蠲而已疏上敕部議行

通考

八年戶部請准遣員赴直隸將前明廢藩田產分荒熟酌量變價 上以地既易價復征額賦重為

民累 諭令撤回將未變價地畝給與原種之人改為民戶號為更名地承為世業十年停遣湖廣

江南江西收蘆課官歸并地方官管理

通典

二十八年行三聯印票法州縣催徵錢糧向用二聯印票不肖有司與姦胥通同作弊借名磨對稽察將花戶所納之票強留不給遂有已完作未完多徵作少徵者今行三聯票之法一存州縣一付差役應比一付花戶執照嗣後徵收錢糧豆米等項均給三聯印票照數填寫如州縣勒令不許填寫及無票付執者許小民告發以監守自盜論

通考

三十二年令浙江湖北山東丁絕戶存丁銀勻派地畝內帶征通典

三十九年設立徵糧滾單凡徵糧立滾單每里之中或五戶或十戶止用一單於納戶名下注明田

畝若干該銀米若干春應完若干秋應完若干分作十限每限應完銀若干給與甲內首名挨次滾

催令民遵照部例自封枝櫃不許里長銀匠櫃役稱收一限若完二限又依此滾催如有一戶沈單

不完不繳察出究處 謹按是時徵糧之弊上下科派名色不一有合邑通里其攤同出者名曰輓

攤有各里各甲輪流獨當者名曰硬賦豪民姦胥包攬分肥大為民累及滾單之法行簡易明白吏

胥不得侵漁天下便之通考

五十二年特諭廷臣曰民之生繁日繁朕故欲知人丁之實數不在加徵錢糧也嗣後止將見在錢

糧冊內有名丁數垂為定額其滋生人丁但核所增實數另造清冊永不加賦尋以廷臣議定自康

熙五十年額定人丁外新增者補足舊額缺數其餘謂之盛世滋生冊永不加賦通志

雍正二年定直隸地丁銀賦攤征例每地賦銀一兩攤入丁銀二錢七釐 謹按丁隨地轉之例廣

東四川已先行之惟奉天府民人入籍增減無數仍舊分徵至是年通行各省令行攤徵凡各州縣

按丁多寡地畝廣狹分為差等每畝賦銀一兩攤丁不過二錢使無業貧民永免催科有業民戶亦

有定額不至多寡懸殊

論民間輸納錢糧用自封枝櫃法亦屬便民之道但偶有短少之處令其增補每致多索其數浮於

所少之外理應將原銀發還仍於原封內照數補足交納庶可免多索之弊此雖細事督撫大吏亦不可不留心體察嚴飭有司以除民累三年更刊四聯截票一送府一存串根截票一名串票一給花戶一

於完糧櫃旁別設一櫃令花戶完銀時自投櫃中每夜州縣官取出對流水簿勾銷欠冊又定零星

錢糧納錢之例凡一錢以下小戶每銀一分準交制錢十文其大戶尾欠一錢以下者亦如之又定

附納之例凡小戶錢糧數在一兩以下者附大戶投櫃於截票載明以上通典

三年管理戶部事務怡親王允祥奏請酌減蘇松浮糧 上曰蘇松之浮糧當日部臣從未陳奏常

屢 皇考聖懷屢殫 諭旨本欲施恩裁減乃彼時大臣以舊額相沿已久國課所關甚重數以不

應裁減固執覆奏凡國家大事因革損益必君臣計議畫一始可舉行若 皇考遠東獨斷既非詢

謀僉同之義且恐一時減免倘後來國用不足又開議論之端是以從眾議而中止然 聖慈軫念

蘇松誕敷渥澤屢蠲舊欠以紓民力其數較他處為多是亦與減正額無異也今怡親王等悉心籌

畫斟酌奏請甚為可嘉朕仰體 皇考愛民寬賦之盛心准將蘇州府正額銀蠲免二十萬兩松江

府正額銀蠲免十五萬兩著為定例是年又蠲免江西南昌府額徵銀七萬五千五百五十兩 五

年 諭各省之中賦稅最多者莫如江南之蘇松二府浙江之嘉湖二府每府多至數十萬地方百

姓未免艱於輸將查蘇松嘉湖賦稅加重之由蓋始於明初洪武時四府之人為張士誠固守故平

定之後籍諸富民之田以為官田按私租為稅額夫負固之罪在士誠一人而乃歸咎於百姓加其

賦稅此洪武之苛政也明朝二百餘年減復不一我朝定鼎以來亦照明例徵收蓋因陸續辦理軍需經費所在未使遽行裁減也我皇考聖祖仁皇帝常論及此雍正三年朕仰體皇考多年寬賦之聖心將蘇松二府額徵浮糧豁免彼時頒發諭旨甚明本欲一體加恩於嘉湖因浙江風俗澆漓正須化導不便啟其望思倖澤之心故爾暫止今見浙俗漸次轉移將來可望改行遷善朕心深慰特沛恩膏嘉興府額徵銀四十七萬二千九百餘兩著減十分之一計免銀四萬七千二百九十兩零湖州府額徵銀三十九萬九千九百餘兩著減十分之一計免銀三萬九千九百九十兩零二府共免銀八萬七千二百兩零永著爲例著該督撫董率有司敬謹奉行以副朕鑄賦恤民之意謹按蘇松嘉湖之賦較之他省獨重者由於明初籍諸富民田以爲官田按私租之數爲官糧之額遂有畝收一石以上者宣德以後屢減官田之額而官田與民田輕重終自懸殊佃官田者不勝其累至嘉靖之世乃行權宜之法併官民田爲一則以官田之重稅攤入民田於是官佃之困少蘇而賦額之浮於他省者終不能議蠲也我聖祖加惠東南舊逋新欠屢詔蠲免世宗仰承先志次第蠲免四府浮糧減歲額五十餘萬兩除有明二百餘年相沿之稅政三吳黎庶戴德懷仁永承無極大易有言損上益下其道大光豈不盛哉

通志

七年諭直省有寄莊寄糧之弊悉令改正先是直隸地方有寄莊寄糧之名往往地寄此處糧寄他處但宣化府之懷安一縣有人地俱在懷安而寄糧於宣化萬全者更有在懷安納糧而寄地於順

天府之寶抵豐順三河相隔五百餘里者至是令直隸總督詳察並他省或有類此者俱令該督撫議更正改隸之法後經戶部議覆直隸山東山西河南江蘇安徽江西福建浙江湖南陝西四川廣東廣西等省寄莊寄糧民屯田地應征銀米等項自丙辰年為始悉更正就近徵糧按額報解以上通考

十一年令錢糧一錢以下准納制錢其錢以十文折銀一分凡大戶零星尾欠及折封短少在一錢以下者概准以錢折銀後又令小戶距城路遠錢糧在一兩以下者准附大戶投糧如數在一兩外及數少而願自交者仍遵例自封投糧通志

十三年皇上御極之初 諭向來徵收錢糧因銀色有傾銷之耗折解送有路途之盤費故於正項外徵收耗羨原無定額廉潔者尙知自愛不肖者任意徵求經諾敏等倡為提解歸公之法各該督撫就本省情形酌定分數外絲毫不許濫徵蓋以耗羨原屬額外之項與其聽地方官私行徵取不如明定分數使有節制不敢違越也然在未提解以前尙有私項既提解以後或恐不肖官員視同正課又得以耗羨之外巧取殃民從前 皇考洞見流弊屢降諭旨欲俟將來虧空全清府庫充裕之日漸減漸革 聖心屢念未或忘之朕紹承大統切念民依孜孜軫恤日與王大臣等悉心籌畫期使我民於正項之外絲毫無擾而一時勢有未能尙須從容計議惟是提解耗羨之法行之已十有餘年恐日久弊生姦吏夤緣削耗外加耗重困閭閻不可不為深慮各該督撫其咸體朕意知耗羨一項可減而決不可增可於格外從寬而斷不可於額外多索再各省耗羨分數率在加一上

下然江南賦重之區如蘇松常鎮四府額賦較之他省幾及數倍雍正六年以前每兩加耗僅止五分雍正六年以後增至加一且有司又復巧取民何以堪令量減分數徵收不得仍前重耗通典

乾隆二年諭外省荒闕賦銀向例在於知府等官以下俸工內扣除抵補朕念佐雜微員力量單薄不應在扣除之內已於乾隆元年降旨諭令在督撫司道大員及知縣正印官俸工內均攤抵闕今思官有崇卑役無大小微員俸工既經免其攤扣其各衙門人役工食藉以養贍其家若因荒闕扣除則餬口無資情有可憫此項共計十二萬餘著准地丁項下全支免其扣荒通典

二十三年令州縣錢糧隨徵隨解不得久貯庫內戶科給事中黃登賢言州縣錢糧應隨徵隨解勿令久貯庫內致有那移之弊并令布政司於奏銷冊內將各屬批解月日逐一詳細開載以便稽核下部議行刪除地丁錢糧奏銷項下折徵顏料等款目戶部議准戶科給事中黃登賢條奏各省採辦顏料原就土產所宜若已經停辦折徵價銀奏銷冊內復臚列各項名色實屬繁冗應將各省奏銷冊造折徵顏料款目概行刪除以歸簡易至河南省之宗祿唐府瑞府匠班陝西省之秦府王駙馬勳田直隸省之膳人膳軍常兌操賞等名色皆係明季流傳凡有似此開載者應行令各督撫一體刪除統歸地丁條造報通考

二十七年總督楊應琚經理屯政事宜酌定回民納賦則例凡回民自種地畝視歲收納十分之一承種官地平分入官其間有祇納田賦者亦有帶徵地租者有徵本色者亦有折徵普兒騰格者有

以官石徵收者亦有就該地帕特瑪折算者

回部一帕特瑪合官斗五石三斗

厥後屯田益闢土益膏沃而賦糧科

則如其舊

通志

二十一年諭銀庫所奏月摺內地丁款下開寫綠毫忽微等細數緣各省徵收之時必須先有數數方可合併計算彙成總數是以照例開寫但此等名目既已極其纖悉而秤兌時並不能將此綠毫忽微之數分晰彈收徒屬有名無實於政體亦多未協嗣後各省徵收錢糧及一切奏銷支放等事俱著以釐爲斷不必仍前開寫細數定四川石硯廳墾荒地科則四川夔州府屬石硯廳地方東西寬五百里南北長三百三十里自改置流民以來田地徵糧仍循土司舊習總督阿爾泰奏請報墾田地上田中田丈量在五分以上下田上地中地在一畝以上者比照附近之鄭都縣科則下部

議行

通考以上民田

議案 國朝初制蘆田收課設有專官不入田賦是以大清會典事例雜賦條目列有蘆課而田賦無之通考繫蘆課於征權蓋循用會典之例而事從其朔也恭稽通典賦稅目中 康熙十年停遣收蘆課官歸併地方官管理嗣是蘆課改歸田賦與初制固不同矣竊意既經改制自不必墨守舊章通典閱權有雜課稅而不以蘆課入之者毋亦以立法定憲與時變通有未可膠柱而鼓者歟茲纂敬遵通典例隸蘆課於田賦以昭定制復於征權門省通考蘆課條例以歸簡約凡各門有類此者均從此例不復贅云

國家建邦設都務崇根本是以 盛京畿輔設有官莊一時從龍翼運軍策羣力莫不授以土田俾聚室家長子孫王以下官員兵丁以上迄各省駐防俱有規制至於口外田地漸次墾闢得膏腴數百萬頃由是八旗人民內有莊屯可以資生外有草地可以墾種又爲之正其經界使旗民各安其業咸得其所百數十年來分撥相度之宜調劑經久之法無不裁成盡善

凡內務府所領官莊地曰糧莊曰豆稽莊曰半分莊曰稻莊曰菜園曰瓜園曰果園又有蜜戶葦戶棉鹼戶豆稽莊設壯丁五名後增爲七名選一人爲莊頭給田六十五畝場園二畝牛四頭其納糧照糧莊之數減半康熙四十五年每莊給地一百五十畝五十年定納糧六十石雍正二年以廩餉飼馬不用豆稽將豆稽莊頭三十名暫編爲半分莊頭半分莊設壯丁七名選二人爲莊頭給牛四頭照豆稽莊納糧又每莊交黑豆二十五石二斗草千束秫稽百四十束康熙四十七年每莊給地百五十畝五十年定納糧六十石稻莊在房山玉田涿州及玉泉山稻田廠各處按水旱田分別徵糧菜園設壯丁五名選一人爲園頭給種菜田十九畝口糧田各五畝牛二頭康熙五十一年又立豐臺菜園園頭各給田四項內畦地一牛四頭五十四年每園增壯丁五名六十年園頭各給旱地九頃瓜園設壯丁五名選一人爲園頭給種瓜田三十畝口糧田各五畝牛四頭康熙五十四年每園增壯丁五名六十年園頭各給旱地九頃果園設園頭一名園內舊丁各給口糧地每年徵銀三兩新丁按地每畝徵銀三分草二束折徵銀二分康熙三十九年定每園納糧壯丁不得過六丁餘

丁免其徵銀凡窰戶接丁給地徵銀每地一晌徵收窰五觔每觔折算銀七分康熙四十九年以烏拉捕牲窰丁所進窰已足用嗣後窰戶俱按地徵銀每畝徵銀五分凡窰戶接丁給地每畝徵銀一分至五分八分不等所進葦每觔折算銀三釐五毫每年額徵葦四萬三千七百五十二觔其餘撥畝徵銀凡投充棉離戶每丁給地五十六畝徵棉花五十觔水靛百觔交廣儲司 謹按國初設立官莊或在奉天或在畿輔領之內務府會計司此外尚有部寺官莊分隸於禮部光祿寺各衙門自行徵收支放以給公用皆不屬戶部

八旗莊田數 鑲黃旗宗室整莊四所半莊一所園一所共地三十六頃六十畝坐落大興通州武清平谷河間各州縣 正黃旗宗室整莊五所半莊十二所莊四所園三所共地百有六頃五十六

畝坐落大興宛平三河寶坻順義涿州房山保定雄縣易州任邱各州縣 正白旗宗室整莊四所

半莊一所園二所共地三十六頃坐落順天香河通州寶坻房山及沙河所等處 正紅旗宗室整

莊一百四十五所半莊三所整園五十所半園十一所共地一千二百四十四頃十六畝坐落順天

宛平昌平涿州文安保定定興涑水及遼陽海城蓋平各州縣 鑲白旗宗室整莊一百七十六所

半莊五所莊八所整園八所園二十所果地鹼地網戶獵戶等地七十六處共地千七百一十七頃

十有四畝有奇坐落大興宛平良鄉固安永清東安香河通州三河武清寶坻昌平密雲懷柔房山

霸州薊州玉田平谷遵化豐潤遷安灤州樂亭保定易州河間任邱滄州保安及遼陽海城蓋平鐵

嶺山海關外等處 鑲紅旗宗室整莊二百九十八所半莊二十三所莊五所整園一百十一所半
園二所共地二千六百三十頃一畝坐落大興宛平永清香河通州寶坻昌平涿州房山霸州灤州
新城河間肅寧滄州延慶及張家口外等處 正藍旗宗室整莊五百四十四所半莊一百五十一
所莊二十二所整園一百三所半園十九所園七十三所果業牧地五處共地五千三百十有三頃
二十四畝有奇坐落大興宛平良鄉永清東安香河通州武清昌平順義懷柔涿州房山霸州保定
薊州玉田平谷遵化豐潤永平昌黎灤州樂亭新城易州青縣無極保安及承德遼陽開原錦州寧
遠廣寧開平冷口外等處 鑲藍旗宗室整莊二百三十一所半莊六十三所莊九所整園一百二
所半園二所園三所共地二千二百五十四頃七十畝坐落大興宛平固安永清東安昌平懷柔灤
州蠡縣安州高陽及遼陽海城蓋平錦州開平等處 右據會典八旗土田志載各旗王公宗室分
撥莊田總數 計一千一百二十九所十頃三畝餘計年八百八十頃餘六分餘釐餘毫餘絲計年二百
鑲黃旗滿洲初次給地萬一千六百三十一頃六十畝二次給地二千五百三十八頃九十畝三次
給地千三百十有三頃十畝蒙古初次給地千七百九十四頃三十畝二次給地千七百頃有十畝
三次給地四百十三頃七十畝漢軍初次給地二千頃四十畝二次給地一千一百八十八頃二十
畝三次給地一千五十三頃共壯丁地二萬三千六百三十三頃四十畝坐落通源昌平霸州遵化
灤安易等州大興宛平良鄉固安永清東安香河三河武清寶坻順義密雲懷柔房山文安大城保

定玉田平谷豐潤盧龍遷安昌黎樂亭清苑滿城安肅定興新城唐容城完縣雄高陽新安涑水河
間肅寧任邱文河青南皮獲鹿赤城宣化各縣永甯衛良牧署采育里關平沙河驛古北口冷口張
家口喜峯口羅文峪獨石口石匣等處 正黃旗滿洲初次給地四千四百六頃四十畝二次給地
九千一百七十四頃九十畝三次給地千八百七十三頃八十畝蒙古初次給地七百五十六頃九
十畝二次給地千一百二十七頃十畝三次給地千八百八十四頃六十畝漢軍初次給地千二百
七十四頃二十五畝二次給地千八百七十八頃七十八畝三次給地千一百六十七頃十有五畝
共壯丁地二萬三千五百四十三頃八十五畝坐落通涿昌平霸蘄遵化灤安易滄等州大興宛平
良鄉固安永清東安香河三河武清寶坻順義密雲懷柔房山文安保定玉田豐潤平谷盧龍遷安
樂亭清苑滿城安肅定興新城唐望都容城蠡雄高陽新安涑水河間肅寧任邱交河青南皮獲鹿
開平赤城宣化各縣古北口冷口張家口獨石口石匣等處 正白旗滿洲初次給地五千七百二
十七頃三十畝二次給地三千三百二十六頃七十畝三次給地四千三百三十四頃十畝蒙古初
次給地千二百九十三頃七十五畝二次給地千二百四十七頃五十五畝三次給地千九十四頃
五十八畝漢軍初次給地八百六十七頃六十畝二次給地千四百六十五頃二十畝三次給地千
四百三十九頃七十畝共壯丁地二萬七百九十六頃四十八畝坐落通涿昌平霸蘄遵化灤安易
滄等州大興宛平良鄉固安永清東安香河三河武清寶坻順義密雲懷柔房山文安保定玉田平

谷登潤盧龍遷安撫寧昌黎樂亭安肅定興新城容城完雄高陽涑水河間肅寧任邱交河青南皮
宣化各縣羅文峪張家口獨石口古北口等處 正紅旗滿洲初次給地二千一百二十九頃八十
八畝二次給地五千三百十頃八十四畝零三次給地二千一百二十頃七十畝蒙古初次給地三
十五頃六十八畝零二次給地七百六十五頃六十畝三次給地五百五十五頃三十畝漢軍初次
給地二百七十八頃十畝二次給地六百四十頃八十畝三次給地三百七十頃二十畝共壯丁地
萬二千二百七頃十畝坐落通霸昌平灤等州宛平良鄉固安永清東安武清寶坻順義密雲房山
文安保定樂亭清苑安肅定興蠡雄任邱各縣及河西務等處 鑲白旗滿洲初次給地六千二百
六十八頃五十畝二次給地二千六百七十四頃二十畝三次給地二千二百九十頃二十畝蒙古
初次給地千一十四頃三十畝二次給地千八百六十一頃九十畝三次給地九百五十六頃十畝
漢軍初次給地六百有九頃二次給地三百有三頃三十畝三次給地四百六十六頃八十畝共壯
丁地萬六千四百四十四頃三十畝坐落通涿昌平霸薊遵化灤易滹延慶等州大興宛平良鄉固
安永清東安香河三河武清寶坻順義密雲懷柔房山文安大城保定玉田平谷豐潤盧龍遷安樂
亭滿城安肅定興新城容城等縣良牧署開平沙河驛張家口喜峯口冷口羅文峪等處 鑲紅旗
滿洲初次給地千一百頃七十畝二次給地五千七百八十七頃十有五畝三次給地二千六百十
有二頃二十五畝蒙古初次給地三十五頃四十畝二次給地三百四十五頃五畝三次給地六百

四十三頃二十畝漢軍初次給地三百七頃八十畝二次給地六百三十頃三次給地五百九十三頃七十畝共壯丁地萬三千五十三頃七十畝坐落通涿昌平霸滄延慶等州宛平良鄉固安永清東安香河三河武清寶坻順義房山大城保定豐潤盧龍遷安樂亭清苑安肅定興新城唐望都完蠡雄涑水河間肅寧任邱天津各縣及河西務等處 正藍旗滿洲初次給地六千一百九十八頃七十五畝二次給地三千九百九十二頃七十畝三次給地二千二百七十九頃四十畝蒙古初次給地千二百三頃二次給地七百二十三頃九十畝三次給地七百一十一頃六十畝漢軍初次給地八百八十三頃九十五畝二次給地七百三十二頃九十畝三次給地四百十頃四十畝共壯丁地萬七千三百三十六頃六十畝坐落通涿昌平霸薊遵化灤易延慶等州大興宛平良鄉固安永清東安三河香河武清寶坻順義密雲懷柔房山保定玉田平谷豐潤遷安昌黎清苑滿城安肅定興唐容城雄高陽新安任邱青南皮各縣良牧署等處 鑲藍旗滿洲初次給地六千五百二頃八十畝二次給地二千三百四十頃九十畝三次給地四百六十頃四十畝蒙古初次給地千五百四十八頃三十畝二次給地二百四十頃七十八畝三次給地三百二十二頃二十畝漢軍初次給地七百五十八頃七十畝二次給地四百八十三頃六十畝三次給地四百五十三頃六十畝共壯丁地萬四千一百一頃二十八畝坐落大興宛平永清東安香河三河武清密雲房山盧龍樂亭定興蠡高陽涑水河間任邱獲鹿各縣河西務獨石口張家口等處 右據會典八旗土田志各旗官兵分

撥莊田總數以上通考

國初以近京各州縣無主荒田及前明皇親駙馬貴戚大臣內監歿於寇亂無主荒田並百姓帶地投充之田設立莊屯自王以下及官員兵丁皆授以土田俾世爲恆產嗣後生齒日繁凡盛京古北口外新闢之壤咸隸焉其官莊有三一宗室莊田一八旗官兵莊田一駐防官兵莊田凡牧場地專隸內務府會計司掌其牧納之數

盛京土田撥給八旗官兵地畝 內務府三旗包衣佐領下壯丁地鑲黃旗共地百六十四頃八十四畝四分正黃旗共地九十九頃一畝四分正白旗共地二百五頃六十二畝一分均在 盛京

興京開原遼陽界內 內務府三旗包衣佐領下園丁地共千三百三十四頃八十畝在 盛京開原遼陽界內 盛京禮部六品官所屬各項壯丁地共五百頃九十九畝三分在 盛京 興京遼

陽鐵嶺秀巖界內 盛京工部五品官所屬壯丁地五百六十一頃九十六畝六品官所屬壯丁地百八十九頃四畝九分均在 盛京 興京遼陽開原牛莊秀巖界內 製造庫匠役人等地共二

十二頃三十二畝在 盛京界內 盛京戶部倉官莊頭樓軍倉軍地共四百一十一頃九畝四分領催莊頭地共二千八百十三頃一畝六分 盛京禮部莊頭壯丁地共四十七頃五畝六分 盛京

兵部站丁地共六十二頃七十四畝八分 盛京工部莊頭壯丁地共七十六頃五十六畝三分 興京界內八旗所屬諸王貝勒貝子公大臣等地千二百二頃三十六畝官員兵丁閒散人等地共

五百八十頃八十六畝五分 撫順界內右翼四旗所屬王貝勒貝子公大臣等地二千二百九十八
頃九十九畝七分官員兵丁閒散人等地七十五頃二十畝六分鱈場汪清二門官兵臺丁地三百
二十八頃三十畝 開原界內八旗莊屯地二千八百頃七十九畝 遼陽城界內八旗官員兵丁
地八百八十八頃五十五畝 鐵嶺界內左翼四旗莊屯地八千六百五十七頃四十四畝二分
法庫邊門莊屯地六百七十八頃五十八畝 威遠堡邊門莊屯地二百二十八頃八十七畝 英
額邊門莊屯地百二十六頃七十二畝二分 鳳凰城八旗巴爾呼地千九百四十八頃六十四畝
又正黃旗屯地六十頃九畝 雙河邊門分種地二十四頃七十四畝四臺四屯地六十一頃五十
九畝 復州界內八旗分糧地千七百二十九頃四十畝 熊岳城界內八旗滿洲蒙古巴爾呼漢
軍莊屯地二千八百八十三頃三十九畝 金州界內八旗滿洲蒙古漢軍官員兵丁地三千三百
四十一頃四畝水師營地二十六頃十八畝 山海關官員兵丁寡婦閒散人等地百三頃五十七
畝七分在 山海衛寧遠州界內又正白正紅鑲紅旗下閒散人等地三頃六十七畝 秀巖界內八
旗官員兵丁地二千百二十一頃二畝七分 蓋州界內各旗官員兵丁地四十六頃三十八畝
牛莊界內八旗官員兵丁地二千九百二十三頃 廣寧城所屬巨流河白旗堡小黑山闡陽驛彰
武臺邊門等界內八旗官員兵丁閒散人等地萬五千九百九十四頃九十六畝二分 錦州界內王
貝勒貝子公宗室額駙官員莊頭閒散人等地二千七百七十七頃七畝八分八旗兵丁閒散人等地

千五十四頃五十畝四分 義州界內八旗莊屯地五千四百七十一頃二十五畝 清河邊門莊屯地五百三十四頃二十三畝 九關臺邊門莊屯地二百三十二頃十八畝 吉林烏拉界內官

員兵丁開墾地鑲黃旗三百七十四頃五十二畝正黃旗二百九十五頃二十六畝正白旗二百六

十六頃十畝正紅旗二百五十二頃七十八畝鑲白旗二百八十八頃四十八畝鑲紅旗二百二十

一頃七十六畝正藍旗二百六十一頃二十四畝鑲藍旗二百六十七頃二十四畝水師營二百六

十五頃五十六畝又各莊頭開墾地二百五十二頃六畝 賓古塔界內官員兵丁開墾地鑲紅旗

三百四十七頃四畝正黃旗二百三頃七十畝正白旗三百三十五頃十畝正紅旗四百二十頃鑲

白旗四百七十頃五十四畝鑲紅旗三百二十六頃七十畝正藍旗二百八十頃十四畝鑲藍旗二

百十九頃六十六畝又各莊頭開墾地三百三十三頃四十二畝 琿春界內官員兵丁開墾地鑲

黃旗百十七頃十八畝正黃旗九十九頃五十四畝正白旗三百十六頃九十二畝 三姓地方官

員兵丁開墾地鑲黃旗百八十一頃五十畝正白旗五十九頃四十六畝正紅旗四百十九頃六十

四畝 伯都訥界內官員兵丁開墾地鑲黃旗百十六頃五十八畝正黃旗七十三頃六十八畝正

白旗二百三十五頃四十四畝正紅旗百二十五頃五十二畝鑲白旗八十頃二十二畝鑲紅旗七

十一頃二十二畝正藍旗二百十五頃四畝鑲藍旗百九十四頃十畝又各莊頭開墾地三十二頃

三十畝 阿勒楚喀界內官員兵丁開墾地鑲黃旗百十五頃八畝正黃旗百二十頃三十畝正白

旗五十九頃十畝

順治元年前戶部清釐近京各州縣無主荒田及前明貴戚內監莊田如本主及有子弟尙存者量口給與其餘盡分給東來諸王勳臣兵丁并令各府州縣鄉村滿漢分居各理疆界以杜異日爭端順天巡按柳寅東上言安置莊頭其無主地與有主地犬牙相錯易起爭端請先將州縣大小定用地數多寡使滿洲自住一方然後以察出無主地與有主地互易庶疆理明晰從之設指圈之令時近畿百姓帶地來投者甚多乃設爲納銀莊頭願領入官地畝者亦爲納銀莊頭各給編地每四十二畝爲一繩其納蜜羣棉靛等物附焉分隸內務府鑲黃正黃正白三旗奉天山海關古北口喜峯口亦令設立又令諸王貝勒貝子公等於錦州各設莊一所蓋州各設莊一所其額外各莊均令退出二年定給諸王貝勒貝子公等大莊每所地四百二十畝至七百二十畝不等半莊每所地二百四十畝至三百六十畝不等園每所地六十畝至百二十畝不等給內務府總管園地四十八畝親王府管領園地三十六畝郡王府以下管領園地三十畝各官執事人員皆給每地有差又題准王以下各官所屬壯丁計口給地三十六畝停支口糧諭戶部民間田房有爲旗人指圈改換他處者視其田產美惡連行補給務令均平其有瞻顧徇庇者罪命給事中御史等官履勘畿內地畝從公指圈其有去京較遠不便指圈者如滿城慶都等二十四州縣無主荒地則以易州等處有主田地酌量給旗而以滿城等處無主地補給就近居民凡民間墳墓在滿洲地內者許其子孫隨

時祭掃以上通考

三年諭京城內外無主園地酌量撥給諸王府 又議准直隸民人田地被圍者以各州縣連界地畝撥補其不願往他處者以未圍之民房地均分居住耕種戶部言民間田地撥給滿洲已經於鄰近地方補還但廬舍田園頓非其故又有遷徙之勞請照被撥地數一應錢糧全免一年其地土房舍雖未經撥給滿洲而與近村被撥之民同居分種亦請照分出地數將錢糧量免一半凡故明公侯外戚屯地既經撥出其錢糧請照數永免從之 四年令參領以下官員各給地六十畝凡撥給兵丁地畝有告稱不能耕種者不准所圍地內如有集場仍留給民以資貿易凡撥給地畝以見在為準嗣後雖增丁不加減丁亦不退各官雖陞遷不加已故降革不退

通考

五年定八旗莊屯地界 國初按旗分處各有定界繼因邊內地瘠糧不足支展邊關墾移兩黃旗於鐵嶺兩白旗於安平兩紅旗於石城兩藍旗所分張義站靖遠堡地瘠以大城地與之至是復定官員莊屯兩黃旗設於承德縣沙河所兩白旗設於寧遠兩紅旗設於承德縣塔山兩藍旗設於錦州 又准沙河以外錦州以內入旗官員兵丁每名給地三十六畝

通考

酌定親王給園十所郡王給園七所每所地一百八十畝六年定襲封王貝勒貝子公等其祖父所遺園地除撥給應得之數外餘地仍留本家公侯伯各給園三百畝子二百四十畝男一百八十畝都統尚書輕車都尉各一百二十畝副都統侍郎騎都尉各六十畝一等侍衛護衛參領各四十二

畝二等侍衛護衛各三十畝三等侍衛護衛雲騎尉各二十四畝凡官員致仕者督撫布按總兵各給園地三十六畝道員副將參將各二十四畝府州縣遊守等官各八十畝新來壯丁每名給地三十畝凡加封王貝勒貝子公等園地悉照本爵撥給七年定給公主園地各三百六十畝郡主各百八十畝縣主郡君縣君各百五十畝又酌定給親王園八所郡王五所貝勒四所貝子三所公二所每所亦百八十畝 鎮國將軍二百四十畝輔國將軍百八十畝奉國將軍百二十畝奉恩將軍六十畝嗣後凡初封王貝勒貝子公等俱照此爲額其鎮國將軍以下已給園地者停給家口糧米又定八旗舊壯丁每名撥地六畝撥給新來壯丁

通志

六年定外省駐防官員初任未經撥給園地者准撥給其加級陞任者不復添給凡給地六十畝以下者戶部撥給六十畝以上奏請撥給

通考

十二年題准遼陽鐵嶺至山海門八旗莊地有在邊外者令照舊種任惟酌量邊界開門勿誤耕獲十八年令蒙古察哈爾大臣侍衛等各照品級撥給莊屯

通典

康熙四年給守陵官員園地內大臣九十畝總管七十二畝副總管六十畝防禦及郎中員外三十六畝茶膳禮祝贊禮內監筆帖式駝騎校佐領下給事人及駝騎禮工二部執事人給地各有差

通典

二十四年設立糧莊每莊各給地千八百畝舊例每莊壯丁十名選一人爲莊頭給田一百三十畝

每六畝場園馬館另給田四畝莊丁蕃衍則留於本莊缺則補足給牛八頭量給房屋田種口糧器

為一畝 卅免第一年錢糧至是設糧莊每莊地三百畝其頭等二等莊頭不准給牛又山海關內古北口喜

峯口外糧莊每一所納糧百石合倉石三百六十五石山海關外糧莊每一所納糧百二十石合倉石四百三十二石至二

十六年題准於交納銀二百兩之莊頭內改為糧莊增壯丁為十五名 三十一年以山西陽曲太

原二縣屯地給與滿洲駐防官兵耕種通考

五十七年以山西右衛荒地自芒麻口外西至十家鋪東至彌陀山共二千餘頃安設莊頭十五名

五十八年以河南南陽府揚河地方墾荒田畝給與滿洲駐防官兵耕種

雍正二年行井田之法將內務府退出餘地及戶部所收官地內撥新城縣百十六頃固安縣百二

十五頃八十九畝制為井田挑選無產之旗丁滿洲五十戶蒙古十戶漢軍四十戶耕種自十六以

上六十以下各授田百畝周圍八分為私田中百畝為公田公田之穀俟三年後起徵於耕種餘地

立村莊廬舍每名給銀五十兩為口糧牛種農具之用設管理勸教二人 七年於順天府屬之霸

州永清縣設立井田以上通考

十三年令清查園頭牲丁壯丁人等典賣當差地畝戶部議凡園頭牲丁壯丁人等官給當差房地

例禁典賣但彼此授受相沿已久倘不勘明撤回在旗丁固無以為當差之資而概行撤回又恐鄉

愚失業應令逐細察勘如紅冊內開載之房地及其餘地本屬官物均應撤回其紅冊所不載本為

食貨

十四 約雅堂藏板

私業不應強撤至典賣有紅契白契之別撤時又有應追價不應追價應治罪不應治罪之殊應遣官前往各州縣照內務府紅冊徹底清釐仍將地畝數目四至村莊造冊四本一存本州縣其三分呈戶部內務府並該督以備考稽從之通考

乾隆元年改井田戶爲屯戶於附近州縣按畝納糧定古北口外熱河東西兩河旗地分別上中下

則納銀以省輓運停承催官令屯領催辦

嗣於四年復設典通

二年設立黑龍江屯莊黑龍江湖蘭地方設莊四十所每十丁編爲一莊令盛京將軍等選八旗

開戶壯丁四百名各給地六十畝房二間并給口糧籽種六年增設呼蘭莊屯又擇開丁五十名

增設莊五所七年設莊屯於溫得亨山及都爾圖地方以該處與呼蘭毗連土性肥饒水草佳美

選壯丁五十名增設莊五所各給牛種器具口糧十一年八旗公產地准編設莊頭時以八旗公

產地內有未經承買以及存退餘絕地畝共六千四百餘頃於乾隆七年酌留千頃爲各案撥補之

用每年官收租息爲數既輕吏胥包攬侵漁之弊皆所不免議令履畝詳勘量地之肥瘠定出租若

千如地美租多整分莊頭仍照例給地十八頃半分莊頭給地九頃如地瘠租少酌量加增其新設

莊頭令免差一年

通考

二十七年請部積存地畝仍分設莊頭上論分設莊頭編地不過二四千頃所餘尙有萬頃之多

此等地畝皆係老圍旗地且發帑贖回者十有七八令將三千頃安設莊頭其餘交內務府派員徵

收候原帑歸清之後卽賞給八旗作爲恆業二十八年停止安放莊頭之例 命軍機大臣會同總督方觀承妥議交租則例尋議請將原租之額分別上中下三則使租地兩得其平無庸拘泥原租并請將佃戶姓名注冊給照內詳載地名畝數每畝徵租若干統計地一萬四千五百三十四頃六十餘畝原徵租銀二十萬二千二百六十七兩酌復租銀十有一萬三千二百二十五兩照例解部從之通典

三十六年定西四旗地畝額徵戶部議吏部侍郎袁守侗會同山西巡撫鄂寶奏原徵察哈爾西四旗地畝并請水河徵收米石改折銀畫一辦理其應州等八處悉照內地州縣成例從之通考

四十四年諭八旗贖回入官老圈地節經更定仍准官員兵丁分買今計畝浩繁其認買地畝若離京在數百里外必致紛紛告假取租不惟徒費資斧又啟民人勒指之端其地租未定能否全得反將所得錢糧先行坐扣地價於旗人生計全無裨益不如仍令官爲取租解部分給八旗賞資兵丁交戶部八旗均勻分給通典

四十八年定旗租照正項錢糧例戶部議旗地租銀與正項錢糧事同一例民糧既有轉參旗租豈無年限請自四十六年以後租額除初參未完照例議處外應照正項錢糧酌定轉參則旗租定有章程而官賦永無陳積矣如議行通考以上官莊

身類之通正以委身名類

身類之通正以委身名類

身類之通正以委身名類

身類之通正以委身名類

身類之通正以委身名類

身類之通正以委身名類

身類之通正以委身名類

身類之通正以委身名類

身類之通正以委身名類

身類之通正以委身名類

身類之通正以委身名類

身類之通正以委身名類

身類之通正以委身名類

身類之通正以委身名類

二十四史九通政典類要合編卷二百九十四

皇朝二

食貨 田賦

官田之名見於周禮鄭眾以爲公家所耕田鄭康成以爲庶人在官者所受田二說不同馬端臨前考官田類止載殷周之公田藉田不及載師之官田似未賅備自漢至唐不聞云官田者至宋而其說始詳其時官田輸租民田輸賦官租之額浮於民賦甚至買民田以爲官田田不改舊而租加至數倍此官田之爲民累也明初如蘇松嘉湖諸府雖有官田民田之分然皆係民業並非公產惟科則有輕重之不同與宋之官田又不同矣若明之皇莊及諸王勳戚所賜莊田則爲在官之田其時公私侵占頗爲民累我朝定鼎之初卽將故明宗室祿田令與民田一例起科其明藩田產號爲更名地者亦皆賦於民而薄其征斂前代相沿之稅政至是盡除矣凡學田專供修學及贍給貧士其田與賦卽在州縣田賦之中惟佃耕收租以待學政撥發間有山塘園屋統名曰田所收有銀有錢有糧統名曰租田之多寡租之重輕各學不齊舊無定額

官田之制凡 藉田及在京 壇壝直省 社稷山川厲壇祠墓寺觀 文廟學校等田并部寺公

用田太僕寺牧廠及在官地均爲公田除其租賦

通典

直隸一十九頃二十四畝一分九釐一毫有奇 奉天一頃四十一畝九分三釐五毫有奇 江蘇

一百八頃八十四畝一分二釐五毫有奇又一千五百七丈 安徽一十五頃一十三畝一分二釐五毫有奇 浙江七十六頃五十四畝九分六釐九毫有奇 江西一十四頃三十一畝六分一釐有奇又積步四千三百一十四步 福建五百一十頃五十五畝一分九釐一毫有奇 山東九十八頃九十六畝四分五釐七毫有奇 山西三十八頃六十七畝二分四釐五毫有奇 河南一百一頃七十四畝九分九釐八毫有奇 陝西一十六頃二十三畝八分二釐五毫有奇 四川一十五頃一十九畝九分一釐一毫

順治元年賜聖賢後裔祭田除其租賦衍聖公祭田二千一百五十七頃五十畝林地一十八頃二十七畝廟宅基三頃二十七畝五分四氏學學田五十頃復聖裔祭田五十頃墓田地三頃三十三畝一分廟宅基九十二畝五分宗聖裔祭田五十一頃六十畝墓田地一十頃一十五畝七分廟宅基三十九畝一分亞聖裔祭田五十一頃一十五畝墓田地七頃三十一畝四分廟宅基一頃三十畝七分五釐先賢仲氏裔祭田六十五頃二十八畝墳地九頃五十畝廟宅基六十八畝皆除其賦令直省各置學田凡直省各學貧生聽地方官覈實申文該提學於所在學田內動支銀米酌給至七年改江甯國子監爲府學歲徵田房租銀錢稻穀留給貧生等春秋祭祀亦於租銀內動支五年以奉天屯衛地令八旗均分爲牧場奉天中前所前屯衛中後所三處地分與八旗自東迄西先給兩黃旗次兩白旗次兩紅旗次兩藍旗 六年順義等處設馬廠順義清河潮縣沙河蘆溝橋

五處荒地一千四百六十八頃四十四畝潞河沙河清河蘆溝橋兩岸各長五里闊三里俱令交作馬廐又定嗣後棄地爲馬廐永行停止如沙地不堪耕種者仍留牧馬 十一年耕藉於南郊藉田在正陽門外之西中爲 先農壇壇內地一千七百畝其二百畝給壇戶種五穀蔬菜以給祭祀之需餘千五百畝收租銀三百兩以備修理 壇墻凡藉田歲收黍一石二斗二升一合八勺穀一石五斗五升七合八勺大麥五斗七升九合七勺小麥一石三斗五升三合藏之神倉

康熙元年以天師菴草場歸并崇文門部員管理順治二年天師菴草場設場尉筆帖式及兵丁防守至是俱裁去 以榆林城外牧地令民人耕種榆林城外牧馬地十六頃三十六畝零令地方官

招民耕種明年以甘州鎮牧地三頃二畝招民承種入甘州中衛徵糧又奉天府錦縣馬廐地留備駐牧不許民間開墾以上通考

二十四年詔曰禮天子爲藉千畝諸侯百畝此則藉田之禮通於天下今朕欲各地方守土官通行耕藉之禮下九卿詳議尋議頒耕藉之制令各省擇東郊官地潔淨豐腴者立爲藉田運直田畝九分後立 先農壇令守壇農夫灌溉藉田無官地者置買民田每歲仲春行九推之禮

復增 孔林地十有一頃十有四畝九分免曲阜顏氏額糧有差又 賜元聖周公祭田五十頃以上通典

三十九年以天津等牧地招民墾種天津等十二州縣衛所牧馬廐地特派都統會同直隸巡撫查明餘地交與地方官招墾起科東翼四旗丈出一萬二百六十一頃零西翼四旗丈出一萬一千三

百七頃七十二畝

雍正二年復查馬廠及其餘地入旗存留馬廠并馬廠餘地派官員查明可以墾種者交與地方官招民墾種其不堪耕種之處仍交入旗爲馬廠是年總計天下學田三千八百八十六頃七十八畝五分四釐九毫有奇徵租銀二萬三千四百五十八兩二錢二分七毫糧一萬五千七百四十五石七斗七升八合三勺有奇錢六萬二千四百六十文

四年諭曰禮天子爲耜千畝諸侯百畝此則耜田之禮亦可通於天下朕意欲令地方守土之官行耜田之禮使凡爲官者時存重農課稼之心凡爲農者亦無苟安怠惰之習著九卿詳議具奏九卿會議請通行奉天直隸各省於該地方擇地爲耜田每歲仲春行九推之禮明年頒耕耜儀於直省令擇東郊官地潔淨豐腴者立爲耜田如無官地則置買民田以四畝九分爲耜田於耜田後立

先農壇令守壇之農夫灌溉耜田所收穀數造冊報部

以上通考

乾隆十二年除福建閩縣先賢二十三祠祭田糧租按祭田直隸十有九頃二才四畝 盛京一十八頃六十七畝 河南百有一頃七十四畝 江南江蘇百有八頃八十四畝 安徽十有三頃十有三畝 江西十有四頃三十一畝 福建五百二十頃五十五畝 浙江七十六頃五十四畝 陝西十有六頃二十三畝 四川十有五頃十有九畝 各有奇十三年裁減馬羣復議大凌河馬場表延於西界截出十里給官兵耕種

後又以西界地勢不齊量地截給東至杏山北濠溝西至鴨子廠南至七里河北至金廠堡

通典

二十一年清丈直隸馬廠地給民爲永業改名 恩賞官地天津靜海青滄鹽山豐潤寶坻甯河士

大父安任邱新安武清十三州縣於雍正二年查出馬廠地六萬一千九百七十七頃零給民墾種至是命侍郎吉慶等會同督臣查丈得十一萬五千一百二十六頃零至二十二年復命督臣覆丈實得十萬一千一百二十四頃零除已經墾種升科外其已墾未升科地一萬五千六百五十二頃零應按畝酌定科則天津靜海青滄鹽山武清寶坻任邱新安九州縣地分爲上中下三等每畝徵銀五分至一二分不等寧河縣葦草地分爲二等每畝徵銀三分一分不等文安縣地每畝徵銀五分五釐大城縣地每畝徵銀五分五釐九毫零其餘未墾荒地候召墾成熟之後按則起科又豐潤縣原報墾地三千五百餘頃係海濱斥鹵不能耕治仍應歸於未墾荒地項下如有民人願認爲業者照河泊葦草地例起科二十六年准湖廣荊州八旗馬廠墾熟陞科地給民人管業諭蘇昌奏荊州八旗馬廠坐落江陵潛江石首監利枝江等縣一帶沿江地方從前原係民間拋荒地土後因設立滿洲官兵卽圍作馬廠近日居民漸次報墾陞科旗人稱爲侵佔廠地民人指稱納糧產業彼此爭競不息現在會同將軍定界造冊以息兵民紛爭等語牧廠關係營伍而糧地亦民間生計所資自必明定界限始可永息爭競現在沿江之地如果牧放久經圍用勢在必需而民人從中計圖侵種自應按照前此界限查出歸旗若僅係附近馬廠四旁原無礙於牧放民人又已墾熟陞科亦應仍給民人管業三十一年丈勘太僕寺右翼牧廠餘地招民墾種定交納銀糧運送貯交之例戶部議准察哈爾都統巴爾品等奏一會勘得山西所轄之豐鎮寧遠二廳地方太僕寺右

翼牧廠空地丈明可墾地二萬三千餘頃內一萬三千五百頃堪種粟穀應徵收本色又九千餘頃
 止宜雜糧應徵收折色凡與游牧毗連處立定界址以杜紛爭優越之弊一每地以五頃為一分視
 資本籽糧多寡或每戶准給一分或兩三人合認一分頒給印照執業不許轉賣並於查青時查明
 已未布種分別年限陸續陞科一前項議墾地畝應徵銀米悉照口外成例分別本折徵輸飭豐鎮
 寧遠二廳各隨所轄地段隨時徵解一徵收糧石於豐鎮廳地方建倉存貯以備轉運其運至張家
 口脚費照定例辦理一未經全墾之前就每歲現徵銀米分別運解以給駐防兵糧通考
 三十七年定民人開墾馬廠例殺虎口外民人開墾馬廠在於察哈爾游牧地界外已經成熟者聽
 其耕耘徵賦毋許再行私開三十九年又蒙古招民開墾輔國公馬廠地百餘頃議准在飭禁以前
 早已成熟者即照三十七年民人開墾牧地例又准太僕寺廠地招民開墾是年山西豐鎮寧遠二
 廳墾二萬千五百五十五頃七十餘畝通典

四十六年戶部議口外牧廠地方本屬遼闊近年來王公大臣等牧放牲畜漸稀而流寓小民在該
 地方居住者亦漸漸聚成村落伊等衣食無資日守無權聞地勢難禁其私墾是雖定有嚴禁之名
 究無嚴禁之實似不若准其耕種作為有收之土照例陞科所有和碩莊親王搭拉庫布爾地方牧
 廠一處既據察哈爾都統山西巡撫查勘所墾地畝實與游牧無妨應請照恆毅等家開墾馬廠空
 閒地畝之例一律陞科再和碩禮親王呈報現有民人私墾應令該都統等查明如果與游牧無礙

者一併確查辦理并請嗣後各旗王公大臣等口外牧廠實與游牧毗連處所或有蒙古與民人私

行創挖耕種者令該地方官仍照前實力稽查嚴行飭禁如議行

通以上
考官田

古者畫井分田制爲溝洫畎澮以達於川廣深尋丈俱有定式蓋無在而非水利而稻人掌稼下地
所講畜水止水蕩水均水舍水寫水之法卽後代言水利者之權輿也自阡陌既開而引渠溉田之
利紀於前史爭爲美談洪惟我朝列聖相承念切民依廣興水利東南則籌疏導之方西北則
資灌溉之益民生樂利及於無窮我皇上御極以來尤以水利爲要務淮揚畿輔之地經理官導
厥有成績迺者復以江淮兗豫頻年積潦特命廷臣會同守土大吏講求宣洩之要指授方略
諄切周詳不惜工不受帑不勞民遂使沮洳下濕之區皆成沃壤而猶宵旰憂勞有加無已所以
爲閭閻籌久安者至深且遠允宜悉著於編以垂示萬世

順治九年以工科給事中胡之俊言經理東南水利之俊疏言方今天下財賦半出東南而東南要
地莫如江浙蘇松嘉湖地勢汗下舊劉家河吳淞江等處海口壅淤河道成田土豪占據水患屢告
請潘吳淞以洩陳澱之水濬劉河以洩巴陽之水庶於國計民生有賴十六年修浙江海鹽縣海
塘禮科給事中張惟赤言杭嘉湖蘇松常鎮七郡皆瀕於海海塘築自唐開元中至明始易以石編
立字號并編定夫銀以事歲修他郡無論卽就海鹽一處之塘歲編銀六千九百九十九兩零自明
末至今並未修築此塘不知此項作何支銷應請定限歲修以防水患工部議如所請卽於是年修

致兩二號石塘二十一丈明年復修閘餘二號成歲二號石塘共六十丈

以上通考

康熙三十七年桑格又疏言開濬分水之法一請修芒稻河分高郵邵伯兩湖之水入江一請挑曹家灣湯家絆七節橋使通高邵兩湖淤塞達芒稻河以入江一請挑車兒埠之溜子河使泰州所受積水由苦水洋以入海一請挑澗河分運河之水入湖由射陽湖以入海一請挑海陵溪使高郵所受之水通閘門以入海一請挑車路白塗海溝三河使興化所受之水由丁溪草堰白駒以入海一請挑蝦鬚二溝憂桑河并滕隴河西於塞之射陽湖使高寶興泰鹽山等處之水由廟灣以入海經部臣議定如所請行三十八年 上南巡閱視高家堰等隄 論治河上策誠能深濬河底則洪澤湖水直達黃河至於黃淮二河交會之口過於逕直所以黃水常逆流而入今宜將黃河南岸近淮之隄更迎東長二三里築合堅固淮水近河之隄亦迎東灣曲拓築使之斜行會流則黃河之水不至倒灌入淮矣又 諭朕自淮南一路詳閱河道測算高郵以上河水北湖水高四尺八寸自高郵至邵伯河水湖水始見平等應將高郵上下隄岸俱修築堅固有月隄處照舊存留至邵伯地方河湖合而爲一不必修築隄岸將湖水河水俱由芒稻河人字河引出歸江下河自可不必挑濬矣

通典

四十三年令天津開墾水田時以天津附近荒地開墾一萬畝爲水田令各省巡撫將閩粵江南諸

處水耕之人出示招徠情願者安插天津諸處計口授田給與牛種限年起科

通考

雍正二年命尙書朱軾往江浙會議修築海塘事宜朱軾會同浙江撫臣議言餘姚縣東自嶺山鎮

西至臨山衛六十里舊有土塘三道內一道爲老塘離海二十四里或十餘里卽昔時之海岸歷年沙淤百姓開墾報陞自築土塘二道是爲外塘今議加高三四尺加厚五六尺又自臨山衛至上虞縣界之烏盆村十五里自村至會稽縣瀝海所四十五里有石塘二千五百餘丈

卽康熙五十八年所築

其東

西兩頭土塘七千丈坍塌甚多擬於塘底開深二尺填築亂石上鋪大石寬六尺高六尺貼石築土寬二丈高一丈三四尺又仁和縣之翁家埠起西至海甯縣之陳文港七十餘里舊有石塘無庸議修自陳文港至尖山二十餘里草塘七十四丈亂石砌邊土塘三千七百二十六丈應將土塘加寬一丈五尺高三尺上鋪條石厚一尺其草塘亦如式改修又塘外原有亂石子塘寬三四尺不等外加排椿年久欹斜剝落應修全完固其原無子塘者亦如式興修又海鹽縣東自秦駐山三澗寨起西至演武場石塘二千八百丈年久塌壞八十餘丈去秋風潮衝潰七十丈應照式修築又自演武場至平湖縣之雅山礮臺一帶土塘見在地方官加修月內可以完工以上估修銀十萬五千七百餘兩又會同江蘇撫臣議言松江府之華亭婁上海等縣沿海二百五十餘里地勢窪下土脈鬆泛捍海塘工較他郡尤要自金山衛城北十里起至華家角止四十餘里土塘六千二百餘丈內最險工一段自滬闊墩至東灣九百六十九丈六尺次險工四段自金山墩至西墩七百六十八丈兵廠至張家舍二百八十八丈倪家路至三岔墩三百六十丈周公墩至華家角一千四百六十八丈八尺俱應易土爲石以資保障其餘二千四百餘丈水勢稍緩宜堅築土塘用條石鋪底砌邊外釘排

繕自華家角至上海之頭墩十餘里塘外淤沙一二里不等自頭墩至嘉定縣界一百二十里舊有土塘二道內爲老塘外爲新塘應俱加築高厚外塘仍密釘排椿以防衝潰以上估修銀十九萬二千九百餘兩疏上令依議速行 三年命怡親王允祥大學士朱軾察勘直隸水利繪圖進呈四年諭九卿曰怡親王陳奏畿輔西南水利情形披覽甚爲明晰著交與九卿會議具奏怡親王等於去冬今春奉命察勘水利前後往返三月餘而於直隸地方東西南三面數千里之廣俱身履其地不憚煩勞凡巨川細流莫不窮源竟委且因地制宜準今酌古曲盡籌畫以期有益民生公忠爲國甚屬可嘉 是歲設營田水利府以怡親王等董其事初於灤州玉田諸州縣濬流築圩建關開渠皆官爲經理民人願耕者官給帑銀以爲工本秋成時歲收十分之一足額而止募江浙老農課導耕種之法有力之家率先遵奉者以圩田多寡分別獎賞其濬疏圩岸以及瀦水節水引水戽水之法各因地勢次第興修所需農具水車等募江浙工匠如式製造課本地工人習之是秋田之成熟者凡百五十頃有奇而民間自行播種者若霸州文安大城保定新城安肅任邱共七百一十四頃有奇多獲秋登五年分立營田四局 一曰京東局轄豐潤玉田薊州寶坻平谷武清灤州遷安自白河以東凡可營田者咸隸焉 一曰京西局轄宛平涿州房山涞水慶都唐縣安肅新安霸州任邱定州行唐新樂滿城自苑口以西凡可營田者咸隸焉 一曰京南局轄正定平山井陘邢臺沙河河南和磁州永年平鄉任縣自溥滏以西凡可營田者咸隸焉 一曰天津局轄天津靜海滄州暨興國富國二

場自苑口以東凡可營田者咸隸焉局各有長有副有劾力委員凡相度估料開築建造皆委員與地方官偕而查報地數花名給發工本則專責之地方官水田既成令地方官遵前規而以時達之水利營田府自五年設局至於七年營成水田六千頃有奇 謹按畿輔水利之議見於古者北魏裴延儒爲幽州刺史於范陽漁陽立渠堰溉田萬餘頃唐瀛州刺史盧暉引泚洳溉田五百餘頃晉令程處默引洺水溉田平棘令弓志元開畢泓以蓄洩水利又鎮州獲鹿縣有大唐渠有禮教渠引太白渠溉田宋臨津令黃懋請於河北諸州作水利田而制置河北屯田使何承矩於雄莫霸州平戎順安軍興堰上六百里置斗門引洺水灌溉以足邊食元提舉諸路河渠郭守敬言水利六事一曰順德達泉引入城中分爲三渠灌城東地一曰磁州東北滏漳二水合流處引水由滏陽邯鄲洛州永年下涇雜澤合入滏河可灌田三千餘頃明汪應蛟巡撫天津於葛沽白塘種水稻畝收四五石疏請於朝以防海官軍萬人分田墾種而徐貞明水田之議尤詳京東諸州縣皆有其遺跡至我朝雍正三年直隸以水患告既賑貸而撫恤之 特命怡親王等周履三輔大興營田引水溉田之法旌敘鼓舞之方既詳且悉其所設京東局則徐貞明之遺規也京西局則何承矩黃懋之舊制也京南局則郭守敬之議可循天津局則汪應蛟之跡尚在分命官吏督率營治而民人亦有踴躍從事者數年之間得水田六千頃有奇而灌溉之利被於三輔矣

九年遣太僕寺卿顧琮稽覈直隸水田除距水稍遠地勢稍高須車戽而升者聽民隨便種植外其

水足地平無煩汲升之處令地方官具永遠可爲水田結狀呈報戶部覈廢者如例議處又議設營田觀察使二員分轄京東十年論寯夏爲甘肅要地渠工乃水利攸關朕特遣大臣督率官員開濟惠農昌澗二渠又命修理大清漢唐三渠以溥民利年來惠昌二渠及唐渠工程漸次告竣於民田大有裨益其大清渠漢渠雖未竣工然加謹堵築極力挑濬已足以資灌溉不逼滄岸牖座有應行修補之處可以從容經理查寯夏有專司水利之同知著將未竣之渠工交與該員於每歲春工內分年陸續修理務期工程堅固利濟有資使民田永霑膏澤是歲又以甘肅所屬之瓜州地肥饒可望將疏勒河上流築壩開渠引水入河又於安家窩鋪對岸導渠疏濬深通引水溉田至十一年陝西之柔遠堡鎮夷堡口外雙樹墩等地方開墾令開渠溉田十二年甘肅口外柳林湖地屯墾令築壩建隄開渠又陝西之中衛縣白馬寺灘地廣可耕令開渠建槽以資灌溉

以上通考

乾隆七年命大學士陳世倌會同高斌辦理水利尋疏言淮陽徐海鳳嶺泗七屬爲百川眾匯高寶

諸湖承洪澤湖之下游自邵伯以上入海自邵伯以下入江而入海不如入江之便請於金灣壩下

添滾壩三座分引湖水入於鹽河卽於鹽河對岸挑引河一道并挑鳳凰橋下引河及壁虎橋下壩

家溝歸石羊河以達於江至董家溝原歸芒稻河當令挑深自爲一河直注於江其泰州河內之秦

塘港白塔河百汊港改建閘門以時啟閉此導湖水入江之路也黃河北岸微山湖爲上流之瀦駱

馬湖爲下流之瀦而中河爲咽喉六塘河又承駱馬湖之下流歸場河以入海今應將板浦以下場

河及六里車軸等河一律疏濬武漳義澤六里河頭各建石閘以時減洩鳳泗諸州漕泚灘爲大而泚河久淤應將宿州之水導入滄鳳靈之水導入濰不使仍入泚河爲患海州諸水沂沭爲大應將河身淤塞者濬深民堰殘缺者堅築以通積水其餘七府州屬支河溝渠應修理者百四十餘處並請次第興修俱從之八年准高斌請於直隸柔乾河南北兩岸開大渠一道引水以溉民田

通典

九年詔興修畿輔水利大學士九卿議覆御史柴潮生奏河間天津二府頻歲亢旱請大發帑金經理畿輔水利凡河渠淀泊有故跡可尋者重加疏濬開溝建閘引水溉田凡待賑之民分段派工厚給其直所費雖多實爲無窮之利臣等思北方地勢平衍原有河渠淀泊水道可尋從前或行之未久輒就罷廢或奉行不善轉致虛糜遂謂北地水利不可興聽其自盈自涸而不爲之均節有水無利而獨受其害雖天時之不齊亦人事之未盡也所奏興修水利事屬應行疏入 命尙書劉於義

往保定會同總督高斌詳議經理是歲協辦大學士尙書劉於義等陳水利十二事一宛平良鄉涿州境內之牝牛正支各河宜疏濬以消漚水一新城雄縣境內之白溝河宜濬支流以免漫溢一趙北口以東淀內支河宜分別開濬一東淀河道宜開通徑直一子牙河濁流穿淀宜另疏出口水門并築長隄分別清濁一附近永定南北之舊減水河宜疏歸鳳河一場河淀尾閘淤塞宜亟疏濬一唐河宜由廣利等渠引歸保定之府河一天津新安霸州諸河淀宜渠閘通引以沃民田一正定各泉宜開河引渠一舊有營田渠閘宜酌加修復一民間自營稻田宜酌給工本大學士九卿會議俱

應如所請 命速行之至十年劉於義等又言一廣利渠以下應添建涵洞一望都以下沿白草溝河至清苑安肅官開滾道溝廣利依城二河宜挑減水河一張青口以下應挑支河以分淀河之水一新安縣之新河應挑深以洩容城新安之水十一年劉於義等又言一場河淀漲水應由七里海引歸薊運河一天津東北賈家口舊河應挑浚以洩積水一靜海迤東盧北口應接開支河一南運河捷地汎應改挑引河尋又言一慶雲縣積水應浚馬頰河引水歸海一慶雲縣西南高慕臺窪應挑溝引水入老黃河一慶雲縣四鄉洩水溝渠應開挑以疏積滯一鹽山縣宣惠河挑深洩積水入老黃河皆下部議行 令湖蕩蓄水之地毋許民人墾種戶部議准浙江上虞之夏蓋湖餘姚之汝仇湖水利攸關民人毋得侵占并令凡有湖蕩之地詳加考察勘劃明界限不許再行開墾阻塞水道其從前已墾田畝亦令核明有無陞科分別辦理

通考

十三年諭江南淮海一帶州縣近年屢被災傷推原其故皆由山東沂州等處雨水盛漲建瓴而下遂直注駱馬湖衝決六塘兩岸子隄淹浸民田著大學士高斌左都御史劉統勳會同撫臣阿里滾將本省近年致患之由並將來作何查辦悉心定議尋據高斌等疏言運河受漳衛汶泗沂之水兩旁承以諸湖其間山泉支港閘壩涵洞橋梁斗門皆有關於蓄洩應將德州哨馬營浪水壩落低以消漳衛之盛漲海豐之馬頰河聊城之徒駭河疏導以分運河之漲東平之戴村二壩落低以減運河漲溢之水濟寧之董家口引入白馬河歸河濟運以衛民田沂州之江楓口堅築堤壩使入湖歸

運以免旁溢山東之運道泉湖安流順軌卽下游淮海之地無憂溢浸矣疏入如議速行通典

十五年勅河臣督臣會議淮北修築圩岸事宜御史胡蛟齡言江南之邳宿贛沐諸州縣皆淮水下流而海州上承東省來源下鄰海浦每春夏之交栽植甫畢水患隨至有種無收率以爲常宜倣江南圩田之法多爲溝洫使足容水查乾隆十一年議海州等屬令有司勸民修築圩岸數年以來作何辦理情形乞下督撫諸臣確切定議疏入 上令總河高斌總督黃廷桂會議尋據高斌等議言臣等查得海州及沐陽安東宿遷三縣築圩挑溝已經工竣阜甯贛榆二縣亦已勘明興修桃源清河二縣四鄉均係旱地並無水田圩岸有費無益竊思永利農田柙爲表裏圩岸之制誠爲良法惟是地勢不同難以一律而論海州上承駱馬湖之水由六塘沐山兩河分注入海從前民間自築圩堰後經奏請動帑加築費至數十萬然遇山水盛漲之年民間無論有無圩岸均不免於水患誠以來源甚多下流甚窄容洩不及勢必橫溢不能強與水爭也至於圩岸之制惟宜於蘇松常鎮等屬其次則高寶興泰山鹽諸縣行之亦有成效蓋上游無異漲之水故圩岸得以施功若海州等八州縣在黃河以北一望平行土性浮沙不宜禾稻民間惟恃春麥向有一麥抵三秋之謠一交夏秋則上游山水泛溢六沐交漲非圩岸所能禦臣等思水性地利之宜不容穿鑿而補偏救弊之方不可不盡所有各州縣已成之圩岸仍令有司督率民夫歲修至沙高土鬆并卑窪容水之地均不能強行修築如此則淮徐海各州縣春麥卽可歲獲豐稔秋成則合計數年之內亦可一二年有收庶沮

泗之地隨時補救水患可漸減矣

通考

二十二年上南巡親蒞河干

指示一切疏洩捍禦機宜時微山昭陽諸湖俱已疏通而駱馬湖隄

堰殘缺不足禦運河盛漲於是並築駱馬湖隄又以六塘河以下餘潦停積桃源宿遷諸窪地多成

巨浸山東之金鄉魚臺等屬未涸地畝尚有十餘莊江南之宿遷靈壁及河南之永城夏邑等處漫

衍地界不下數百里經山東巡撫鶴年奏報卽命鶴年速赴荆山橋偕白鍾山及侍郎夢麟籌濟

甯金鄉魚臺滕嶧五州縣水勢復遣侍郎表曰修馳視山東河南上江各屬積水在山東者與鶴

年會商在河南者與圖爾炳阿會商在上江者與高晉會商其地方官有熟習水道之員聽其酌量

差委並飭表曰修夢麟尹繼善白鍾山嵇璜張師範及各督撫先後勘明各工權其輕重緩急就

最要者同時並舉餘亦次第興修均於歲內告成於是自濰河以上堅閉毛城鋪諸閘使不得洩黃

水以壅濰河而於潁亳一帶及虞夏商永各屬幹河支河一律疏導以洩中州諸河去路並挑袁州

之府河洸河改金口閘涵洞爲減水閘改楊家壩爲石閘浚伊家河洩微山湖水入運又築堵沂水

不使入運以免沛縣旁溢添設昭關滾壩又建高郵運河東堤石閘酌定水則以時啟閉浚芒稻閘

越河以開湖河歸江之路又於微山湖口洩入荆山橋一帶支河專派道員駐劄隨涸隨挑以暢下

游之勢是年又於高堰南岸添整石隄明年又築北岸土隄

通典

二十三年諭陳宏謀所奏籌辦溝洫圩圍情形已於摺內批諭矣淮揚各屬水利見經相度挑浚大

工告竣其溝洫圩圍乃係隨時葺治裨益農田之事雖當悉心經畫然須次第從事若以意在保護民田而與水爭地轉貽日後之患此又不可不爲顧慮者所謂修廢舉墜亦當隨宜籌度者此也如高寶海州等處從前舊有圩田自應隨時酌量修理以資生計若所云湖蕩可爲圩田遽欲勸導興築恐此等窪下之區原皆留以瀦水今若任民間田設遇水勢盛旺不溢而爲上游之患卽漫圩而過沖潰必多又安在其爲利民耶雖謂附近居民原所從樂並非強令興舉但小民惟知占地之近利豈能深計全局況今年甫獲豐收民力未甚寬裕地方官正宜體恤未便概責以力從趨事此於數郡民生甚有關係其實在情形非詳加體勘難以懸定著交與尹繼善會同該撫再行悉心查看酌議奏聞請旨尹繼善等議言溝洫圩圍之工原以資蓄洩備旱潦但若任民間築阻礙水道必爲上游之患臣等遵 旨督率各屬因地制宜或開溝以洩水或築圩以衛田舊圩之殘缺者補之舊溝之淤塞者疏之凡低窪湖蕩仍留爲瀦水之區不許圍築其通湖蕩之水路并令酌量留寬竇讓地與水不與水爭利各處挑浚溝洫務與新浚之河道脈絡灌注新舊圩溝分別緩急以三年內全完庶民力舒徐而積歉之區元氣可以漸復從之 二十七年諭直省督撫辦理溝渠蓄洩事宜山東道御史湯世昌言今歲近京各處雨水過多低田淹損行路泥濘頗爲農商之病惟於大道兩旁開渠深廣旱澇蓄洩該地農民照河工民堰民修之例富者計畝出夫貧者出力餬口因其地勢節節疏通則水有歸宿農商不至受病矣疏入工部議如所請奉 諭旨工部議覆御史湯世昌條奏

廣開溝渠以資蓄洩一摺所辦尚未洞悉自古力役一項本爲捍衛民生并非征求無藝第如摺內所稱富者計畝出夫貧者出力餬口微特小民久樂昇平不識公甸之令設使地方不肖吏胥因而從中高下其手苛派賄賂轉非因利利民之意自宜分晰籌畫如其地與民田民舍甚爲切近而工程又屬細微民間願出力從事者聽其自行修築不必繩以官法外若其功非旦夕可旣而民力更難以全任則仍當官爲酌助口食之資庶民不艱而事易集是在封疆大吏飭屬善爲之耳二十九年諭高晉籌辦雲梯關黃河下游一摺所見甚是已於摺內批諭雲梯關一帶爲黃河入海尾閭原不必設立堤岸與水爭地而無識者好徇浮言或以上流清口洩水分數較多遇海潮盛時或不免意存顧慮因有子堰堤防之議殊不知清口暢洩其收利在下河州縣者不可勝計至雲梯關附近不過阜甯安東二邑所轄地面卽令一時偶值盛漲所侵溢者不敵百分一二高晉旣知下游之制防一切毋庸置議益可信清口之展放無難永遠力持於水利民生實爲交有裨益高晉言雲梯關下游北岸之五套南岸之陳家浦近日溜勢趨逼漸次兜灣向裏舊有土堤卑矮單薄據山海二廳請估幫高厚添接魚鱗越堤臣親赴察勘雲梯關以外俱係蘆葦蕩地離海甚近是以舊制本無堤岸因一望平灘水勢易於散漫曾設卑矮土堤約欄水勢與關內堤工形勢迥別自不應與水爭地臣等詳加相度與其築地束水致生新工不如讓地與水以順其性將來伏秋汛內酌量情形預於舊堤上另作斜長子堰一道俾漫灘之水攔入正河而清口東西壩每年大加折展湖水匯黃

歸海尾闊寬闊於就下之勢益資暢達矣疏入遂有是論 四十七年諭前據胡季堂奏黃水灘出地畝甚多居民村落並皆耕種麥苗一遇水發勢必築圍打壩填塞自多且河身多一村渌卽水勢少一分容納請敕下河南山東江南各督撫確查令其遷居堤外等語河灘地畝居民開墾日久必至填塞河身於河道甚有關係且居民廬舍佔據灘地猝遇水漲之時於民居亦多未便因特降諭旨令薩載等確加履勘其隄外地居高阜者仍聽照常居住耕種若佔居堤內於水道有礙卽行明切曉諭俾陸續遷徙並令該督撫等妥爲經理毋致貧民失業因思灘地居民墾地結廬已非一日若其目前無事安居已久不免安土重遷且河堤以外均屬民田亦無隙地可以遷徙所有舊居隄內灘地無礙河身者仍加恩准其各守舊業以副朕懷念窮黎之至意此後毋許再行住居佔種

通考

四十九年上南巡親閱工程 諭普桑魚鱗石塘所以保障民生關係甚重今所辦工程多未協之處石塘旣建自應砌築坦水保護塘根乃考之督撫惟云柴塘必不可廢此受工員慫恿爲日後歲修冒銷地步況此番添建石塘原欲留柴塘以爲重門保障並未令拆去柴塘若如該撫所言復加歲修又安用費此數百萬帑金爲耶又右塘之前柴塘之後見有溝槽一道槽內積水並無去路將來日積日甚石塘根腳勢必淹浸滲漏該督撫亦並未慮及其石塘上堆積土牛甚屬無謂設果遇異漲又豈幾尺浮土所能抵禦所有塘上土牛卽著填入積水溝槽之內仍將柴塘後之土順坡斜

築祇露石塘三四層爲度并於其上栽種柳樹俾根株蟠結如此柴石連爲一勢卽以柴塘爲石塘之坦水至范公塘一帶亦必需一律接建石工方於省城足資永遠鞏護著自新築石工止處及挑水段落起至硃筆園記處止再接至烏龍廟止一體添築石塘再撥部庫銀五百萬兩仍予限五年分段修築以期海疆永慶安瀾 謹按浙省海塘自章家菴至老鹽倉一帶乾隆四十五年 皇上

親臨閱視

命建石塘四千九百丈

通典

以上水利田

屯田之政前明倣唐府兵遺意鄉衛所之制以軍隸衛以屯養軍而設都司以統轄之嗣後經制屢更別募民以鎮守於是營軍與屯軍分而爲二屯軍惟職漕運其無漕運者又有營造之役是軍政戶屯兩無裨益矣 國初創制屯堡凡衛弁各所給軍分佃剔除差徭後以直省各設經制官兵而屯衛之軍次第裁汰惟有漕運之地仍隸衛所其駐防之軍亦給屯田餘皆歸併州縣蓋稽其藉雖有軍民之殊而承佃輸賦則屯田與民無異隸之州縣體制詳明誠 昭代之鴻規萬世之良法也此外墾荒及圈地給糧地凡所以實軍儲而裕民力者悉隨時裁定俾軍屯安耕墾之常兵民享盈寧之利典制精詳謹按年編纂以昭典則而垂示萬世焉

通典

屯田之制原以寬民力而裕兵食也自漢唐以來或屯於兵或屯於民或兵民兼屯至明而又雜出於商網紀不立轉輸不繼而其弊出矣我 朝疆土宴安外鮮兵興之費內無饋餉之勞以故屯地陞爲官莊屯軍改爲運軍而無運衛所悉行裁革內地屯田迥非舊制惟 聖祖西事之初 諭將

軍費揚古穆克登等於賴德爾齊老圖錫濟木鄂爾坤圖拉等處擇地駐兵屯種開渠引水教之稼
穡數年之間化磽瘠而爲沃土者數百萬頃 皇上御宇之二十年 遣大兵征準噶爾回部 詔
令軍機大臣先於額爾齊斯所屬及巴里坤吐魯番呼圖拜等處漸次屯種以備軍興及回部蕩平
新疆展拓二萬餘里泉甘土肥地氣和暖無異內地 皇上念切民依復度地開屯撥軍承田願往
者資以車輛初墾者給其牛種察稞種之燥寒計收穫之先後使荒陬僻壤之民盡享盈寓之利是
豈若前代之僅以防邊鄙惜漕費爲計者哉

通志

順治元年定荒地屯種例先是開國之初每佐領撥壯丁十名牛四頭於曠土屯田至是淮州縣衛

所荒地無主者分給流民及官兵屯種

通考

三年更定屯田官制每衛設守備一員兼管屯田量設千總百總分理衛事裁原設指揮副指揮改
衛軍爲屯丁其衛所錢糧職掌及漕運造船並都司行都司之制皆仍舊

通典

六年定直隸屯地輪租例天津葛沽等處屯田舊例分三則上地每畝六升中地四升五合下地三
升今定果樹菜畦水田葦地每畝科租一斗麥地六升雜糧地四升五合 七年令衛所屯田分有

無運糧科徵先是衛所屯田分給軍丁承種因有操演城守捕盜領運之責科徵較民地稍輕至是
裁沃衛軍凡有運糧衛所屯糧仍舊派徵其無運糧衛所屯田俱照州縣民田例一體起科 九年

以廣東屯糧全徵本色屯丁苦累令本折各半徵收又令各省屯丁有關漕務者仍留駕運

通考

十三年定屯田貼運之例向例漕船一艘派屯田百五十一畝今議定有屯帶運衛所照數分派

混合各衛嘉湖屬餘田徵租銀撥貼無屯衛所金華等所相處至有屯無運衛所金華等衛有屯無運有願運衛各所有屯帶運

者給田愈運餘田亦徵租撥貼無屯衛所運丁康熙十年以屯田缺額每給田百十三畝十四年清查民田賦役册籍

凡民册當差者衛所不得告攀軍册有役者州縣不得重派民佃軍田者照地納租不派軍役軍佃

民田者只完正賦不派民役先是湖廣有運軍班軍操軍三項各設屯田後裁沃班軍操軍歸農只留運軍以資軍民册籍混淆至是釐正永著為例十六年除

四川衛所屯糧歸併州縣照民田起科十七年更定雲南衛弁職田收租准俸例其田各歸衛所編

入戶口以本七折三徵收按雲南向有衛弁職田收租准俸不納稅糧與

康熙六年議令投誠兵屯田湖廣道御史蕭震疏言屯田為養兵裕國之本兵屯繼不可即行而投

誠開荒之策未有不可立行者查投誠之取所攜家口數倍正兵若予以荒地給以牛種俾無失所

以為招徠之勸一便也綠旗兵有防禦之任投誠兵無汎地之責是綠旗之屯田難投誠之屯田易

二便也近例投誠兵隨標者月給餉糧歲費金錢八十餘萬與其糜費養兵之資何如使開荒蕪之

地行之三年照田起科既有兵餉又增屯賦三便也各省荒田尚有四百餘萬頃分給投誠兵丁使

之耕種則軍儲日實戶口漸繁是力田即以阜生四便也疏入令戶部兵部行令各省督撫確查墾

荒事宜遵行 御史蕭震又言國用不敷之故皆由於養兵以歲費言之雜項居其二兵餉居其八

以兵餉言之駐防之禁兵藩兵居其二綠旗兵又居其八今黔蜀兩省地多人少誠行屯田之制駐

一郡之兵卽耕其郡之地駐一縣之兵卽耕其縣之地駐一鄉之兵卽耕其鄉之地如此則養兵之費既省而荒田亦可漸闢矣下部議行通考

五十四年設喀爾喀蘇爾圖喀喇烏蘇烏蘭固木料布多等處屯田 命公傅爾丹等監管先是

上以厄德爾齊老圖地近推河應屯田駐兵令將軍費揚古等與喀爾喀汗王等會議至是費揚古言臣等以屯田詢喀爾喀土謝圖汗等據稱蘇爾圖喀喇烏蘇烏蘭固木料布多等處俱可耕種應

撥土默特兵善種地者一千每旗令台吉塔布囊一人率往屯種遣大臣一人監管奏入 上命議

政大臣等集議議應如所請再哈密地方亦可耕請一併行文將軍將西吉木布隆吉爾等處勘明

具奏得 旨如議傅爾丹願往効力卽交伊辦理後都統穆賽等言科布多等處耕種收穫甚多應

撥土默特人一千及出兵歸化城之土默特兵一千令往耕種議政大臣等議如所請得 旨允行

謹按屯田之設不特省輓輸兼可盡地利我 聖祖仁皇帝西事之初卽 敕所司留意趨充國

三奏至是察勘蘇爾圖等處分兵屯種 命傅爾丹辦理嗣後復募民田作不數年間嘉峪關外裕

軍備於絕域化沙磧爲沃壤矣

通考

五十五年開巴里坤哈密等處屯田凡發往軍前効力人等有願種地者許其耕種又議准尙書富

寧請喀密所屬博羅爾圖古哩克接壤之處并巴里坤都爾博勒津哈喇烏蘇及錫濟木遠哩圖布

隆吉爾附近之上浦下浦等處兵丁有願往者亦令耕種是年冬蘇爾德奏稱都爾博勒津圖古哩

克哈喇烏蘇所種地畝有秋尋議令備明歲籽種五十六年增墾阿爾袞固楚實伯哩烏蘇龍瑪爾塔呼塔克察罕郭勒等處荒地 命戶部侍郎梁世勳等督理巴里坤屯田五十七年令新舊開墾都爾博勒津圖古哩克及回子扎薩克敏所種塔哩雅沁地所餘青稞貯倉充裕軍糧郎中蘇赫等議敘有差

通典

雍正二年臣僚上言請改併衛所歸州縣管轄兵部議軍民戶役不同歸併未便 上曰滇蜀兩省曾經裁併未聞不便今除邊衛無州縣可歸與漕運之衛所民軍各有徭役仍舊分隸外其餘內地所有衛所悉令歸併州縣令直省督撫分別區畫具奏 三年命議開鄂爾坤圖拉等處屯田 諭振武將軍穆克登鄂爾坤圖拉一帶甚為寬闊若開墾屯田實為永遠之計爾會同喀爾喀將軍確議具奏尋穆克登奏言鄂爾坤一帶尚有昔人耕種處及故渠灌田蹤跡圖拉等處現有大麥小麥非不可墾之地但霜降早晚不一樹穀宜否不同請於屯長中擇十餘人於明年三月遣往耕種俟秋收後具奏議政大臣等議如所請得 旨允行至七年振武將軍順承郡王錫保奏報鄂爾坤濟爾瑪台圖拉三處屯田收穫大麥小麥糜子共七千五百五十石有奇九年奏報一萬六千三十石有奇 十年開墾哈喇該圖地令兵民耕種工部侍郎原署西安巡撫馬爾泰言哈喇該圖為諸路隘口所會水草亦佳請撤額塞勒津城所駐步兵并發西寧馬步兵合二千人赴哈喇該圖詳閱耕種地方令兵丁開墾從之

通考

乾隆二年新定貴州苗疆督臣張廣泗請將逆苗絕產安設屯軍 上諭經理苗疆原以寧輯地方

並非利其田土豈忍收其田畝以給內地人眾不允所請後經王大臣議請令實在無人承認絕產

賞給屯田擇形勝建築堡牆以資捍禦又甘肅涼州府鎮番縣之柳林湖地自雍正十二年招集民

人屯墾至是墾地二千三百餘頃地既遠闊屯戶亦眾乃設立屯長總甲

通考

五年禁屯田私租與人者運軍額設屯田止許得當年租銀不得加租及立券預支其已經加租之田如力能回贖者卽退還價值別租不能贖者俟租滿日別租若指稱加租名色立券私交者將運丁及租田之人依私典軍田例治罪其田另給新丁仍追租價入官 六年令各省屯田定限一年

無論在軍在民一併清出歸軍贖運

通考

二十三年遣兵二千名赴哈喇沙爾等處屯田取海都河水灌溉增派烏嚕木齊屯兵

原派兵五百復增五百

增派副展魯克沁吐魯番托克三屯兵

托克三在吐魯番西百餘里通哈喇沙爾設屯兵五百名

五月又議增哈喇沙爾托克三

屯兵

前屯兵三千六百名至是增二千四百名合計六千名

上諭黃廷桂等曰現在辦理回部未竣屯田伊犁可以暫緩惟

於烏嚕木齊一帶及噶爾藏多爾濟游牧之羅克倫等處急宜相度地畝廣爲屯種俟將來酌量情

形由近及遠卽一二年後亦無不可六月侍郎永貴等奏報烏嚕木齊附近等處屯田開墾畝數哈

喇和卓墾地八千七百畝托克三墾地五千三百畝哈喇沙爾墾地四千餘畝合闡展所種萬畝計

新舊共五萬二千七百九十二畝又議墾穆壘至烏嚕木齊噶爾藏多爾濟游牧之昌吉羅克倫等

處屯田昌吉距烏嚙木齊六十餘里羅克倫距昌吉四十餘里昌吉可墾田八萬餘畝羅克倫可墾田七萬餘畝與穆曼等處均係噶爾藏多爾濟遊牧之地駐兵三千名合穆曼等處屯兵共
上諭據黃廷桂疏稱塔哩雅沁試種豌豆已有成效關展吐魯番托克三烏嚙木齊等處想皆

可試種著於明春佈種又 諭從前因辦理回部將伊犁屯田暫時停止今回部迎降相繼大功計

日可成則屯田自不可緩軍營綠旗兵丁駐防各城所用無幾應行派往伊犁并酌派回人令納穆

扎爾等辦理屯務或將魯克沁哈喇沙爾烏嚙木齊等處屯田兵移至伊犁再於內地派兵補缺令

兆惠等將應辦之事先時預備 二十五年命調巴里坤綠旗兵九百名赴烏嚙木齊屯田 諭阿

桂等奏稱伊犁河以南海努克地與固勒扎相隔一日程途水土沃衍請先行屯種相其形勢分立

村莊所辦甚是又奏准於伊犁自烏嚙木齊至羅克倫擇水土饒裕之處設村莊四每莊屯兵八百

餘名興舉伊犁海努克屯田副都統伊柱疏言官兵駐劄與屯田回人距二三里伊犁河南安臺五

處其屯田回人三百餘名約每距半里立一村共村十五均立牆垣基址俟農隙俾立室宇又駐劄

處有廟宇百餘間加以修葺可駐兵六七百名續經參贊大臣舒赫德請添派回人五百戶攜耨耕

種築伊犁海努克及察罕烏蘇城又築固勒扎大城凡大臣駐劄公署倉庫咸在大臣總匯之地 調喀什噶爾綠旗兵九

百十名赴伊犁屯田通典

阿桂等言葉爾羌回人續請移居伊犁者二百十四戶臣等量其年力精壯與從前移駐之一百十

戶共為二百五十戶給與籽種等項合經制屯田回人一千戶定為一千二百五十戶其老弱七十

四戶交該伯克養贍年幼者俟其長成仍可補屯田之缺再此項回人若俱令在河北固勒扎等處屯田亦尚可容但不如河南居住百餘戶則兩岸俱有莊屯於觀瞻更協因於和濟格爾伯克編設

一屯安插八十戶海努克編設一屯安插七十戶奏入報可 楊應琚等酌定新疆事宜凡回民自

種地畝視歲收糧數交納十分之一其承種官地歲收糧石平分入官總計各城回民自種地畝闕

展歲納糧四千五百六十五石哈喇沙爾納糧一千四百石庫車納糧九百六十石又另納地租糧

二十五石沙雅爾納糧五百六十石阿克蘇納糧六千八百三十五石五斗賽里木納糧九百七十

五石拜城納糧五百二十石五斗又另納糧三十石葉爾羌納糧二千八百帕特瑪每一帕特瑪合官斗五石三斗

納普爾錢四萬八千騰格每五十普爾為一騰格 每二騰格合為一兩所屬巴爾楚克納錢一千二百騰格克扣爾巴特

納糧九帕特瑪和闐納糧二千帕特瑪納錢二萬四千騰格喀什噶爾納糧四千帕特瑪納錢五萬

二千騰格又納官借籽種另冊糧六百九十二帕特瑪所屬伯爾格納錢四百騰格英阿薩爾納

糧五百帕特瑪承種官地庫車歲收額糧一千二百五十石沙雅爾三百七十五石阿克蘇五十石

葉爾羌一千二百二十一帕特瑪和闐六百四十帕特瑪喀什噶爾三十二帕特瑪通考

三十年總計綠旗兵屯田伊犁四屯地三萬六千畝塔爾巴哈台萬八千畝烏嚕木齊三營五萬千

三百二十畝景化城萬一千三百四十畝庫爾喀喇烏蘇四千畝晶河四千畝瑪納斯四千畝烏什

萬二千畝哈喇沙爾七千三十五畝巴里坤萬六千五百畝穆壘四千畝哈密所屬之材巴什呼四

千六十五畝塔哩雅沁七千三十畝招民承種地巴里坤四萬四千七百二十畝烏嚕木齊十萬二千八十八畝伊犁種地回民六千戶歲納九萬六千石

典通

三十七年陝甘總督文綬奏新疆屯田雖已廣闢而餘地尙多必須廣爲招徠因條具五事一招新疆商賈傭工之人就近認墾以省咨送一指明新疆地名道里情形曉諭戶民以期樂從一嘉峪關請每日辰關西閉以便商民一烏嚕木齊大路數丈請修治寬闊以利行旅一安西溝渠應疏濬暢流以益灌溉 諭下廷臣集議施行

通志

三十八年 諭裴宗錫覆奏查辦軍屯請將上江下江無爲等州十七州縣向不歸運之裁衛屯田加徵津費所辦非是而加徵之名更屬不能深體朕意朕惠愛百姓普調思免不下數千百萬惟期家給人足樂利永徵何獨因清釐屯糧欲舉百餘年相沿之民產一旦忽議加賦朕豈肯爲之且定以官爲加徵之名則斷乎不可尋 勅高晉查辦續結其江蘇省並 諭照此辦理浙江巡撫陳輝

祖疏請民屯新墾丁銀隨年攤徵 上諭國家承平休養百有餘年間閭閻生齒日繁向來編審人丁

按丁科則自康熙五十二年我 皇祖聖祖仁皇帝 特頒恩詔盛世之民永不加賦卽以是年丁糧之數作爲定額仰見 皇祖惠愛黎元法良意美實我萬世子孫臣庶所當遵守不易者朕臨御

以來仰承 天祐 祖德累治重熙無時不以愛養斯民爲念豈肯於丁糧區區毫末之賦稍存計

較乎況人數旣多自地無遺利若求可墾之地則惟新疆烏嚕木齊等處尙可招徠屯墾至於內地

即間有東坍西漲其數甚微祇須地方官照例妥辦若以新墾民屯地畝復將丁銀隨年攤納是與小民較及錙銖尤非惠下恤民之道所有各省辦理丁糧俱著悉仍其舊

通典

四十六年戶部議准成都將軍特成額等奏稱兩金用新疆辦理屯田原議駐兵六千名內以二千名種地每兵給牛一隻農具一副嗣於四十四年裁兵二千名留實兵四千名以二兵合種地一分仍需計用牛二千隻農具二千副至四十五年又奏裁兵一千名止留額兵二千名除各官養廉及公費空糧外止存實兵二千六百五十三名仍以二兵合種一分只應給牛一千三百二十六隻五分農具一千三百二十六副半應裁牛六百七十三隻五分農具六百七十三副半農具口外無可變價飭交各糧務收貯以備給民戶應用牛隻新疆稀少遇有倒斃各兵需自買補應將所裁之牛隻給兵牧放分作五年扣價歸款以此牛供陸續補額之用其價每隻牽算銀十兩五錢三釐七毫零共裁牛六百七十三隻五分應繳銀七千七十四兩二錢四分二釐自四十五年起分作五年扣繳應造入各年奏銷新收項下報部查核

通考

以上屯田

二十四史九通政典類要合編卷二百九十五

皇朝三

食貨 戶口

古者夫家之數稽於司徒生齒之版登於天府蓋有德而後有人即戶口之登耗可以徵治理焉而夫布口算之則亦國家惟正之供與田賦並列者也馬端臨通考戶口一門備載歷代戶口丁中賦役附以奴婢續考因之我朝土宇版章靡遠不屆國初立編審法以稽人民之數後定爲五年一舉丁增而賦亦隨之聖祖特頒恩詔自康熙五十年以後滋生人丁永不加賦天恩浩蕩亙古未有至直省丁徭多寡不等率沿明代之舊有分三等九則者有一條鞭徵者有丁隨地派者有丁隨丁派者後皆次第改隨地派俾無業之民永免催科之累加以列聖重光休養生息戶口之版日增月益自書契以來未有如今日之蕃衍者益以徵太平一統之盛超軼曩古也

直隸布政使司人丁每口科銀三分至二兩六錢五分七釐不等奉天府屬人丁每口科銀一錢五分至二錢不等江南江蘇布政使司人丁每口科銀一分四釐零至一錢零不等科錢五文零不等安徽布政使司人丁每口科銀五分至五錢一分九釐零不等鹽鈔小口每口科銀七釐四毫零山西布政使司人丁每口科銀一錢至四兩五分三釐六毫不等更名屯丁每丁科銀一錢至三錢零不等山東布政使司人丁每口科銀五分三釐九毫零至七錢八分零不等收併衛所

每丁科銀二錢至三錢五分零不等 河南布政使司人丁每口科銀一分至一兩二錢零不等收併衛所每丁科銀二分至一兩五錢零不等 陝西西安布政使司人丁每口科銀一錢 甘肅布政使司人丁每口科銀二錢 謹按舊會典西安等處民丁自四分四釐九毫至七兩三錢八分九釐不等鞏昌等處民丁自三分二釐六毫至八兩七錢七分八釐五毫零不等又有更名地收併衛所地監牧地其丁銀亦有多寡不同茲據新會典所載見行之例而附見舊例於此

浙江布政使司人丁每口科銀一釐至五錢七分二釐五毫不等科米二合三勺至三升三合零不等 江西布政使司人丁每口科銀三分二釐零至一兩三錢四分六釐三毫不等鹽鈔小口每口科銀二釐六毫至九釐五毫零不等 湖北布政使司人丁每口科銀一錢五分四釐四毫零至六錢四分三釐八毫零不等 湖南布政使司人丁每口科銀三分零至八錢三分五釐零不等 四川布政使司人丁每口科銀一錢二分零至五錢一分九釐一毫零 福建布政使司人丁每口科銀八分三釐九毫零至二錢九分一釐零不等鹽鈔小口每口科銀一分四釐七毫至一分八釐一毫零不等 廣東布政使司人丁每口科銀一釐九毫零至一兩三錢二分六釐零不等 廣西布政使司人丁每口科銀一錢五分零至四錢五分零不等 雲南布政使司人丁每口科銀三分至五錢五分不等 貴州布政使司人丁每口科銀一錢五分零至四兩零不等

順治十三年戶部議定賦役全書內惟江西福建廣東有婦女鹽鈔銀按口徵派不等他省無婦女

名色其鹽鈔銀均派地丁內仍照舊行康熙十一年議賦役全書內直隸有流寓人丁山西有久流近流人丁改爲實在人丁幼丁改爲新編人丁浙江等省婦女小口徭銀改爲食鹽鈔銀 謹按丁稅之法以貧富爲差分上中下三等其科銀之多寡各省不同就一省之內州縣又各不同又民丁之外別有軍丁屯丁匠丁竈丁站丁土丁漁戶寄莊丁寄糧丁諸名各有科則入 本朝以來屢有更定茲據會典舉其大略如此

凡天下戶口之賦亦曰徭里銀順治十八年統計直省徭里銀三百萬八千九百五兩有奇米二萬一千五百七十石有奇康熙二十四年銀三百一十三萬六千九百三十二兩有奇米一萬二千七百一十五石有奇雍正二年銀三百二十九萬一千二百二十九兩有奇米一萬二千七百九十四石有奇豆二萬六千一百五十石乾隆十八年丁銀三百二十九萬五千三百五十九兩有奇

俱勾入地糧內遇闕有加徵者有不加徵者各循成例

以上通考

國初定編審八旗人丁每三年一次凡各旗壯丁及已成丁者令各佐領稽查入冊隱匿者罪之其置買人丁及新成幼丁誤編入別佐領者退回初定壯丁三百名爲一佐領後改爲二百名至八旗新添壯丁每旗編佐領三十逃亡缺少者於諸王貝勒貝子等府壯丁內撥補又定家丁壯丁首先登城者准其開戶至旗員子弟俟十八歲登載部冊後方准分居

順治元年王師入關百戶危列宿上言天津到海避亂之民萬有一千餘戶宜令有司撫綏安插兵

部侍郎金之俊亦請論各鎮道臣招徠土寇歸順者悉令州縣編置牌甲於是制編置戶口保甲之法其法州縣城鄉十戶立一牌頭十牌立一甲頭十甲立一保長戶給印牌書其姓名丁口出則注其所往入則稽其所來寺觀亦給印牌以稽僧道之出入其客店令各立一簿書寓客姓名行李牲畜及往來何處以備稽察三年詔天下編審人丁凡軍民驛憲醫卜工樂諸色人戶並以原報冊籍爲定惟年老殘疾逃亡故絕者悉行豁免若一戶全不附籍及將他人隱蔽或隱瞞自己成了人口並增減年狀妄作老幼廢疾者分別罪之以上通典

命大臣訂正賦役全書因田定賦計丁投役舊有經制明季加派紛繁民生凋瘵世祖章皇帝定鼎後特命大臣察數款項益除濫額擬定賦役全書進呈御覽至十四年告成頒行天下茲後隨時修訂備詳舊制以現行者爲定則謹按取民之制有田則有賦有丁則有役而丁役分額差力差則有受役輸銀之不同其間分異等則派別名目皆役法也今考全書所載地糧自歸田賦人丁宜屬戶口惟是丁徭之征原係版籍供役而凡民役之在官者編徵工食召募應役其數具列於中優免復除亦在焉是故會典所載祇舉大綱考丁徭者惟全書可備稽云

又定編審人丁征徭科則編審之法核實天下丁口具載版籍年六十以上開除十六以上添註丁增賦亦隨之考直省丁徭有分三等九則者有一條鞭徵者有丁隨地派者有丁隨丁派者其後改隨地派十居其七總計直省徭里銀約三百數十餘萬亦間徵米徵豆其科則最輕者每丁科一分

五釐重者至一兩三四錢不等而山西有至四兩餘者鞏昌有至八九兩者大抵因地制宜如前代差役視民間物力爲輕重故各有不同三年或五年一編審凡所以平賦役清隱匿別老幼均差徭律有差遣不平賦役不均隱蔽差役逃避差役之目皆役法之條件也又有屯丁者明代衛所屯軍各給以地入 本朝除其軍籍改爲屯丁其後惟留駕運漕船之運丁其非運丁者陸續改入民籍現運屯丁則免科間丁各科銀不等皆免其民丁重派又三等九則之目沿自前明一條鞭征法亦同其法將均徭均費等銀不分銀力二差以一條鞭從事凡十甲丁糧總於一里各里丁糧總於一州縣州縣總於府府總於布政司通計一省丁糧均派一省徭役里甲與兩稅爲一凡一州縣丁銀畢輸於官官爲僉募以充一歲之役小民得無擾而事亦易集至康熙五十二年 恩詔以現在丁冊定爲常額續生人丁永不加賦雍正元年以後各省丁徭皆陸續攤入地畝惟編審人丁以供差役

五年令三年編審一次凡三年編審責成州縣印官察照舊例造冊以百有十戶爲里推丁多者十人爲長餘百戶爲十甲城中曰坊近城曰廂在鄉曰里各有長凡造冊人戶各登其丁口之數而授之甲長甲長授之坊廂里各長坊廂里長上之州縣州縣合而上之府府別造一總冊上之布政司民年六十以上開除十六以上增注凡籍有四曰軍曰民曰匠曰竈各分上中下三等丁有民丁站丁土軍丁衛丁屯丁總其丁之數而登黃冊督撫據布政所上各屬之冊達之戶部戶部受直省之

冊彙疏以聞以周知天下生民之數 十一年定外省流民附籍年久者與土著一例當差新來者五年當差十三年定五年編審一次 十七年令直省每歲底將丁徭賦籍彙報以戶口消長課州縣吏殿最 十八年總計直省人丁二千一百有六萬八千六百有九口

康熙元年令江南蘇松兩府行均田均役之法戶科給事中柯聳疏言任土作賦因田起差此古今不易之常法但人戶消長不同田畝盈縮亦異所以定十年編審之法則役隨田轉冊因時定富者無免脫之弊貧者無贏負之憂勞逸適均法至善也臣每見官役之侵漁差徭之繁重不一而足其源總由於僉點之不公積弊之未剔目下編審屆期請痛除宿弊以拯民困查一縣田額若干應審里長若干每里十甲每甲該田若干田多者獨充一名田少者申充一名其最零星者附於甲尾名曰花戶此定例也各項差役俱係甲長挨甲充當故力不勞而事易辦獨蘇松兩府名爲僉報殷實竟不稽查田畝有田已賣盡而仍報里役者有田連阡陌而全不應差者不特十年之中偏枯殊甚至年年小審那移脫換叢弊多端田歸不役之家役累無田之戶以致貧民竭骨難支逃徙隔屬請令撫臣通行兩府及今大造之時必期田盡落甲役必照田務將本區之田均役本區十甲倘本區田多則派入下區按田起役不得憑空僉報以滋賣富差貧之弊庶幾役均而民便矣其他花分子戶詭寄優免隔屬立戶買充冊書諸弊皆宜嚴加禁革戶部議覆通行 謹案均役之法時惟知書縣李復興行之最爲得宜各屬皆倣而行之因編爲均役成書沈荃序略曰書邑自均役以後流亡

復歸荒蕪曰墾鄰邑外省相繼取法所慮世俗昧於均役之義而議其無役且以爲師心而不法古夫三代之役軍旅土功而已夫子所謂使民以時王制所謂歲不過三日皆此役也并田廢而兵民分兵久無預於民若夫築城浚川則計田出費以供其事如近日吳淞之役豈非至均者哉若議里役不設則古之鄉長里正本非役也周之比長里宰皆下士閭胥鄉長皆中士旅師比師皆上士黨正縣正皆下大夫州長則中大夫此命官也豈役也哉漢去古未遠故亭長嗇夫聽獄訟收賦稅皆有祿秩張敞朱邑朱博薛宣之流由此至卿相隋人欲以鄉正理五百家獄訟李德林謂鄉官治民恐徇私不便唐時此意未泯故柳宗元言有里胥而後有縣大夫有縣大夫而後有諸侯有諸侯而後有方伯連帥是里胥與連帥貴賤雖殊而皆爲天子任理民之責者也宋開有比較鞭笞破家亡身者也唐末大亂諸節帥多出羣盜所用守令視民如仇而用之曰新由是鄉里之職大爲民困此豈古所謂役哉五代因循至宋未改或差役或雇役或義役皆能困民然弊則改之初無定轍元時賦最輕故役亦輕而民多富明室賦重縣令催科難徧故分編里甲使之催賦俗曰經催是役之設爲催賦設也賦辦則役舉矣今均田之法家自催賦無不辦之賦是卽無不舉之役豈必辦賦之法歲其數百家幾數百命而後謂之役哉向之有役有不役故見其役今也卽賦爲役故不見其役若始議其無役此正如對和羹而別索鹽梅多見其不知味也若謂以田從人爲非則向者以人從田圖盡圖書爲政而官與民交受其害今之以田從人業戶自爲政而官與民交受其利行且徧此法

於吳越間雖百世可也

以上通考

四年令佐領內丁多至百名以上願分兩佐領者雍正十三年八旗每佐領編壯丁一百三十名餘丁彙集另編佐領或所餘丁僅百名以上不足額者該旗王貝勒貝子公等併都統副都統佐領酌驗無誤披甲當差者出結移送部亦准編入佐領

二十四年天下人丁二千三百四十一萬七千四百四十有八口二十五年以原定編審限期太寬民人等候無期胥役得以任意作弊乃更定一年歲底彙報明年又令編審缺額人丁該撫臣陸續招徠於下次查編補足

以上通志

三十六年以浙江匠班銀派入地丁徵收浙江省匠班一項戶籍雖在人丁已絕其實徵銀七千四百九十餘兩令均派於通省地丁下帶辦至三十九年湖北匠班銀歸入地丁四十一年山東匠班銀歸入地丁均照浙江之例 謹按匠丁沿自故明歷年已久止存戶籍或派民戶代完或有司自行賠補至是始議派入地丁嗣後丁隱地派之例實肇於此

通考

五十年直省人丁二千四百六十二萬一千三百二十四口於前未甚加增 上以承平已久滋生日繁而有司編審時不將所生實數開明具報者特恐加增錢糧是以匿隱乃 諭大學士等曰民之生齒日繁朕故欲知人丁之實數不在加徵錢糧也嗣後祇將見今錢糧冊內有名丁數弗增弗減永爲定額以後所生人丁免其加增錢糧但將所增實數另造清冊具報尋定自康熙五十年額

定丁冊數外新增者補足舊額開除缺數其餘謂之盛世滋生人丁永不加賦至六十年直省人丁二千五百三十八萬六千二百有九口內滋生人丁不加賦者四十六萬七千八百五十口 通志

雍正元年令直隸所屬丁銀攤入地糧內徵收直隸巡撫李維鈞言直隸地方丁銀請隨地起徵戶部議如所請 上復令九卿詹事科道集議九卿等言應令該撫確查各州縣田土因地制宜作何

均攤之處分別定例俾無地窮民免納丁銀之苦有地窮民無加納丁銀之累 上曰丁隨地起一事九卿不據理詳議候違瞻顧皆由迎合上意起見卽如本內有地窮民一語既稱有地何謂窮民

不與有米餓卒之語相似乎著仍照戶部議行尋議定直隸每地賦銀一兩攤入丁銀二錢七釐有奇嗣是各省計人派丁者次第改隨地畝矣 福建丁銀雍正二年攤入地畝徵收每地賦銀一兩

攤入丁銀五分二釐七毫至三錢一分二釐零不等屯地每兩徵丁銀八釐三毫至一錢四分四釐八毫零不等 山東丁銀雍正三年攤入地畝徵收每地賦銀一兩攤入丁銀一錢一分五釐其新

墾地俟升科後遇五年編審之期合計新舊地糧按數攤減各就一縣之地均算 河南丁銀雍正四年攤入地畝徵收每地賦一兩徵丁銀一分一釐七毫零至二錢七釐零不等嗣後有報墾升科

將丁銀隨年均派 浙江丁銀雍正四年攤入地畝徵收每田賦一兩徵丁銀一錢四釐五毫不等

陝西西安所屬丁銀雍正四年攤入地畝徵收每地賦銀一兩徵銀一錢五分三釐遇閏每兩加

徵四釐零 甘肅丁銀雍正四年議河東地糧輕而丁多河西地糧重而丁少不能一例攤派合河

東每銀一兩攤入丁銀一錢五分九釐三毫零遇閏加徵一分五釐四毫零河西每銀一兩攤入丁銀一分六毫零遇閏不加徵 四川丁銀向係以糧載丁徵收惟威州等十一州縣丁地分徵雍正四年議亦令以糧載丁每糧五升二合至一石九斗六升零不算人丁一丁徵收 雲南丁銀雍正四年攤入地畝徵收其屯軍丁銀將隱匿田地清查漸次抵補 江蘇安徽丁銀雍正五年攤入地畝徵收其屯丁銀亦攤入屯衛田內徵收每畝徵丁銀一釐一毫至六分二釐九毫零不等其匠班銀三千八百餘兩亦令攤入地糧內 江西丁銀雍正五年攤入地畝徵收每地賦銀一兩徵丁銀一錢五釐六毫屯地每兩徵丁銀二分九釐一毫零 湖南丁銀雍正六年攤入地畝徵收每地賦糧一石徵丁銀一毫四絲至八錢六分一釐零不等 廣西丁銀雍正六年攤入地畝徵收每地賦銀一兩徵丁銀一錢三分六釐零不等 長蘆利民等場竈丁銀雍正六年攤入地畝徵收每地徵銀六釐至一分不等 湖北丁銀雍正七年攤入地畝徵收每地賦銀一兩徵丁銀一錢二分九釐六毫零惟江夏嘉魚漢陽漢川孝感蘄水黃岡黃梅廣濟鍾祥潛江沔陽天門荊門江陵石首監利松滋襄陽十九州縣向有重丁銀除抵減豁免外所攤入銀數多寡不等 山東永利等場竈丁銀乾隆二年攤入地畝徵收每畝徵銀一分四毫零 謹按丁隨地起之例廣東四川諸省先已行之至雍正元年准撫臣之請行於畿輔而各省亦多效之惟奉天府以民人入籍增減無定仍舊分徵而山西省至乾隆十年始議參用攤徵分徵之法蓋因地制宜使有田之家所加者無多而無

業之戶利益者甚大洵法良而意美也

又令山西等省之樂戶浙江之惰民俱除籍爲良山西等省有樂戶一項其先世因明建文末不附燕兵被害編爲樂籍世世不得自拔爲良民至是令各屬禁革俾改業爲良又浙江紹興府之惰民與樂籍無異亦令削除其籍俾改業與編氓同列至五年以江南徽州府有伴當寧國府有世僕本地呼爲細民其籍業與樂戶惰民同甚有兩姓丁戶村莊相等而此姓爲彼姓執役有如奴隸究其僕役起自何時則茫然無考非實有上下之分 特諭開除爲良民八年以蘇州府之常熟昭文二縣丐戶與浙江惰民無異准其削除丐籍

以上通考

四年諭上三旗定設漢軍四十佐領王五旗定設漢軍三十佐領又令八旗都統及直省駐防都統將軍等將新舊壯丁逐戶開明並編審各官姓名保結送部除人丁驗實准其開除

通典

又定冊民察民照保甲之例江西浙江福建三省各山縣內向有民人搭棚居住種麻種菁開爐煬鐵造紙做茹爲業謂之棚民令照保甲之例每年按戶編查責成地主并甲長出結呈送州縣官據冊稽查倘居住分散不論棚數多寡自爲一甲互相稽查內有已置產業并愿入籍者俱編入土著一體當差至一邑中有四五百戶以上者該管官卽於棚居鄉莊內選立保長專司巡察其棚民有願回籍者聽又廣東省窮民有入山搭寮取香木春粉砍柴燒炭爲業者謂之寮民亦令照保甲之法每寮給牌一令互相保結寮內遇有遷移增減令將牌赴縣添除擇老成謹慎者爲寮長聽其鈐

東如有藏匿奸宄容隱不報者事覺連坐凡業主召佃搭寮必將寮丁報官或係官山必赴官報明查驗方准搭寮違者罪之通考

五年定編審丁冊每戶書另戶某人某官無官者則曰閑散某上書父兄官職名氏旁書子弟及兄弟之子及戶下若干人或籍或他往皆備書之其各省駐防旗員兵丁以及外任文武各官子弟家屬俱行文各該將軍督撫查明造冊咨送該旗附入佐領冊內其後又定八旗正身壯丁年十五以上該管官查無假冒方准入冊其或流落鄉屯向未入丁冊者令補入冊內通志

七年諭粵東有登戶以船爲家捕魚爲生齒繁多粵民視爲卑賤之流不容登岸居住登戶亦不敢與平民抗衡踰躑舟中終身不獲安居之樂登戶本屬良民且輸納漁課與民相同安得因地方積習強爲區別著有司通行曉諭凡無力之登戶聽其住船自便如有力能建房搭柵者准其於近水村莊居住與齊民一同編列甲戶以便稽察不得欺凌驅逐通考

諭八旗漢軍其初本係漢人有從龍入關者有定鼎後投誠者有緣罪入旗與外藩戶下歸入者內務府王公包衣撥出者以及召募之職手過繼異姓并隨母因親等類先後歸旗情節不一其中惟從龍人員子孫皆係舊有勳無容另議更張其餘各項人等或有廬墓產業在本籍者或有族黨姻屬在他省者朕欲稍爲變通以廣其謀生之路如有願改歸原籍者准其與該處民人一例編入保甲有願外省居住者准其前往此內如有世職仍許其承襲不願出旗者聽之所有願改歸民籍

及願移居外省者限一年內具呈本管官查奏如此屏當原爲漢軍人等生齒日多籌久遠安全計出自特恩後不爲例此朕格外施仁原情體卹之意非遜伊等出旗亦非爲國家糧餉有所不給可令八旗漢軍都統等詳晰曉諭八年又諭前降諭旨八旗漢軍人等有願改歸民籍及移居外省者准其具呈本管官查奏原指未經出仕及微末之員而言至於服官既久世受國恩之人其本身及子弟自不應呈請改籍朕亦不忍令其出旗嗣後文職自同知等官以上武職自守備等官以上不必改歸民籍

通典

乾隆三年定旗人開戶例凡八旗奴僕原係滿洲蒙古直省本無籍貫帶地投充人等雖有本籍年遠難考均准其開戶不得放出爲民四年又議國初俘獲之人年分已遠及印契所買奴僕之中有盛京帶來帶地投充之人係旗人轉相售賣均應開戶不准爲民又八旗戶下家人有本生念其世代出力准令開戶者亦准其開戶又議乾隆元年以前八旗家奴經本主放出已入民籍者准其爲民若係乾隆元年以前放出至元年以後始入民籍者令歸旗作爲原主戶下開戶壯丁至於贖身之戶均歸原主佐領下作爲開戶

通考

五年戶部奏言每歲造報民數若俱照編審之法未免煩擾直省各州縣設立保甲門牌土著流寓原有冊籍可稽嗣後只將土著造冊申報可得戶口實數從之

通典

六年復定八旗造丁冊之例凡各佐領下已成丁及未成丁食餉之人皆造入丁冊分別正身開戶

戶下於各名下開寫三代履歷其至外省駐防暨外任文武官子弟家口先期行文該管大員照式造冊二本咨部一留部一付該旗覆核附入各佐領冊內又定八旗開戶養子因出兵陣亡及列軍功一二等改爲另戶者別記檔案 國初投充俘獲入旗及旗人抱養爲嗣或民人因親八旗或良民隨母改嫁入於他人戶下或旗奴開戶與旗奴過繼與另戶爲嗣已入另戶檔內後經自行首名者亦別記檔案不得與宗室聯姻 通志

十一年停止江西婦女編審

江西向有鹽鈔一項分給小戶計口納鈔行十四年總計直省人丁共編審婦女之法後鹽鈔亦攤入地糧故停止

三千六百二十六萬一千六百二十有三戶丁萬有七千七百四十九萬五千三十有九口 通典

二十二年更定保甲之法自順天府五城所屬村庄暨直省州縣鄉村每戶歲給門牌書家長姓名生業附註了男名數不及婦女十戶爲牌立牌長十牌爲甲立甲長十甲爲保立保長凡甲內有盜竊邪教賭博賭具窩逃姦拐私鑄私銷私鹽踴餉販硝斂財聚會等事及形迹詭祕之徒責令專司查報無論紳矜之家與齊民一體聽保甲稽查其客民在內地貿易者與土著一例順編其商賈來往無定者責成客長鹽場井竈另編排甲責成場員礦廠丁戶責成廠員各處煤窯責成僱主山居棚民責成地主其濱海商漁疍隻與內洋採捕小艇取具澳甲族鄰保結河內船隻責成埠頭漁船網戶及水次搭棚趁食之民歸就近保甲管束其邊外種地民人亦設牌頭總甲家長查察其甘省番子土民責成工司其寺觀僧道責成僧綱道紀其外來流丐保正督率丐頭查察其旗民雜有村

庄苗疆寄籍內地外省入川民人與雲南夷民雜處者同土著一體編入保甲是年總計天下人丁共一萬九千三十四萬八千三百二十八口至二十九年天下人丁共二萬五百五十九萬一千一

十七口

通志

二十四年定八旗戶下家人贖身例凡八旗戶下家人不論遠年舊僕及近歲契買奴僕如實係本主念其數輩出力情愿放出爲民或本主不能養贍愿令贖身爲民者呈明本旗咨部轉行地方官收入民籍不准求謀仕宦至伊等子孫各照該籍民人辦理倘有借他人名色認買私自出旗或將子孫改姓潛入民籍者照例治罪斷歸本主有鑽營勢力欺壓幼孤贖身爲民者倍追身價給主將人口賞給各省駐防將軍副都統爲奴如係本身得銀放出潛入民籍者止科其不行呈報之罪仍准爲民

通考

二十六年定漢軍爲民之例凡八旗漢軍現任外省文職自同知以上武職自守備以上京員自主事以上旗員五品以上俱不准改籍其父在旗而子願爲民或子在旗而父願爲民亦不准改籍其餘願出籍者在京報明該旗在外呈明督撫咨送編入民籍准一體考試

通志

二十九年嚴軍籍捏冒民籍之禁漕運總督楊錫綬言軍民戶籍不同既隸軍籍卽應聽食辦運乃各衛所宦家富戶或將本有屯田轉售於人而專置民產或應試報捐俱冒民籍進身或將族譜老軍之名預行移改或將衛所舊存案卷會斷爲軍者潛行抽減歷年既久不復報食卽經同運軍丁

三四五之進正里委身有... 卷之二
上報而紛紛辨訴州縣等官或礙情面或辦理粗疎斷爲是民非軍衛所官弁莫可如何伏查漕運各丁除應得隨運屯田外造船則有官價在家則有月糧在途則有行糧兼有漕賄漕截等銀責其辦運況官家富戶即使承認一丁原可令族中子侄或知事家人代辦不必己身親行今有力者以計免僉而所僉皆無力之疲丁殊未平允應請嗣後凡隸軍籍之官家富戶徑行僉報如有捏控狡辨者治以應得之罪得旨允行

三十三年御史張光憲奏請設立大姓族長 論曰民間戶族繁甚其中不逞之徒每因自恃人衆滋生事端向來聚衆械鬪各案大半起於大姓乃其明驗惟在地方官實力彈壓有犯必懲以靖羣凌之習政體不過如是若於各戶專立族長名目無論同宗築鷲子弟未必遽能受其約束甚者所主非人必至藉端把持倚強鋤弱重爲鄉曲之累正所謂杜弊轉以滋弊也張光憲所請不可行

謹按雍正四年有選立族正之例本因苗疆村堡聚族滿百人以上保甲或不能徧查乃選族中人品剛方者立爲族正以稽察匪類蓋因地制宜非通行之制也若大姓皆立族長反滋弊端 睿慮精詳是在守土者遵奉力行自可化置凌之習云爾

以上
通考

三十六年定例籍桑戶情民蠻戶九姓漁戶丐戶等報捐應試例自改業之人始下逮四世本族親支皆係清白自守者准報捐應試是年總計直省人丁二萬一千四百六十萬三百五十六口三十七年諭據李翰奏請停止編審造冊一摺所見甚是令丁銀皆攤入地糧而滋生人戶又欽遵康熙

五十一年 皇祖思旨永不加賦則五年編審原屬具文無裨實政況各省民數細數俱經該督撫於年底專摺奏報戶部核實具題付之史館紀載是戶口之歲增繁盛俱可按籍而稽更無藉五年一次之另行查辦徒滋紛擾著永行停止 通典

將軍增海等具奏 盛京各佐領下所有馬甲多寡不等請裁馬甲添設步甲其餘剩錢糧併隨缺地畝入於正項報銷經軍機大臣會同該部覆准具奏 諭盛京額設馬甲並隨缺地畝皆爲養贍該處滿洲而設今年久生齒日繁若將伊等應得分例裁汰入官於伊等生計殊屬無益如現在京中入旗戶口繁盛生計不無拮据經朕特沛恩施另賞餘寡孤獨錢糧以資生理其派往西安涼州莊浪寧夏兵丁俱令照所派之額在京挑補又添兵缺甚多每年帑金不下數萬並無吝惜盛京滿洲皆朕臣僕人丁日盛自宜酌量添給豈有轉將伊等現在應得分例裁汰之理今各佐領下馬甲額設不均固宜均行辦理但此項裁汰錢糧地畝亦宜斟酌養贍多人或添設步甲或作爲養育兵俾衆人均沾實惠著將此項裁汰之馬甲三百六十名錢糧交增海等或添設步甲或添設養育兵惟期普被恩施辦理具奏其隨缺三百六十晌如何使衆人均有裨益之處並著增海等定議具奏將此通諭中外示朕優恤滿洲至意嗣經將軍增海等奏裁汰馬甲應添步甲三百八十八名仍照原奏添設外餘剩銀二千六百一十六兩請添設每月食五錢錢糧養育兵四百三十六缺分給八旗滿洲蒙古漢軍各佐領下仍按餘寡孤獨人等之多寡酌量添設以資養贍又請裁汰隨缺地畝

租銀六百三十四兩零每年賞給步甲三百九十六名每名銀一兩六錢置買皮襖穿用共步甲一千一百八十八名三年內可以均沾實惠嗣後隔二年各兵可得皮襖一件又請將現議養育兵內勻出一百四十分錢糧賞給 盛京官學生以資學習於造士實有裨益經部議得 旨允行 通考

三十八年禁各省增攤新墾民屯地畝丁糧時浙江巡撫陳輝祖疏請將新墾丁銀隨年攤徵部臣議准并請令各省督撫就本省情形酌籌疏奏 上以戶口繁滋自地無遺利安得復有未闢之曠

土廣爲墾種墾科即或瀕河沿海之區間有東坍西漲其數甚微若以新墾民屯地畝復將丁銀隨年攤納是與小民較及錙銖尤非惠下卹民之道 諭令直省辦理丁糧悉仍其舊毋庸另議更張

四十一年總計直省人丁共二萬六千八百二十三萬八千一百八十一口 通典

四十四年軍機大臣等議覆 盛京將軍福康安奏 盛京旗人並旗下家奴攜帶眷口在吉林地

方種地共四十戶一百八十二名口內除正身旗人仍解回本處照例辦理其 盛京兵部工部內

務府之壯丁並王公宗室之家奴及旗下家奴請入於吉林官莊耕種納糧當差并飭該管官嚴加

約束毋許滋事如再有犯逃者獲日不論次數刺字發駐防兵丁爲奴等因奉 旨盛京吉林均係

國家根本之地境壤毗連盛京旗人有潛往吉林種地謀生本無關礙並非逃旗可比從前弘昫奏

請解回治罪之處所辦原屬過當伊等皆滿洲世僕盛京吉林有何區別其正身旗人六戶卽著入

於吉林當差毋庸解回盛京辦理餘依議 軍機大臣議覆黑龍江將軍富玉等奏黑龍江各城地

方歷年由部發遣人犯隨來子女內有聯親生子又旗人內挑取兵丁得力者放出另行居住至今各城滋生共四百二十九戶詳訊伊等有情願回籍者四十二戶勒催起程有不曉原籍及另住旗人家奴等此二項人若歸一處不能管理難保其不滋事端請於此二項三百九十七戶五百三十六名內減半揀選壯丁在於齊齊哈爾黑龍江城墨爾根各官莊每年照例交糧各官莊設立領催一二名餘人入於各城舊官莊冊內以便挑補壯丁缺從之

四十八年 諭向來滿漢官員人等家奴在本主家服役三代實在出力者原有准其放出之例此項人等既經伊主放出作為旗民正身亦未便絕其上進之階但須明立章程於錄用之中仍令有所限制嗣後此等旗民家奴合例後經該家主放出者滿洲則令該家主於本旗報明咨部存案漢人則令該家主於本籍地方官報明咨部存案經部覆准後准其與平民一體應考出仕但京官不得至京堂外官不得至三品以示限制著為令

古今戶口之數三代以前查遠莫考通典載夏后成康之盛口數僅千三百餘萬要亦後儒以意揣之未足深信三代以下有天下長久者莫如漢唐宋明拓地最廣者莫如元今以史志人戶之數考之西漢則千二百二十三萬三千六十二後漢則千六百七萬九百有六唐則九百六十一萬九千二百五十四宋則二千一萬九千五百元則千三百四十三萬三百二十二明則千二百九十七萬二千九百七十四皆舉當時極盛之數然猶不逮我 朝之繁庶其故何也蓋自 太祖 太宗龍

興東土卽以不嗜殺人爲本 世祖承明季寇亂之後人歸 眞主遂定鼎京師命將四出數年之間海內一統窮鄉僻裔咸登戶版曾未有兵戈蹂躪之苦嗣是 聖祖 世宗暨我 皇上聖聖相承休養生息若保赤子撫之者至厚教之者至周百餘年來丁男不知兵革之患亭障從無烽燧之警而且年豐人樂無有天札疵癘轉徙顛踣以至凋耗者祖孫父子生育繁衍迄於雲初永爲太平之民是以乾隆元年以來直省生齒之版登於天府者較漢唐宋元明之極盛且增數倍之多而八旗之壯丁外藩之臣庶新闢之版章尚不在此數焉而我 皇上宵旰憂勤軫恤民隱所以富而教之者益詳且備自今以始丁中黃小之數歲有增益至於不可紀極猗歟盛哉

以上通考

謹案通考戶口後有職役一門通典通志丁徭合爲一事悉隸戶口蓋以 本朝役法歸入地丁不必別立門目也恭讀乾隆二十一年 諭云我朝輕徭薄賦凡屬編氓本無公旬徭役偶有興作皆勤幣予值初非額外差派又 諭云我朝百年以來從無公旬徭役寬大之 詔澤偏瀛壖固非漢唐以來諸朝所能擬其萬一也茲輯欽遵 聖訓併循典志體例省職役一門卽以役法諸條併入戶口蓋猶馬考續考於戶口門中備載賦役之意而與通典通志之例尤斟酌畫一云

二十四史九通政典類要合編卷二百九十六

皇朝四

食貨 錢幣

自上古刀布之用一變爲九府圜法厥後輕重代殊而肉好之式未之有易於以權百物之貴賤通
農末之有無錢之所闕誠鉅矣顧利之所在弊亦隨之錢重則姦民盜銷以牟利惜銅愛工則又以
薄惡而僞鑄易興有天下者操利人之柄求酌中之宜惟在用人用法有以持其弊而已歷代錢法
之得失具詳馬考及五朝續考中我太祖太宗龍興東土創制顯庸卽已鑄有錢文以資民用
逮定鼎燕京以來列聖相承府事允治內而寶泉寶源之設輕重協宜圖函精好外則各省局爐
座或設或停隨時調劑而又定官司之監理以專責成配分兵餉之支以廣流布務使有遠近通行
之利而無奸民翫法之弊經畫周詳並足垂諸永久邇者西陲底定式廓版章復頒錢式於回部各
城開鑄天朝乾隆通寶錢俾荒服之人咸昭法守斯尤大同之郅治已若夫鼓鑄所需首在採銅
山礦所開海航所市歲以數千百萬計若錫若鉛亦各隨所產京省諸局悉取給焉其收買有時其
運輸有限權衡定制中外交資求之漢唐錢制極善之時未聞意美法良有如此者也至馬氏敘錢
而兼及於幣蓋古者錢亦稱幣而尚不足以盡幣管子稱三幣而刀布爲下則凡可以通功易事利
民權物者皆可以幣例之也三代以後珠玉但爲器飾而不以爲幣皮幣惟漢武一行之龜貝惟王

莽一行之元明時雲南行使貳子以之折賦尚沿貝貨之遺逮鼓鑄既興而海貳之用久廢若乃自宋以來兼用楮幣其制起於交子會子而金元明稱之曰鈔原其始亦以鹽茶券引之屬視之而暫以權錢行之既久乃即以當錢論者謂以虛代實民不寶貴 國家錢貨充盈而無藉乎鈔法之用故順治年間雖暫用之而旋即停止則亦非今日通行之幣也夫幣之堅而可久者莫過於金金有三品或黃或白或赤而錢特居其一周制黃金方寸而重一觔國語註虞夏商周黃金爲上幣銅錢爲下幣漢書秦并天下黃金以鑑名者爲上幣銅錢識曰半兩爲下幣漢代復以觔名金用金多以千萬觔計蓋其時但以黃金爲幣若白金之用惟漢武之白選王莽之銀貨一見於史而後亦漸廢固不皆以爲幣也魏晉以後金曰少而昂幣始專用錢六朝迄唐交廣之域以金銀爲幣然止限於一隅至金時鑄銀名承安寶貨公私同見錢用此以銀爲幣之始前明中葉令各處稅糧得收納白金而銀之用益廣我 朝銀錢兼權實爲上下通行之幣故凡銀色之高下與銀直之輕重並附編於左

通考

錢幣之制漢之五銖唐之開通差爲得中其餘非失之太輕卽失之過重而積幣叢生有不可究詰者及前明官鑄漸輸私錢日甚至熹懷時而其弊極矣我 國家法制詳備府事修和泉貨流通盡善無弊自 隆興之初卽鑄錢二品迨 定鼎燕京內則設寶源寶泉一局於 京師外則開局鼓鑄於直省輪郭肉好輕重適中邇自西陲底定開局於葉爾羌阿克蘇等城遵式改鑄荒陬僻壤一

體流通錢法之盛超越前古至於金銀交鈔之屬均以濟錢之不足而銀錢互權實爲上下通行之幣以故輸納國用惟以銀錢兼收而鈔法遂永行停止若夫開採銅鉛轉輸撥濟其所以籌鼓鑄之

需者實詳且盡焉

通志

天命元年鑄天命通寶錢丙辰春正月諸貝勒等具表上 太祖尊號建元天命尋開局鑄錢二品依古九府圖法制之輪郭外周鑄面作字陽起一爲 國書滿文一漢字曰天命通寶其滿文一品錢質較大 謹按 太祖己亥年二月始 命以滿洲語製爲 國書嗣後議開金銀礦及鐵冶蓋五金之利已由此肇興逮建元天命以後卽以滿漢字分鑄制錢迄今圖法流傳中外臣民共珍爲重寶謹依舊制首載是編仰見我 朝開國之初所以裕國而利民者規模宏遠矣

天聰元年鑄天聰通寶錢時 太宗文皇帝御極改元天聰亦鑄錢二品一爲滿文一漢字曰天聰通寶大小各如舊制

順治元年置戶部寶泉局工部寶源局鑄順治通寶錢時 世祖章皇帝定鼎燕京令置寶泉局屬於戶部寶源局屬於工部各並鑄制錢文曰順治通寶用漢字每文重一錢寶泉局歲鑄錢解交戶部庫配銀給發兵餉以戶部漢右侍郎一人督理京省錢法滿漢司官各一人監督局務每年掣差設局大使一人寶源局歲鑄錢解交工部節慎庫以備給發各工之用錢法亦掌於漢右侍郎置滿漢監督官三人專司出納設局大使一人餘制與戶部同尋戶部議將順治通寶錢式頒發各省鑄

有應需鼓鑄者令定議開局 謹按唐宋鑄錢之所皆稱爲監元時亦稱爲司其稱爲局者仍明制也明代直省鑄局皆得稱寶泉寶源 本朝惟京局稱之其開鑄之期曰卯宋以後始有畫卯點卯之名蓋取其時之早相沿既久遂以一期爲一卯至計錢之數自漢以來曰貫亦曰緡前明或以錠計每五千文爲一錠今以錢千文爲一串猶之貫緡之義云

二年定錢制每文重一錢二分先是工部侍郎葉初春以制錢每七文準銀一分錢價日增民未稱便請頒鑄當五當一錢以便民用不允至是戶部議言錢文尚輕應更舊制每支重一錢者爲一錢二分凡七文準銀一分舊錢以十四文準銀一分官以此徵收民以此輸納聽便行使從之 謹按錢之輕重古以銖與銖黍計今以錢與分釐計蓋分釐之數古者但以爲度名而不以爲權名權之爲數則十黍爲銖十銖爲銖二十四銖爲兩自太公圖法輕重以銖漢以後每以銖之數鑄於錢文唐開元通寶爲二銖四銖積十錢重一兩是每文爲今之重一錢後人以爲繁而難曉故十分其兩而代以錢字蓋宋之前已然考宋太宗淳化二年詔定稱法其時以太府權衡但有一錢至十釐之數乃別爲新制以御書三體淳化錢較定實重一銖四銖爲一錢就黍銖參之度尺以忽絲毫釐各積分爲一錢之則然後制取等稱新制既定中外以爲便是則十釐爲分十分爲錢之計數始於宋時所謂錢者即借錢幣之錢以爲數名所謂分釐者即借度尺長短之名以爲輕重之名也若夫古之稱法至後世而加重隋文帝鑄五銖錢重如其文而每錢一千重四釐二兩則古稱三釐爲隋

一劬而少隋書亦謂開皇以古稱三劬爲一劬孔穎達左傳正義謂周隋稱於古三而爲一杜佑通
典謂六朝稱三兩當唐一兩今以古稱三之一約之則漢之五銖錢止當今七分而弱而今之重一
錢二分者實爲古八銖有贏此固權法相沿之不同亦可見今之鼓鑄其不愛銅而不惜工實更勝
於古焉

四年更定錢直戶部議定制錢行使原係每七文準銀一分錢價既重小民交易不便應改爲每十
文準銀一分永著爲令 謹按錢與銀相權而行欲求錢法之流通必先定錢直之高下錢無定直
則鋪戶之倒換者得以操其重輕私家之居奇者得以伺其贏縮錢價無準而物價亦失其平自漢
以來銀尚未爲通用之幣故銀錢相權之直前史多未及詳大抵古者金銀視後世較賤而銅錢視
後世較貴漢書食貨志漢武鑄白金三品龍文白選重八兩直三千馬文直五百龜文直三百所謂
白金者雜銀錫爲之既非專用眞銀而其時以縣官空乏聊造以贖用不可據以爲準故重八兩者
直三千而六兩四兩者止直五百三百則知當日原未嘗以白金之重與銅錢相較而平其直也新
莽時黃金一劬直錢萬銀八兩爲一流朱提銀一流直錢一千五百八十他銀一流直錢千以古稱
比後世三之一計之金一劬實爲今五兩有奇而直止萬銀八兩實爲今二兩八錢有奇而直止千
有奇及千則漢時錢貴可見而金價但五倍於銀則以金多而易得也宋眞宗嘗論咸平中金兩五
千銀兩八百是金銀之直已較貴於漢自鈔法盛行而錢價益無定準金時每銀一兩折錢二貫則

銀直又過昂明代錢互有貴賤每銀一錢直五十五文至百文不等又有京錢外省錢多寡之異宋季至銀一兩易錢五六千文而錢法大壞我朝定鼎之初議以銀一分爲錢七文是年更定每分爲十文以爲定例嗣後屢經申明其令其囤積官錢者有禁與販攙和小錢者有禁偶遇錢價稍昂復多方調劑以平其直務使轉移出入上握其權交易流通下收其利誠爲酌中便民之利也以上通考又令山西省及密雲薊宣大同延綏臨清等依式開局旋又開盛京江西河南湖廣省會及湖廣之荊州常德二府鑄局其有囤積官錢攙和小錢者申令禁止通典

五年開江南之江寧府鑄局停盛京延綏二局六年移大同局於陽和城開浙江福建山東各省鑄局七年開湖廣襄陽鄖陽二府鑄局通志

八年增定錢制每文重一錢二分五釐戶部議言錢爲國寶務厚且大始定制每文重一錢繼重一錢二分猶嫌其輕應每文改鑄重一錢二分五釐仍照定制以每錢百文準銀一錢從之又行鈔貫之制是年始造鈔一十二萬八千一百七十二貫有奇自後歲以爲額至十八年卽行停止謹按鈔法始於宋之楮幣至明代鈔以桑穰故紙爲之外爲闌紋中圖錢貫之狀並印貫例文字於其上民間僞造者有禁原以濟錢法之窮也順治初年經費未定用度浩繁是歲世祖章皇帝親政之始先以國帑未充特命發內庫銀支給官俸等項嗣復倣明舊制造爲鈔貫與錢兼行蓋金元以來鈔法之弊在於錢不勝鈔鈔旣日多錢行日少於是鈔輕物重終至壅格而法遂以窮明臣邱

濬所謂鈔法不可行以用之者無權也 國初制鈔甚少其上下流通仍以銅錢故暫行之而無弊嗣後旋即停罷夫抵自宋迄明於銅錢之外皆兼以鈔爲幣 本朝始專以銀爲幣夫因穀帛而權之以錢復因錢之艱於齎運而權之以幣鈔與銀皆爲權錢而起然鈔虛而銀實鈔易昏爛而銀可久使鈔難零析而銀可分用其得失固自判然前代恐鈔法之阻滯并銀與銅錢而禁之至於用銀者以奸惡論以錢交易者掠治其罪亦爲不揣其本末矣然則錢與幣之各得其宜固無有逾於我朝者也

又議令各布政司止各開一局餘俱停止戶部議言見在鑄局過多民易盜鑄爲好應行裁減於各布政司使駐劄之省城止留一局鼓鑄其餘各鎮及湖廣之荊州常德襄陽鄖陽府等局一概停止從之

十年復開密雲薊宣府陽和臨清等鎮鼓鑄局先因各省鎮局過多定議裁減至是以錢用日廣錢價漸昂戶部議准仍設密雲等處鑄局共增爐三百有四座

以上通考

又鑄一釐字錢每錢均鑄漢文一釐一字於錢背之左其右戶部鑄戶字工部鑄工字各直省者均鑄地方一字務極精工不如式者罪每千文準銀一兩其見行舊制錢仍聽民便又禁官爐夾帶私鑄犯者以枉法贓論

通典

十四年定直省錢糧兼收銀錢之例戶部議言直省徵納錢糧多係收銀見今錢多壅滯應上下流

通請令銀錢兼收以銀七錢三爲準銀則盡數起解其錢充存留之用永爲定例從之 謹按古者賦稅之制惟以穀帛其後以錢又其後以銀漢律有口算出錢但施之丁賦而已自唐定兩稅法始以錢爲惟正之供宋代因之民間輸官之物謂之錢糧由此昉也唐以銀爲土貢而不以爲賦宋景祐時詔諸路歲輸緡錢福建一廣易以銀於是銀始得代錢明洪武九年許民以銀錢鈔絹代輸今年租稅於是銀始得代糧正統元年以後令浙江江西湖廣等處租稅俱量收銀此以銀爲賦之始也 國初於是年定銀七錢三之例嗣後銀錢交納仍各隨民便雍正十一年復以民間正賦概行交銀經安徽巡撫徐本奏准凡小戶零星及大戶尾欠錢糧納銀時恐致稱收折耗請令完納制錢每銀一分收錢十文連耗羨在內至乾隆元年又以直隸所屬州縣徵收錢糧多有以錢作銀民間交錢比納銀爲數較重 特諭凡錢糧在一錢以上者不必勒令交錢在一錢以下者仍照舊例銀錢聽其自便云

又停各省鎮鼓鑄專歸京局更定錢制每文重一錢四分於錢幕鑄滿文戶部奉 上諭鼓鑄之法原以裕國便民今各省開爐太多鑄造不精以致奸民乘機盜鑄錢愈多而愈賤私錢公行官錢壅滯官民兩受其病欲使錢法無弊莫若鼓鑄歸一其各省鑄爐一概停止獨令京局鼓鑄務比舊錢體質更加闊厚每文重一錢四分磨鑿精工且兼用滿漢字俾私錢難於僞作一面鑄順治通寶四漢字一面鑄寶泉一滿字其見行之錢姑准暫用俟三年後止用新鑄制錢舊錢盡行銷毀 謹按

是年爲錢背鑄滿文之始尋工部局亦照式鑄寶源一滿字考錢之爲制自古迄今遞加詳備荀悅
謂夏殷以前錢無文周制則有文蓋以寶字繫錢自周景王之寶貨始以年號繫錢自宋孝武之孝
建錢始以通寶字繫錢自唐之開元錢始但武德鑄開元錢原取迴環可讀亦得稱開通錢其專稱
通寶者實自唐之建中通寶始至錢背之繫以地名則自唐會昌時之開元錢始厥後或有繫以開
鑄年數者或有繫以當五當十數者至本朝始定鑄在京局名及直省地名焉若夫錢之有面有
背古錢皆一面有字一面無字昔人以無字處爲面爲陽有字處爲背爲陰謂如器物款識必書於
底其實不然考漢書稱錢之面背又作文與幕荀悅以幕爲漫而無文章昭曰幕錢背也則無文字
處之爲背自古已然惟是古錢有字之面但紀銖兩之輕重至宋孝建四銖錢兼紀年號於是兩面
皆有字唐宋以來皆紀年號而不紀銖兩遂以通寶之文爲面此則古今稱號之各隨其宜也以上通考
十七年復開各省鼓鑄局增設雲南省局錢幕兼鑄地名滿漢文江南江甯府鑄甯字江西南昌府
鑄江字浙江杭州府鑄浙字福建福州府鑄福字湖廣武昌府鑄昌字河南開封府鑄河字山東濟
南府鑄東字山西太原府鑄原字陝西西安府鑄陝字雲南雲南府鑄雲字密雲鎮鑄密字薊鎮鑄
薊字宣府鎮鑄宣字大同鑄鎮同字臨清鎮鑄臨字皆滿漢文各一每文俱重一錢四分惟京局之
寶源寶泉俱用滿文謹按順治十年所鑄一釐錢幕漢字地名惟江南江甯作江字江西南昌作昌字湖廣武昌作武字餘俱與是年所鑄字同更定工部寶源
局監督差滿漢司官各一人一年更代通典

十八年議收毀舊鑄無一釐字制錢先是順治十年於錢背鑄一釐二字其舊行無一釐字錢暫從
 民便十四年復定錢文兼用滿字其舊錢俟三年後盡行銷毀至是以三年限滿戶部議言見在各
 局滿漢文新錢鑄造尚少其一釐字錢暫令展限行使請先收買十年以前無一釐字舊錢每劬給
 直七分交局銷毀改鑄從之 謹案順治十四年改定京局錢幕鑄一滿字至雍正元年始定各省
 局錢幕亦照京局之例以寶字為首次鑄本地方一字皆用滿文至今遵行蓋於錢面鑄年號以昭
 王制於錢幕鑄 國書以示同文折衷盡善洵為萬世不刊之制云 通考

康熙二年戶工二部以舊議一釐字錢限二年行用至是期滿奏請各部撥銀收買每劬給直六分

發局改鑄六年復開各省鎮鼓鑄增置湖南江蘇甘肅三省局照式鑄地名滿漢文其錢幕湖南鑄

南字江蘇鑄蘇字甘肅鞏昌府局鑄鞏字 按湖廣左右布政使舊駐武昌府康熙三年移右布政使

於長沙府改為湖南布政使司江南右布政使舊駐江甯

府順治十八年移右布政使於蘇州府康熙六年改為蘇州布政使司陝西左右布政使

舊駐西安府康熙二年移右布政使於鞏昌府五年改為甘肅布政使司故特增鑄局 七年開四
 川廣東廣西貴州四省鑄局錢幕滿漢文四川鑄川字廣東鑄廣字廣西桂林府局鑄桂字貴州鑄

貴字 通志

二十三年上以京局一部錢法向以本部侍郎管理不無隱徇復行選差詳察積弊親督鑄造尋以

吏部侍郎陳廷敬兵部侍郎阿蘭泰刑部侍郎佛倫左副都御史馬世濟管理於是佛倫請增辦寶

源局銅斤令每年按月鑄足二十四卯不令匠役閒暇出局以杜私鑄之弊更令錢制每文重一錢

時銀價昂貴錢制厚重民間多私銷牟利向定制錢千直銀一兩今銀一兩僅得易錢八九百文錢法侍郎陳廷敬上言更定錢制每文止重一錢既令私銷者無厚利且可多鑄錢十六萬千九百二十串每年鑄足四十卯按卯增鑄從之其各省錢局俱令照新定錢式鑄造定以銅六鉛四配鑄制錢之法通典

二十四年罷前代舊錢之禁時福建巡撫金鉉疏請禁遏經戶部議准上復以問內閣諸臣學士徐乾學言古今錢相兼行使歷代皆然考梁大同宋泰始魏熙平金大定明太祖及明嘉靖百六十年來古今二錢並用錢亦不壅況閩處嶺外負山鄰海非同內地聽民兼用古錢似爲至便於是凡民間攬和行使及各官失察禁例一切罷除四十八年大學士等會議錢法輕小易於攬和以致私鑄日多官錢壅滯若不稍更舊制錢法頗難疏通尋議定仍照順治十四年錢式改鑄每文重一錢四分務令分量準足每千文準銀一兩舊鑄小制錢每千文準銀七錢俟三年後新錢足用時自行銷燬通典

雍正元年令寶泉局每年開鑄四十卯設立官牙議平錢直奉 上諭錢文係國家要務 皇考常注意勞思此事見在錢價日昂其如何平價之處著王大臣會同九卿定議具奏尋議言錢價騰漲總緣制錢尚少從前寶泉局每年曾鑄四十卯旋因銅鉛解運甚遲議減四卯見今歷經嚴催本局解收銅鉛甚多應增四卯卽於雍正元年爲始開鑄四十卯每年用銅二百八十八萬勛鉛一百九

十二萬筋鑄出新錢與順治錢及康熙年間大小制錢相兼行使則錢多而價自平但恐有奸民囤積居奇應令大興宛平兩縣設立錢行官牙將錢價議平毋得任意低昂以便交易違者論罪從之謹按牙卽古之合會交易以平市價者史記稱爲駟會周禮注稱爲月平唐書稱爲經紀其後或稱爲互卽亦稱爲牙卽凡各貨物流通皆有官牙至乾隆三年御史陶正靖條奏將錢牙裁革凡銀錢交易聽民自相買賣七年步軍統領舒赫德奏稱圓錢各鋪無人說合轉致居奇請照舊設立錢牙十二名領帖充當責成各牙等議平錢價

四年諭各督撫等前禁鑄黃銅器皿及官民不得濫用曾諄切詳諭京城見今奉行惟謹錢價已覺稍平乃近聞各省城銅器鋪內仍用黃銅鑄造者甚多此明係督撫不實力奉行徒以告示虛文掩飾而已朕時時諭內外諸臣若所頒旨有不便於民之處卽當據實敷陳請弛其禁斷不可陽奉陰違有失爲政之體督撫等爾不聞之乎朕向因制錢日少卽知有銷錢鑄器之弊嗣於京城內屢次拏獲銷毀制錢之人而欽差官至甘肅地方亦見有毀錢爲器者省會乃督撫駐節之區耳目最近政令易行非若遠鄉僻壤之難於稽察也朕爲制錢籌畫焦勞各地方官辦運銅餉亦甚費跋涉之苦然後官局得鼓鑄以供百姓之用夫以鑄錢若此之難而奸徒射利竟將已成之錢復行銷毀實國害民孰大於此故禁用銅器者所以杜毀錢之源也今後各督撫務實心遵奉倘仍前疏忽定嚴加處分至從前曾議三品以上許用黃銅今猶覺濫用者多以後惟一品官之家器皿許用黃銅餘

著徧行禁止有藏匿私用者概以違禁論嗣是各省遵 旨奉行將所收銅器劬兩於年終彙題其三年爲限之例以交銅未盡復陸續定議展限收買 謹按自賈誼以收銅爲七福可致唐劉秩貨泉議亦終之以銅不布下禁銅之令古人多有行之者然其間亦各有辨考之前史宋孝建三年晉禁用銅器唐開元十七年大曆七年貞元九年元和元年並申其禁太和三年詔惟鑑鈕釘錄得用銅餘皆禁之會昌時以銅像鐘磬皆歸巡院晉天福三年亦禁民作銅器周顯德元年令民間銅器悉輸官給直宋紹興二十八年命取公私銅器悉付鑄錢司民間不輸者罪之蓋當時皆以乏銅爲患故議收銅於上以爲官錢之用賈誼所謂上挾銅積以御重輕貨物必平劉秩所謂禁於人則銅益賤而錢之用給者是也若 國家銅產豐饒礦冶之利自足以流轉而不窮原無藉民間所有之銅用充鼓鑄特是欲絕毀錢之源不得不嚴銅器之禁是時每銅器百劬官給價銀以十一兩九錢而贏鑄錢除工料外以每串爲銀一兩計之實止得銀八兩四錢有奇其各省之奏銷者江南鑄錢二十串需銀二十四兩一錢而贏浙江鑄錢二十串需銀一十五兩五錢而贏是同一禁銅也古者專欲爲利於國而我 朝之暫行於一時者專欲止弊於民故并不惜多費帑金以爲之調劑彼前代權宜之術又豈可以同日語哉

以上通考

七年令江西浙江湖北湖南河南山東山西各收買銅器開鼓鑄局錢幕俱用滿文江西南昌府局鑄寶昌二字浙江杭州府局鑄寶浙二字湖北武昌府局鑄寶武二字湖南長沙府局鑄寶南二字

河南開封府局鑄寶河二字山東濟南府局鑄寶濟一字山西太原府局鑄寶晉一字開貴州畢節縣鑄局時貴州威甯州採銅有效大定府境內又產有鉛礦巡撫張廣泗奏請乃於畢節縣城開局設鑪十座每年開鑄三十六卯錢幕鑄滿文寶黔二字九年開江蘇安徽鑄局江蘇設於蘇州府鑪十二座安徽設於江甯府鑪四座每月各開鑄二卯其錢幕俱用滿文各鑄寶蘇寶安二字十年開四川成都府鼓鑄局設鑪八座每年開鑄二十四卯錢幕滿漢文鑄寶川二字時陝西錢價昂貴戶部議請雲南歲鑄錢十萬申發往易銀還滇尋從雲南巡撫張允隨奏請開設於東川府設鑪二十

八座錢幕亦鑄寶雲二字所鑄錢發運陝西

通典

乾隆元年戶部尚書海望言鼓鑄日增而錢價昂貴建議者多籌禁銅之法而奉行不良易滋弊竇夫銅器散布民間一旦禁使勿用其情有所不便往往遷延而不交交納而不盡緩之則互相觀望急之則百弊叢生胥吏借此需索刁民借此訛詐得賄則賣官法不得則入人罪搜括難盡用法不均民隱既難上達有司未必皆賢民間交納銅器竟有除去使費空手而歸者名爲收銅實爲勒取此等銅質本極粗雜加以銹壞經錢局鎔化折耗甚多而工價不減所得不償所失於鼓鑄全無裨益況黃銅乃用紅銅白鉛配成今禁黃銅而不禁紅銅是較未禁之先銅又多費適以速其私毀是故未禁黃銅之先白銅甚少既禁黃銅之後白銅甚多皆奸匠銷毀制錢和藥水煮白成器其弊如此夫自古錢文重輕必隨銅價之低昂而增減之上年世宗憲皇帝因私銷之弊議減錢分重一

錢二分所以調劑夫銅貴錢重者已有成效固不必屑屑於禁銅之末務矣 上善其言乃停止此銅之令 通志

五年定改鑄青錢浙江布政使張若震奏言錢價之貴實由私毀欲清其弊當絕其源訪之舊時爐匠咸云配合銅鉛加入點錫卽成青錢設有銷毀但可改造樂器雜作小件民間無利可圖隨令戶部試鑄每紅銅五十觔配合白鉛四十一觔八兩黑鉛六觔八兩再加點錫二觔共爲百觔卽鑄成青錢以所鑄錢復投爐內鎔成銅觔錘擊卽碎不能打造器皿猶恐不肖奸民將鉛錫提出取銅獲利復用接紅銅爐座鎔試每大錢四串加火耗銀一兩有奇分得紅銅五觔八兩止值銅價銀一兩六錢較之原用工本虧折甚多經文學士九卿議定鼓鑄錢文專爲便民利用旣可永杜私鑄雖工本稍有加增自應酌量變通嗣後戶工二局應照式鑄造青錢與見在黃錢相兼行使并行令開局各省一體遵照改鑄 謹按隋志稱現用五銖錢皆須和以錫鐵唐書稱爲白錢以其和錫而色白也宋時永平監鑄錢用銅鉛百萬餘觔加錫十餘萬觔明時每黃銅一觔加錫二兩後每百觔或加錫十觔或加錫六觔十三兩不等 本朝於是年始加錫配鑄謂之青錢舊時未用錫者謂之黃錢至於明代鑄法尚有松香黃蠟硫黃稻草或用桐油瀝清焰硝磁末牛蹄等項其後迭經減革至國初已一併裁去云

六年更定寶泉寶源二局工料分給銀錢之例先是令錢局爐頭工料俱給銀兩嗣因匠役食用不

數經戶工二部奏准工匠價酌給錢文六年六月以匠役首告爐頭案內降旨仍俱給銀兩至是復以工價不足將誤鼓鑄奉諭從前改發銀兩中有不敷之處錢法堂官妥議尋奏覆仍照原議料價應給銀兩外工價給發錢文爐頭按卯領錢仍照市價易銀散給各匠役永遠遵行寶泉局每卯給料價銀九百七十四兩四錢工價錢一千一百七十二串八百文寶源局以半給算料價仍按季支領各項工價從前每季給發一次者並按月支給從之謹按寶泉局每一卯用滇銅五萬一千四百二十八兩九兩一錢四分用白鉛四萬二千六百八十五兩十一兩四錢二分用黑鉛六千六百八十五兩十一兩四錢二分用點錫二千五十七兩二錢八分鑄錢一萬二千四百九十八串除工價外得錢一萬一千三百二十四串二百文寶源局半之每爐額設爐頭一人其所需工價有八行匠役曰看火匠曰翻沙匠曰刷灰匠曰雜作匠曰剉邊匠曰滾邊匠曰磨錢匠曰洗眼匠例給錢文所需料價曰煤曰罐子曰黃沙曰木炭曰鹽曰串繩又有爐頭銀紅爐匠頭銀及自局解部車脚俱例給銀兩凡鑄錢之法先將淨銅鑿鑿成重二錢三分者曰祖錢隨鑄造重二錢六七分不等者曰母錢然後印鑄制錢每遇更定錢制例先將錢式進呈其直省開局之始亦例由戶局先鑄祖錢母錢及制錢各一文頒發各省令照式鼓鑄云

以上通考

九年復于京城設官錢局令寶源寶泉二局於正額六十卯外各加鑄十卯明年復令二局各帶鑄五卯加鑄二十卯並交官局易換尋以錢價漸減將官局停止兩局仍照原額為六十一卯又開廣

東省鑄局於廣州府錢幕滿文鑄寶廣字開直隸保定府鑄局錢幕鑄寶直字

通志

十年議定用銀用錢事宜時以兵部侍郎舒赫德奏稱京師錢文自各門嚴查後價直漸平而近京州縣仍貴皆因天津一帶商船漕船回南時與販錢文所致應令地方文武官嚴查禁止得旨照所請行錢文一事有稱廣爲開採者有稱嚴禁盜銷者有稱禁用銅器者其論不一卽京師現在稽查辦理亦不過補偏救弊之一端終非正本清源之至計朕思五金皆以利民鼓鑄錢文原以代白金而廣運用卽如購買什物器用其價直之多寡原以銀爲定準初不在錢價之低昂今惟以錢爲適用其應用銀者皆以錢代而趨利之徒又復巧詐百出使錢價低昂以爲得計是輕重倒置不揣其本而惟末是務也嗣後官發銀兩之處除工部應發錢文者仍用錢外其他支領銀兩俱卽以銀給發至民間日用亦當以銀爲重其如何酌定條款大學士九卿議奏尋議言凡各省修理城垣倉庫等項領出帑銀除雇覓匠夫給發工錢外一應辦買物料如有易錢給發者該管上司卽行察禁其民間各店鋪除零星買賣准其用錢至總置貨物俱用銀交易應通行各督撫轉飭地方官出示剴切曉諭使商民皆知以銀爲重不得專使錢文實於民用有益從之謹按銀與錢相爲表裏以錢輔銀亦以銀權錢二者不容畸重凡一切行使大抵數少則用錢數多則用銀其用銀之處官司所發例以紋銀至商民行使自十成至九成八成七成不等遇有交易皆按照十成足紋遞相核算蓋銀色之不同其來已久銀幣始盛於元時而陶宗儀輟耕錄載至元十二年以平宋所得撒花銀

子銷鑄作錠卽當時之色銀也今民間所有自各項紋銀之外如江南浙江有元絲等銀湖廣江西有鹽撒等銀山西有西鐳及水絲等銀四川有土鐳柳鐳及茴香等銀陝甘有元鐳等銀廣西有北流等銀雲南貴州有石鐳及茶花等銀此外又有青絲白絲單傾雙傾方鐳長鐳等名色是海內用銀不患不足因其高下輕重以抵錢之多寡實可各隨其便流轉行用至於福建廣東近海之地又多行使洋錢其銀皆范爲錢式來自西南二洋約有數等大者曰馬錢爲海馬形次曰花邊錢又次曰十字錢花邊錢亦有大小中三等大者重七錢有奇中者重三錢有奇小者重一錢有奇又有刻作人面或爲全身其背爲宮室器皿禽獸花草之類環以番字亦有兩面皆爲人形者閩粵之人稱爲番銀或稱爲花邊銀凡荷蘭佛郎機諸國商船所載每以數千萬圓計考漢書載安息大秦諸國附近西海者多以銀爲錢太平寰宇記載海西諸國錢有騎馬人面諸品蓋其遺制至今尚存而諸番向化市舶流通內地之民咸資其用則實緣我 朝海疆清晏所致云

二十四年開西域葉爾羌城鼓鑄局回部之葉爾羌喀什噶爾和闐城舊有錢文市易通用名曰普兒質以紅銅爲之重二錢制小而厚外有輪郭中無方孔每錢五十文謂之騰格回部舊服屬於準噶爾以普兒爲歲賦在策妄阿拉布坦時錢面鑄其名用準噶爾字背鑄回字噶爾丹策凌時復易名更鑄準夷旣征回賦卽以回地普兒資用至是以西域蕩平回城悉定 皇上從將軍兆惠之請開局於葉爾羌城改鑄錢文 特命戶部頒發錢式仍用紅銅每文重二錢形如內地制錢較厚文

爲乾隆通寶用漢文其幕鑄葉爾羌城名左用 國書右用回字先以預備軍營之銅開爐鑄五十萬易回部舊錢銷毀更鑄以資回衆之用嗣後仍於各城產銅之地陸續採銅加鑄 謹按前史載西域諸國錢品不同各就其土俗爲之從未有模範國函悉奉一王之制者也夫抵西域之錢多以金銀爲質惟唐書載泥婆羅國以銅爲錢不穿孔宋三朝國史載天竺國用銅錢圍徑如中國之制但實其中心不穿貫西域之錢又多以人物爲形惟洪遵泉志列吐番國屋馱國錢稱其肉好不異中國以銅爲之字如梵書不可識所謂泥婆羅吐番等國皆爲今西藏左右之境實當回部之南然則回地之舊普兒錢鑄以赤銅而有字或卽其遺制耶夫回部居天山之南多係古西域三十六國地唐書西域傳謂龜茲于闐置女肆以征錢後周書異域傳稱高昌國稅銀錢樂史太平寰宇記稱龜茲國稅銀錢而皆不詳其錢式洪志載龜茲疏勒國有五銖錢又稱其地近西涼爲張氏遺制然則其爲市易之流傳與本國之自鑄亦莫得而考也惟是史稱龜茲國能鑄冶有鉛又疏勒姑黑難兜諸國多出銅鐵今回地之阿克蘇烏什庫車沙雅爾諸城卽其故境蓋其饒於礦產自昔而然我皇上德威廣被綏定遐荒月露天西並還制度於回城設局開鑄冠以 天朝年號而附識其地名於幕以同文之治爲利用之資洵乎貨幣之流通迄於無外已至於回部田賦若葉爾羌喀什噶爾和闐諸城皆以糧與錢並納舊以五十普兒爲一騰格每騰格直銀一兩自登版籍以來錢價日就平減諸城伯克等請加納普兒以次遞增乾隆二十六年定以百普兒爲一騰格凡田畝之供輸

與市鄜之貿易皆以此爲準繼自今六府孔修百工咸理定非人之職官山遠過乎祁連殞泉賦之規任土直周乎蒙汜斯固肇興刀布以來所未有之 盛烈矣以社通考

二十六年又開阿克蘇城鼓鑄局亦如葉爾羌之制惟錢幕鑄阿克蘇城名其銅設七品伯克管理回部於該地開採 四十年開伊犁鼓鑄局錢幕用寶伊字伊犁爲準部總匯之區乾隆二十年

王師平定遂隸版圖既有重兵駐守兼多商販貿易需用錢文較葉爾羌更爲緊要是年遂令開局鼓鑄通志

二十四史九通政典類要合編卷二百九十七

皇朝五

食貨 征權

古者川澤林藪各有專司原以崇本抑末而非與閭閻爭尺寸之利也乃唐宋以來視爲利藪搜索靡遺凡竹木閒架坊場撲買莫不有征而取民之制蕩然無存矣我 國家肇造區夏蕩滌繁苛

列聖相承如傷靡念一切稅額之增減隨宜酌取類皆量地制宜務從節簡祛弊累而立經常誠億萬世樂利無疆之源也 通志

順治元年豁免明季各項稅課虧欠又免各直省關津抽稅一年禁革明末加增稅額銀兩免順治元年關津稅課自二年正月初一日以後方照故明額起稅凡故明末年一切加增稅額盡行豁免其直省州縣零星抽取落地稅銀名色概行嚴禁 四年歸併荆湖通惠河中河清江檄杭關蕪湖

龍江等關於戶部又定張家口等處關口開塞事宜戶部兵部奏差理事官科奎鍾固自張家口起西至黃河止察得張家口關門迤西黃河迤東共一千四十五里其應留臺二百四十四座故明時得勝堡一口係察哈爾國討賞出入之路河保營係鄂爾多斯部落茶鹽交易之處以上二口俱已堵塞又差理事官滿都戶等自張家口起東至山海關止察得張家口迤東山海關迤西共二千四百四里其應留臺四百一十七座洪山口龍井關口西常峪正關口潘家口冷口俱係捕魚網戶耕

二四
種往來之路密雲迤後石塘嶺正關口係民間運木之路昔戶部於此校枚抽稅以上應留關口共六處外如常峪口獨石口龍門所口墻子嶺口黃崖口羅文峪董家口劉家口桃林口界嶺口一片石口以上十一關口俱已堵塞得 旨河保營既爲鄂爾多斯部落交易鹽茶之地與董家口俱准開餘如議 謹按 國家設關置尹掌其治禁本以譏察奸宄而安行旅非徒徵商抑未用佐經費已也山海關外在我 朝本爲內地然內外人民往來關口未嘗不稽其出入之數異言異服非有勘合驗放者無所容於其間今自張家口至山海關輒請故明所設慶座減十之七八而攜帶軍器有禁夾帶私參有禁屬國朝使持禁物出關亦有禁當茲中外一家仍寓重門擊柝之意是以關口開塞與臺座興廢之故仍備著於篇云

通考

八年定各國專差漢官每關一人例九年并西新關江甯倉爲一差停獨石口差嚴關差留用保家委官之禁凡額設巡攔各製號衣腰牌十年令各關差刊示定例設櫃徵收不得勒扣火耗及陋規并禁關役包攬報單十一年定各關兼差戶部滿漢官筆帖式例十三年定各關專差漢官兩翼差筆帖式張家口殺虎口各差滿官一人筆帖式一人均照例一年更代十四年令各關將部頒條例

刊榜豎立關口便商輪納又令各關當堂設櫃設梁頭貨物條例商民親行填簿輸銀投櫃

通典

康熙二年定盤詰糧船關口地方止於儀真瓜州淮安濟甯天津五處並許帶土宜六十石以恤運丁又定外國人攜帶貨物入崇文門免稅例申定滿漢關差例

滿官差郎中員外郎漢官差郎中

又更定兩翼張家

口殺虎口淮輪差六部司官例

通志

五年議准刊刻關稅條例竝立木榜於直省關口孔道曉諭商民戶部議覆直隸巡撫王登聯疏言直隸各省正收關稅條例甚屬繁多請刊刻木榜竝立關口並商賈往來之孔道徧行曉諭或例內有加增之數亦明白註出以杜吏役濫征之弊應如所請嗣後直隸各省設立關稅之處應多刊木榜昭示商民照額征收如有不肖官吏於定額之外私行濫收者令該督撫不時查察據實題參依律治罪從之 八年議定各關稅務分別差遣部員及地方官管理戶部議覆戶料給事中蘇拜疏言關稅一差歸於外府佐貳官管理但各官俱有專掌又兼理關稅事務煩多且身爲地方官畏懼上司希圖足額必致增派商民請仍差部員應如所奏將滿漢司官專差收稅奉 諭旨關稅多者將各部院賢能滿漢官員差遣關稅少者仍交地方官征收其應差部院官與應交地方官之處分別議奏戶部再議查崇文門稅差已經設官收稅其通州坐糧廳京城左右二翼倉寶泉局大通橋通州西倉中南倉張家口殺虎口此九差原係臣部官員差遣應仍舊例外許聖關蕪湖關北新關九江關淮安關太平橋揚州關蕪關天津關西新關淮安倉臨清關鳳陽倉稅額俱多應擇各部院賢能滿漢官員差遣其它運廳居庸關徐州倉稅額俱少應交與地方官征收從之 二十三年議准浙江沿海貿易收稅例九卿等議覆工部侍郎金世鑑疏言浙江沿海地方請照山東諸處見行之例聽百姓裝載五百石以下船隻往海上貿易捕魚預行稟明人數至收稅之處交與該道計貨

之貴賤定稅之輕重按季造冊報部應如所請從之又定開海征稅則例其海口內橋津地方貿易
悉免抽分九卿等議覆戶部給事中孫蕙疏言海洋貿易宜設立專官收稅應如所請得旨海洋
貿易創收稅課若不定例恐為商賈累當照關差例差部院賢能司官前往酌定則例嗣經郎中伊
爾格圖酌定開海征稅則例奏請給與各關定例欵項於橋道渡口征收稅課奉 諭旨向令開海
貿易謂於閩粵邊海民生有益若此二省民用充阜財貨流通各省俱有裨益且出海非貧民所能
富商大賈懋遷有無薄征其稅不致累民今若照奉差郎中伊爾格圖所奏給與各關定例欵項於
橋道渡口等處概行征收何以異於原無稅課之地反增設一關科斂乎此事恐致擾民爾等傳諭
九卿詹事科道會議具奏戶部等衙門遵 諭議覆福建廣東新設關差止將海上出入船載貿易
貨物征收其海口內橋津地方貿易船車等物停其抽分并將各關征稅則例給發監督酌量增減
定例從之

通考

五十五年北新鳳陽天津三關監督題報關額

論該監督任滿交巡撫監收

臨清關亦如此例

五十九

年以江海關歸江甯巡撫浙江關歸浙江巡撫管理

通典

雍正二年論嗣後稅務交與地方官監收於錢糧地方均有裨益

至是各關差官俱停止惟崇文門無地方官可交仍差內務府官山

海關左右兩翼古北口潘地口殺虎口呼納呼河差仍照例差道部員

又

論凡商賈貿易之人往來關津宜加恩恤故將關差歸之

巡撫以巡撫為封疆大仰吏必能承德意加惠商旅也但各關皆有遠處口岸所委看管家人難免

外苛求及索取飯錢等弊嗣後著將應上稅課之貨物遵照條理刊刻詳單均給各貨店其關上條
例木榜務暨立街市使人其昆申禁關役報單不實之弊嚴放關遲滯之禁又覆准淮安關仍差部
員許暨關交蘇州織造管理又更定鳳凰城中江稅務在 盛京五部司員內遴選派往例

向保城守尉管

官管
通志

六年諭崇文門查稅官員毋得稽留會試舉子借端苛索內務府總管常明奏報蘆溝橋邊 旨等

造官房安歇會試舉子工程告竣得 旨此朕體卹應試舉子之意俾其有旅次居宿之安而無盤

查行李之擾並令崇文門每年查稅官員實心奉行嚴飭巡察人役等毋得借端稽留額外苛索

通考

乾隆元年諭聞外洋紅毛夾板船到廣時泊於黃埔地方起其所帶礮位然後交易俟事竣給還至

輸稅之法每船按梁頭徵銀二千兩左右再照例徵其貨物之稅此向來之例也乃近來夷人所帶

之礮聽其安放船中而於額稅外將所攜置貨見銀別徵加一之稅名曰繳送亦與舊例不符因思

從前洋船到廣既有起礮之例此時仍當遵行何得改易至於加增繳送稅銀尤非加惠遠人之意

著察照舊例按數裁減又定江西九江贛州關鈔課三聯單例凡商人納銀入櫃後發給一聯一存

稅署一交巡撫衙門又准張家口居庸關照崇文門例車馱貨物過稅收取飯錢以資養贍

二關向無火耗

通典

六年清查外省關權私增口岸奉 諭旨外省關權皆久經該督撫就近稽查除現設口岸報部有

案者照舊設立外其有私行增添之口岸逐一詳查題報應留者留應革者革此番清查之後司榷之員若再有違例苛索者胥役嚴處官吏嚴參該督撫不行查察經朕訪聞必於該督撫是問至許暨北新二處緣江浙大關尤爲緊要交與楊超曾德沛照此稽察辦理 十年禁止宿遷關通船一載征稅之例宿遷關舊有通船一載之例如船實能受載百擔而所裝之貨乃在七十擔以下者仍照現徵之數按擔征收若有數滿七十擔者遂援通船一載之例令輪百擔錢糧其船隻之受載數百擔以至千餘擔者所裝貨物雖有多寡之殊而稅銀俱按此例征收至船頭船梢及平版上跨俱爲剔除不入簽量見數之內卽有貯貨於此者亦不征其稅至是監督倭赫奏稱近有狡黠船戶每計貨船已滿七分卽將貨物分貯頭梢上跨以避一載之例而奸猾吏胥亦伺船貨之在七分上下者卽高下其手以逞其隱漏勒索之技應如所請將散裝貨物不拘頭梢船跨悉照成包成捆貨物一例簽查見數按擔征收將通船一載之例卽行禁止從之 又豁免福建浦城關稅缺額銀兩奉諭旨朕聞福建浦城關稅從前題定額征收二千七百餘兩後于乾隆三年更定稅則委員監守一年以爲定額缺少銀五百四兩零嗣後連年短征蓋因該關長腳難於雇覓以致商貨稀少經征各員無力整補遂成懸欠著將此項稅銀加恩豁免其儘收儘解其乾隆三年以後節年缺額銀兩一併加恩免其賠解該部卽遵諭行 十二年又改溪雅稅館於懸鐘地方並定船仔頭船之禁先是福州將軍新柱奏請將溪雅稅館移至懸鐘經戶部行文撫臣周學健議稱溪雅地方遠距懸

鐘三十里稅館設在溪雅船隻俱泊懸鐘在關則有鞭長莫及之虞在商則有乘機偷漏奔走守候之弊部覆議如所請將溪雅稅館准其改設懸鐘又該將軍奏稱廈門等處有奸民置造酷仔頭船雙蓬雙艙口用四槳非商非漁專爲包攬偷漏貨物請行飭禁戶部行知該撫議覆請嗣後酷仔頭船式樣永行禁止所有現在之船毋許加用四槳多添舵水并十船編甲互結部議應如所請從之十三年定廣東太平關收稅則例廣東巡撫岳濬疏稱太平關則例內未經開載之九十五條查照粵贛兩關稅則斟酌征收統按其中因與海關同屬初次抽稅及貨物貴重應照海關定例者則有珍珠玉器錦繡布楠木因先由粵海徵稅次及內地分販應照贛關定例者則有磁器琥珀蜜蠟瑪瑙哆囉哩噠因粵贛兩關未載按照貴賤科稅者則有布帳黃楊器黃楊木因原稅本屬平允卽用者爲正條者則有毛布水晶玻璃松線布刀石紅木因貨物初經收稅者則有姑絨花生甘草海海石茶子桐子因各處出產價值不同適中損益者則有棉器布器油菜子因稅則籠統復加分別者則有哆囉器織器氈器兒帽祖帽因物同名異卽做本例者則有氈底卓氈紫香粉蘇包泥碗其滄光各條內因與太平橋正例開載相符應令一體遵收者則有廢銅香簪洋青石青石綠八角金鍼菜紫檀紫檀木骨角器皮器鐵器布棉器各色糖菓綢緞器絲緞器哆囉器哩噠器錦絲線帶布帳薯莢鹽欖良薑椰子楓子草仁石蓮子石決明因下水已經輸稅上水應予輕減者則有紗羅包頭帽緯毛布氈片姑絨毯毯又木稅各條內因原稅本屬適宜卽擬著爲正條者則有土杉枋

杉板松板紅木大杉木樟木枋板牀板門枋因料大稅輕量予加增者則有松木因料同稅重較正酌減者則有長薄板松筒杉木因論翦恐滋夾帶改作論根者則有遇仙橋之小杉木至遇仙橋滄光廠款目與太平橋相同者均應畫一抽收其計擬定貨稅七十三條水稅二十二條俱屬因地制宜斟酌允當反覆確核委無偏重偏輕一併刊載例內並豎榜三關廠曉示商民俾有遵循而稅則益歸盡善部議應如所奏從之 謹按太平關征税比照粵贛兩關因時因地以定稅額重輕如珍珠每觔纔收課銀二錢五已成器者纔收課銀四分未成器者每觔收銀一分七釐有奇即使珠玉價值極微亦數十百分而取一矣其餘哆囉囉噤蜜蠟琥珀俱每百觔纔收稅銀一二兩香楠及黃楊俱每百觔收稅銀自一分至五分而止蓋通工惠商儉於取民超軼前代非可數計特以我國家休養生息百有餘年幅員廣闊亙古無比凡舟車商賈所達西北及於天山外裔東南及於閩粵重洋積少以成多未始不足以資國用若分析計之則至微至薄矣夫征商之令見於周官孟子所述惡商賈之罔利故從而征之其詳不可得聞大約周人田賦以什一爲制至於重本以抑末則征權之數諒必加於計畝秦漢以後稅額遞增征權之輕未有如我 聖朝者茲所臚列貨稅共九十五條按名定數未可以羅縷備書附識於此以見薄征之大概焉

十四年敕直省各關稅額視雍正十三年分數爲準戶部奏各關征收盈餘銀兩比較上屆短少至一分以上者各按數定以處分奉 諭旨此摺所見雖是但盈餘究在正額之外然非額外別征餘

盈緣照額征收儘收儘解其溢於成額者卽謂之盈餘是名雖盈餘實課帑也亦卽正供也當康熙年間闕差各有專員恣意侵蝕不但無盈餘并不敷正額然至任滿之時未嘗不量其所入派工派差無得飽其私橐者而當時風氣俱視缺額爲分所當然是以有雍正年間一番清理凡官侵吏蝕僕使中飽舉燭照而數計焉於是各關之以盈餘報者相屬缺而額者從未之聞矣可見歲額本數盈餘本有向之有缺無盈其弊自在漏卮耳自朕御極而中外人心舉知政尚寬大希圖欺隱時則盈餘歲減一歲又將漸開虧損正額之端用是曾降諭旨所有較前減少之員交部嚴行察議令其少知法紀而朕意又恐查核過嚴則各關自顧考成必求溢羨或致借端橫索因令數目相儆者該部卽行核題這今年復一年較前有減無增部臣請比較上屆短少至一分以上者各按數定以處分此雖爲慎司國計起見然所稱與上屆比較不無流弊有如甲盈一萬則下屆之乙必思盈及萬有五干再下屆之丙有將增加二萬之丁而三萬似此相競不已又將無所底止必至病商斂怨非理財之正道也夫盈餘無額而不妨權爲之額朕意當以雍正十三年征收盈餘數目爲定其時正諸弊肅清之時而亦豐約適中之會也自雍正十三年而上下二三十年之中歲時之股款相若也買船之往來相若也民風之奢儉相若也則司權之征收又何至大相懸殊哉嗣後正額有缺者仍照定例處分其各關盈餘成數視雍正十三年短少者該部按所定分數議處永著爲例 二十二
年更定浙江海關洋船稅例戶部覆准閩浙總督喀爾吉善兩廣總督楊應琚奏稱設關分權原以

裕課通商而因地制宜亦須權衡公當如外洋紅毛等國番船向俱收泊廣東少至浙江是以浙海關稅則略而不詳今自乾隆二十年以來外洋番船收泊定海舍粵就浙歲歲來甯若不將比較則例更定章程必至私扣暗加不特課額有虧亦與番商無補臣等悉心會商將粵海關征收外洋船隻入口出口貨物現行徵稅則例及比例規例併外洋船出口貨物估價科征各冊逐一查核除比例一冊緣天下之物類繁多稅則未能備載以此例彼比照征收原無軒輊其現例一項原係從前陋例嗣經查出歸公征收報解以上二項浙海關循照征收均毋庸另議增減惟正稅一項未便仍照粵海關科則一例征收蓋向由浙江赴粵販買之貨今就浙置買稅餉腳費俱各輕減而外洋進口之貨分發蘇杭亦屬便易該番商既比在粵貿易獲利加多則浙海關之稅則自應酌議加征其中有貨物產自粵東原無規避韶籍等關稅課者悉仍舊則概不議加正稅之外仍照加一征耗其粵海關估價一項係將該商出口貨物估計價值按貨本一兩征收銀四分九釐名爲分頭今應遵照辦理但如湖絲磁器茶葉等各種貨物現就浙江時值多與粵海關原例不符似應按照時值增估更定其中有時價相符者仍循其舊至船隻樑頭之丈尺及貨物進口出口之擔頭悉照粵海關則例征收奉 諭旨依議此摺內所稱若不更定章程必致私扣暗加課額有虧與商無補等語尚未深悉更定稅額本意向來洋船俱由廣東收口經粵海關稽察征税其浙省之甯波不過偶然一至近來奸牙勾串漁利洋船至甯波者甚多將來番船雲集留住日久將又成一粵省之澳門矣於海

疆重地民風土俗均有關係是以更定章程視粵稍重則洋商無所利而不來以示限制意並不在增稅也將此明白曉諭該督撫知之 謹按舊例海舶貿易外洋者給之照以稽察出入其出洋歸港皆憑照爲信因按其照稅之有藏匿奸匪私帶違禁之物者論如法良以外洋紅毛諸國番船向皆收泊粵東 國家張官置吏分駐營伍以資彈壓凡定例所查禁者嚴明約束垂諸令甲是以海口肅清民不滋擾至于浙省甯波向非洋船聚泊之地邇年奸牙市舶扭於稅額之輕微自乾隆二十年及二十一年外洋夷船歲至定海轉運甯波於是督撫大吏據浙關科則比較粵海課額更定征收我 皇上聖謨深遠念海疆重地多一利端卽增一弊數洋船歲至甯波徑途日熟勢將與粵省之澳門無異而商舶頻仍則有奸牙之勾串吏胥之需索及其易貨歸棹則有絲粟之出洋鐵器之渡海日久弊生難以盡杜津會既成夷商叢雜之區必須重爲經理夫昌國甯海松門澈浦皆浙省濱海之藩籬也推而至於金山乍浦海門崇明又南省濱海之門戶也風濤出沒持貨賄以恐遷既可驚趨甯波亦可轉移他郡利之所在瑕釁易滋 聖天子所以經畫於未然而杜其端於始事者職此之由蓋自章程更定以來外洋市舶知違例紆道之無所利不復收泊甯波內無禁令之煩而夷艘自遠無事巡查之密而海口救甯我 皇上潛移密運之權誠有握要于幾先者矣

二十四年定葉爾羌喀什噶爾二處貿易抽稅例回部商稅舊制凡本地回民往外貿易帶回物件者抽稅十分之一外處回民販來物件抽稅二十分之一于乾隆二十四年經定邊將軍兆惠奏聞

仍照舊例辦理是年又據參贊大臣舒赫德奏稱葉爾羌喀什噶爾二處牲畜價貴請減收商稅分數奉 旨允准嗣是本地貿易帶回之牲畜改爲抽稅二十分之一其緞布皮張則十分抽一外番

商人販來牲畜改爲抽稅三十分之一其緞布皮張則二十分抽一若牲畜貨物不及抽分之數馬

一匹抽一騰格大牛一頭則二十五普兒小牛一頭半之大羊一牽稅十二普兒小羊一牽亦半之

雜項物件視其值之貴賤折收騰格普兒

回地錢名曰普兒以銅爲之五十之數爲一騰格

至乾隆二十八年駐劄喀什噶

爾大臣永貴奏布嚕特回民到烏什貿易物件請照喀什噶爾之例收稅報可 三十四年奉 諭

自來硫磺出入海口俱有例禁原因磺勦係火藥所需自不便令其私販若奸商以內地硫磺偷載

出洋或外來洋船私買內地硫磺載歸者必當實力盤詰治罪乃定例於洋船進口時亦不許其私

帶殊屬無謂海外硫磺運至內地並無干礙遇有壓艙所帶自可隨時買備於軍資亦屬有益何必

於洋船初來多此一番詰禁乎嗣後於海船出口時切實稽查不許仍帶磺勦以防偷漏之弊違者

究治其各省洋船入口禁止壓帶硫磺之例概行停止著爲令 謹按軍資火藥最重磺勦慮奸民

私販微利自不得不嚴加譏察故凡商船出口及番船歸洋與絲粟銅鐵同一例禁其由海外運至

內地者向亦爲之嚴詰不許其攜帶入口於市舶情形殊多未使我 皇上聖謨深遠准其壓帶禁

令則弗使煩苛商販則咸資利益法良意美斟酌盡善防奸之道無不至柔遠之政茂以加矣 四

十二年戶部言打箭鑪界近邊煙嗣後稅差請照山海等關之例於宗人府正副理事官及各部院

郎中員外郎等官內揀選保送庶於權務彈壓有裨得

旨允行以上通考
以上關雘

順治二年定陝西茶馬事例先是元年定與西番易馬每茶一篋重十觔上馬給茶篋十二中馬給九下馬給七至是差御史轄五茶馬司戶部言陝西召商茶以易番馬向有照給金牌勘合之制查前明詔諭連接西番關隘處所擬官軍巡守不許私茶出境凡進貢番僧應賞食茶頒給勘合行令四川布政司撥發庫茶照數支放不許於湖廣等處收買私茶違者盡數入官仍將伴送入員治罪此舊例之可行者若金牌一項係明初事例永樂十四年已經停止我朝定鼎各番慕義馳貢金牌可以不用但以茶易馬務須酌量價值兩得其平無失柔遠之議從之通考

三年免茶馬增解額數二千匹其應解之數仍以舊額一萬一千八匹為準七年準茶馬御史吳達

疏令部發之引俱照大引例官商平分以爲中馬之用

先是陝西茶馬御史印發引有大小之分又有大引官商平分小引納稅三分入官七分

給商十八年准達賴喇嘛及根都白吉於北勝州互市以馬易茶通志

康熙三十四年敕遣專官管理茶馬事務戶部議覆刑科給事中張元佩條奏馬政事關緊要洩岷諸處額茶三十餘萬篋可中馬一萬匹陳茶每年帶銷又可中馬數萬匹查茶勛中馬甚有裨益應將額茶中得之馬給營驛外其餘馬每年交秋將數千匹送至紅城口等處牧放得旨茶馬事關緊要著遣專官管理三十五年飭准打箭爐番人市茶貿易四川巡撫于養志遵旨會同烏斯藏喇嘛營官等查勘打箭爐地界奏番人藉茶度生居處年久且達賴喇嘛曾經啟奏准行應仍准

其貿易理藩院議准從之 四十四年停止巡視茶馬官員歸甘肅巡撫兼管先是三十六年專差部員管理茶馬事務至是年復歸巡撫兼管因招中無幾西甯等處所徵茶餉停止易馬將茶變價折銀充餉至雍正九年奏准五司復行中馬之法每上馬一匹給茶十二篋中馬一匹給茶九篋下馬一匹給茶七篋俟一年之後計所收馬匹卽留甘省軍營之用或馬數甚多分撥河南山西就近喂養十年奏准中馬之法應見馬給茶至十三年仍復奏明停止 五十八年准理塘巴塘地方買運茶勛議政大臣等議覆都統法喇疏言蒙古地方及西藏人民皆藉茶養生松潘一路茶價甚賤青海一帶積茶必多應暫行禁止俟其懇請時再酌定數目令其買運至打箭爐外最近者爲裏塘遣官招撫令營官造具所管番寨戶口清冊酌量定數許其買運巴塘以外亦照此例其打箭爐一路當視番情之向背分別通禁應如所奏從之

通考

雍正八年以川茶課稅向以園樹多寡爲額未有定准定改照斤兩徵收又定陝西茶商每引一道運茶百斤准加耗茶一十四斤如有夾帶照私鹽例治罪官吏失察亦如之九年定五司復行中馬之法每上馬一匹給十二篋中馬九篋下馬七篋計所收馬匹留爲甘省軍營之用其有盈餘分撥

河南山西牧養

按川省茶司原分隸五處西司坐落西甯府洮州司坐落岷州州河司坐落河州莊司坐落平番縣甘司坐落蘭州府

十年四川巡撫愈德疏言

川茶半由蒙古西藏及打箭爐番人販售自引歸部發過番客雲集分給不敷請預頒茶引五千張貯川省巡撫衙門隨時增發從之十三年停止五司以茶中馬定嗣後甘庫茶餉遇存積過多之時

改徵折色俟各司銷存無幾復徵本色

乾隆六年減川省成都彭灌三縣積引四千四十餘張並除課銀二千四百餘兩八年豁免川省成都彭灌三縣逋欠茶課二十四年甘肅巡撫吳遠善以甘省五司自乾隆七年改徵本色以來茶引日積惟莊甘二司地係衝衢西河二司附近青海猶可行銷洮司最僻甚難銷售請將各庫官茶搭給內地及燕疆兵營俸餉又請將洮司額引歸併甘莊二司徵課俟洮司庫貯茶封搭給餉完日卽行裁汰從之

以上通志

二十五年奏定洮河二司茶封歸甘莊二司辦理戶部議覆甘肅巡撫吳遠善奏言甘省茶課向爲中馬而設故每年額引二萬七千二百九十六道內分西司九千七百一十二道坐落西甯府洮司三千三百道坐落岷州河司五千一百三十二道坐落河州莊司五千一百五十二道坐落平番縣甘司四千道坐落蘭州府今中馬之例久停在甘莊二司係各處衝衢西河二司附近青海常有銷售之路惟洮司地處偏僻土瘠民貧故該司商銷茶餉歷年俱告改別司售賣惟交官茶封仍交洮庫往往積至數十萬封始請疏銷臣查甘莊二司地處衝衢撥用收支均屬近便應如該撫所請將洮司額額茶引改歸甘莊兩司給商徵課俟洮司庫貯茶封搭餉完日卽行裁汰疏上如議行嗣於乾隆二十七年以河司雖附近青海蒙古而一切交易俱在西甯從不一赴河州其情形與洮司無異亦行裁汰其額行五千道併歸甘莊二司 謹按李唐回紇入貢以馬易茶宋熙甯嘉泰間相繼

行之漸置茶馬之官至故明齋金牌三衛收馬給茶名曰差發其制中廢當時籌國者屢以爲言然
明政已弛竟不能復也我朝定鼎之初差茶馬御史招商領引納課所中馬匹壯者給各邊兵北
者發所司牧養孳息順治十四年以七監馬匹番庶凡茶馬變價銀兩改解充餉康熙三十二年以
蘭城無馬可中將甘州司積貯茶篋銀七茶三用充俸餉蓋本朝牧地廣於前代銷爲孳息則已
驪黃遍野雲錦成羣今則大宛西番盡爲內地渥洼天馬皆摠上之駒中馬之制久停是以甘肅茶
封恆苦於需變或變折價銀或以充俸餉甘省五司已裁其二尙存甘莊二司及西甯一司頒引徵
課亦以留中馬之舊跡於不廢云

二十七年以茶餉積滯籌畫疏銷陝甘總督楊應璠遵旨條議甘省五司官茶疏銷事宜一官茶
應改徵折價也按甘省庫貯官茶向例如遇存積過多改徵折色如庫貯無幾復請徵本色今五司
庫內自乾隆七年至二十四年已存積至一百五十餘萬封經前撫臣吳達善於二十四年奏准每
封作價三錢搭放兵餉以來當奉行之始兵丁領獲茶封尙有餘利今行之二年有餘已搭放過茶
四十餘萬封現在市肆官茶日多非十年之久不能全數疏銷且每年商人又增配茶二十四萬餘
封商茶既多官茶自必益加壅滯莫若將商人應交二成官茶五萬四千餘封暫停交納照例每封
徵折價三錢俟陳茶銷售將完再行徵收本色一商茶應准其減配也查甘省茶法商人每引交茶
五十勛無論本折卽係額課此外尙有充公銀三萬九千餘兩亦係按年交納無殊正供至商人自

賣茶封每引止應配正茶五十觔連附茶共配售三十餘萬封該商等卽以配售之茶完納前項應輸之課經前撫臣吳達善奏准增配以紓商力並無課項第茶封既已加增又有搭放兵餉之庫貯官茶勢致愈積愈多難免停本虧折今酌中籌計商人情願每引一道止配茶十五封內應酌減無課茶一十五萬八千三百十六封共止配茶四十萬九千四百四十封至二成本色茶封現既酌議改徵折價自亦無庸配運一陳積茶封應召商減售也查各司俱有陳積茶封而洮司爲最多該司地處偏僻定議搭餉計非數十年不能完現在每封四錢發售商民無利可獲裹足不前請仍照乾隆二十六年前撫臣明德原議每封定價三錢召商變賣河西二司共成茶六十餘萬爲數較多亦准其一體照數售變一內地新疆應一體搭放也查乾隆二十四年前撫臣吳達善奏准滿漢各營以茶封搭餉至新疆地方茶餉一項向須取資內地誠如 聖諭各處濟用自屬多多益善今官茶以沿途站車輓運毋庸脚費其自肅州運至各處將脚費攤入茶本之內較之買自商賈價值尙多減省部議應如所請從之二十九年免追浙省行銷順天茶餉殘引舊例浙省行銷茶引令各商過關輸稅截角統俟茶餉售完之日將所執殘引交原發衙門送部查銷嗣據閩浙總督楊廷璋奏報浙省行銷口外等處引張歷經收稅截角更由崇文門戳去中間實無影射情弊請將口外殘引免其繳部內地殘引卽在行茶處所催繳復據侍郎兼管順天府尹錢如誠等奏稱浙省乾隆二十三、四等年行銷順天茶引其一萬九千餘道自准浙省咨後卽經照例查追迄今日久大半多無著落

推原其故實緣行茶與行鹽不同商無一定地任遷移殘引多隨客散查究無根難以追繳嗣後浙省行銷京城茶引應令崇文門於截去中間時卽將所截引心彙齊送部查核其殘引一體免追以省擾累從之

以上通考

三十七年准四川總督阿爾泰請增南川縣茶腹引一百張照例徵收稅課三十八年定四川三維谷等處土司買茶以千斤爲率使僅敷自食不能私行轉售從川督劉秉恬請也

通志以
上茶法

康熙元年定貴州開州斗甫廠徵水銀額每歲九十五斤

遇閏加
十斤 變價撥充本省兵餉

通典

二年令四川黎漢紅卜萱二洞白銅舊廠聽民開採輸稅九年定貴州黔西州屬新開黃土坎廠徵水銀百斤

通志

十四年定開採銅鉛之例戶部議准凡各省產銅及黑白鉛處如有本地人民具呈願採該督撫卽委官監管採取至十八年復定各省採得銅鉛以十分內二分納官八分聽民發賣監管官准按勛

數議敘上官誅求逼勒者從重議處如有越境採取及衙役擾民俱治其罪 謹按嗣後各廠之開

閉視山礪之旺衰康熙年間如奉天浙閩諸省皆曾開採續經停止今則湖南雲貴川廣等處並饒礪產而滇之紅銅黔楚之鉛粵東之點錫尤上供京局者也大抵官稅其十分之二其四分則發價

官收其四分則聽其流通販運或以一成抽課其餘盡數官買或以三成抽課其餘聽商自賣或有官發工本招商承辦又有竟歸官辦者額有增減價有重輕要皆隨時以爲損益云

通考

十九年定各省開採所得金銀四分解部六分抵還工本例二十一年定雲南銀礦官收四分給民
六分例五十三年令雲南惠隆廠照彬州例收稅五十七年定雲南楚雄府石羊等廠臨安府等箇
舊廠徵收不足照地丁雜項銀例議處又定貴州威甯州屬猴子廠銀礦二八收課例五十八年令
雲南建水州屬華祝等廠雲南縣屬水木支山金龍廠照惠隆廠例收稅五十九年定貴州威甯州
觀音山銀鉛礦廠二八收課例通典

雍正六年定湖南靖州屬之墓坪山金砂課例每淨金一兩收課四錢以五分作解供耗費及官役
養廉以五錢五分作商民工本定廣西蒼梧縣屬芋茨山金砂課例每兩收課二錢定廣西臨桂縣

屬之水槽野雞二礦所出銀鉛銅砂二八收課例八年令四川建昌所屬之迤北興隆甯番之紫古

喇沙基九龍五廠招別省商人開採本省商人所出銅斤三分收課更定雲南羅平州之卑浙塊澤

二八二八收課例每百斤收課十斤又定貴州大定府開採硃砂雄黃二八徵收例其廣西恩城土

州硃砂廠亦如之十一年定廣西賀縣螺蚌山銀礦每兩收課三錢例通志

乾隆八年覆准貴州天柱縣相公塘東海洞等處金礦均屬曠野無干民田廬舍照例開採每金一
兩收課三錢九年定廣東開採銅鉛銀砂等礦并招商民承採事宜例凡有礦之處令地方官覆實
無碍民田廬墓確有成效再行招商開採仍照定例二八徵收各廠該管道員發給地方官循環流
水簿連五串票將每日所出之數填注流水簿分截串票一繳本道一存地方官處稽察一付商人

存照其申根井流水簿一月一繳本道察覆仍十日一次申報督撫司道等官稽考按月造具支銷公費各冊申報本道按季分報督撫及該有司衙門凡日所採礦砂挨文堆貯如某日煎煉某礮某日礮砂若干斤鑪頭報明官商督同煎煉分別銅鉛金銀分記塊數斤兩注冊登填申票至所有礦山惟於連界處許一商兼承其隔遠不相連者每山只許一商承充使在山工丁便於管束備資本無幾者仍聽合夥同充至承充之人先令其將本銀呈該管道覆實或二千或三千不約定數以足數支用爲度移貯該州縣庫發領承充之時由布政使給與印照赴山開採如礦少砂微之處不能容商者聽附近民人報探照例收課通典

十年增貴州各廠官買餘鉛價向例餘鉛百斤給鑪民一兩三錢今增二錢又定廣西平樂府恭城縣鉛礦內所出密陀

僧課例每百斤收正課二十斤撒散三斤十一年增廣西收買餘銅價向例每餘銅百斤給價八兩三錢今增十三兩俟充裕之日將餘銅

收買一半餘給商自行銷售十二年開採貴州威甯州大化里新寨等處銀鉛礮砂每煎銀一兩收

課四錢十五年定徵收浙江鑪坑課例坑課三則上則徵銀一兩六錢中一兩二錢下八錢鑪餉二

則上則六錢下則三錢又每坑歲納銀四錢以爲疏濬鐵諸溪河淤塞之費通志

十六年定湖南郴桂二州礦廠事宜湖南巡撫楊錫紱奏稱湖南省開採礦廠奏銷案內所有礦夫

採獲銅沙以及黑白鉛砂俱應納稅惟黑鉛礦內銀鉛並產康熙雍正年間銀氣旺盛是以從前京

商開挖時報抽銀稅後經封閉迨至乾隆七年原任巡撫許容奏請復開以黑鉛砂內出銀無幾不

過滴汁成珠止堪賞給爐戶請將銀稅改爲砂稅現今銀氣復旺自應隨時更正以復銀稅之名然
不另立科條誠恐砂稅銀稅無以區別嗣後除銅砂白鉛砂及無銀氣之黑鉛砂所抽稅銀仍名砂
稅照舊辦理外其有銀之黑砂定爲銀稅另立科條照例抽收列入奏銷冊內以備稽考又查柘桂
二廠礦夫採獲銅鉛礮砂賣與商人煎煉每年砂稅共銀七八千兩商人廠卡各處丁役辛工飯食
等項歲需三四千兩以砂稅之半取給已屬充裕請是乾隆十六年起抽收砂稅每十分內先歸官
稅五分餘五分爲商人廠卡公費既於商本無虧又於課務有益從之 二十九年准四川屏山縣
開採鐵礦四川總督阿爾泰奏屏山縣之李村石堰鳳村及利店茨藜榮丁等處產鐵每礮砂十勛
可煎得生鐵三勛每歲計得生鐵三萬八千八百八十勛請照例開採十分抽二變價撥充兵餉戶
部議如所請從之又准雲南通海縣開採黑鉛廠雲南巡撫劉藻奏通海縣逢里山廠產黑鉛試採
有效請照例每百勛抽正課十勛變價充餉餘課十勛以五勛充公五勛爲官役廉食所餘之鉛給
價收買戶部議如所請從之又准雲南彌勒州開採白鉛廠雲南巡撫劉藻奏彌勒州野豬畊廠產
白鉛試採有效請照例每百勛抽正課十勛餘課十勛所餘之鉛給價收買撥運廣西局鼓鑄於錢
法實有裨益戶部議如所請從之三十年准四川江油縣開採鐵礦四川總督阿爾泰奏江油縣木
通溪和合碕等處產鐵每礮砂一十五勛可煎得生鐵四勛八兩每歲得生鐵二萬九千一百六十
勛請照例開採十分抽二變價撥充兵餉戶部議如所請從之

通以上
抗治

順治元年定牲畜每兩三分收稅例四年定凡買田地房屋增用契尾每兩輸銀三分通典

九年革除江陰清浦二縣坐派養牛雜稅戶部奏言江陰清浦二縣有坐派養牛之稅實屬病民請

嚴飭督撫按臣行府州縣官將牛牙雜稅等項止許於買賣市集照例抽收若有橫派鄉民者指名

參處通考

康熙三年定當舖每年徵銀五兩大興宛平大行店舖同十五年定京城行舖稅例上等每年五兩

中二兩五錢 十六年增定江南浙江湖廣各府契稅每歲蘇松常鎮四府大縣六百兩小縣二役

兩不等揚州府照賦百全書額徵淮安府屬州縣無定額徵收儘解杭嘉湖甯紹金嚴七府大

縣三百兩中縣二百兩小縣百兩湖北大縣百五十兩中縣百兩小縣五十兩僻小州縣十兩十七

年增定山東等省契稅大縣一百八十兩至二百四十兩中縣二十年增定浙江台衢溫處四府契

稅大縣百兩中縣六十兩小縣三十兩三十一年增定江西等縣契稅照浙江台衢等縣例通志

三十八年准內地商人往殺虎口外伐木入口販賣驗放輸稅工部議覆山西巡撫倭倫疏言殷實

商人願往殺虎口外大青山等處採木者請令其赴部具呈給票守口官兵驗明放行輸稅入口販

賣查殺虎口外從無伐木之例應將該撫所請毋庸議得 旨內外之民俱屬一體大青山木伐賣

商民均為有益著照該撫所請行 四十八年除革私設牙行吏部議覆江南道監察御史張連條

奏貿易貨物設立牙行例給官帖使平準物價乃地方棍徒於瓜果菜蔬等物亦私立牙行名色勒

指商民請勅部查稅課定例除應立牙行者照舊設立外其餘一切私設盡數除革應如該御史所

請從之通考

雍正六年設典當行帖十一年諭各省商牙雜稅固有闕國課亦所以便民是以各省額設牙帖皆由藩司頒發不許州縣濫給所以杜增添之弊近聞各省歲有加增卽如各集場中有雜貨小販無藉牙行者今概給牙帖抽分利息是多一牙戶卽商民多一苦累況牙帖納稅每歲無多徒滋繁擾甚非平價通商之本意著各省藩司因地制宜酌爲定額報部存案不許有司任意加增嗣後止將額內各牙退帖頂補換給新帖再有新開集場應設牙行者酌定名數給發亦報部存案如此則貿易小民可永免牙戶苛索之弊

通典

十三年諭聞各省地方於關稅雜稅外更有落地稅之名凡擾鋤箕帚薪炭魚蝦蔬果之屬其值無幾必察明上稅方許交易且販自東市旣已納課貸於西市又復重徵至於鄉村僻遠之地或差胥役徵收或令牙行總繳交官甚微不過飽奸胥之私橐而細民重受其擾矣著各省凡鄉村鎮落落地稅全行禁革

乾隆元年令甘肅商畜二稅刊示條款畫一徵收申定原額牙行歇業卽行開除例凡不願承充者不必俟頂補有人方行退帖除浙江角里等處各口界址商稅又豁除廣東歸善海豐惠來潮陽四縣加增魚課銀六千兩有奇二年裁雲南鎮雄州鹽稅

鎮雄係食川鹽業已徵稅故裁

革山東魚筏稅四年申新開

集場濫給牙帖之禁

以上通志

五年議定清釐牙行之例向例每行認充經紀取具同行互保一人出具殷實良民甘結該管官加結送司給帖充應互結雖有殷實字樣而互保之責成未經議及今定鋪家拖累商人者將本牙行帖追繳勒限清還仍行給與若係牙行誑騙商人將互保行帖一併追繳勒限清還本牙更換互保行帖仍行給與倘逾限不完將互保之人一并更換牙行惟圖用錢任鋪戶抗騙客商者除逾限不完將牙行革退外仍將鋪戶責限追比其不足之項令牙行賠補牙行侵吞客賬者除逾限不完將本行互保一體斥革外仍將本牙責限追比其不足之項令互保攤賠其追比之限期案欠數之多寡酌定至於以後客之貨挪補前客之欠移弱客之貨代償強客之欠該互保先行舉首免其治罪容隱者責令分賠牙行夥計八等侵吞客賬總照牙行侵吞之例追帖賠補 九年定稽察參山積弊事宜舊例商人領票辦參每票一張一人兩馱前往刨採而領票之人早已雇夫出口每票一張或三四人五六人不等經奉天將軍奏稱與其聽伊私雇人夫任意刨採不若嚴定人數給發腰牌請嗣後每領官票一張准其三人出口一人守馱炊爨兩人入山刨採給發腰牌三面以別真偽至包攬飛參之棍徒應與產礦山場礦徒潛行偷挖約練接濟夥同分利者同科請嗣後掣獲包送飛參之人亦照此律究治惟是邊門所轄鞭長莫及難以防範如威遠堡邊門路通甯古塔黑龍江兩省商賈車輛來往不絕又如英額江清二門雖無車輛出入多有馬馱私運至巖廠鑿河兩門並應添巡緝卽在各屬員內調補三年更換戶部議覆俱應如所奏從之 十二年定民間置買田房令

布政使司頒契尾格式於州縣編列號數前半幅備書業戶姓名買賣業產數目價銀稅銀若干後半幅於空白處預鈐司印以備投時將契價稅銀數目填寫鈐印之處合業戶當面截開前幅給與業戶後幅同季冊彙送布政司查核以杜衙門停攔胥吏改換之弊十四年定應城縣徵收石膏稅額署湖廣總督新柱奏言查得應城縣石膏徵稅一項徵之於產膏地方之商民者則曰尚稅徵之於評膏價之經紀者則曰行稅徵之河下裝運石膏之船戶者則曰河稅歷來照數徵收報解今委員監收一年期滿監收膏稅正餘并尚行河稅銀共四千一十八兩九錢八分零內除膏稅正額及耗羨并尚行河稅以及經巡紙筆飯食暨贏餘項下解費銀兩外實贏餘銀二千二百六十兩九錢七分八釐零其餘收膏稅已奉發有循環簿登填其秤係照部法較準逐行查秤設立木櫃令商人親填完納部議應如所請得旨允行又更定稅契之法先是民間買賣田房應買主輸稅交官官用印信鈐蓋契紙以杜奸民捏造文契之弊經田文鏡創爲契紙契根之法於雍正十三年特奉諭旨停止又於乾隆元年經廣東巡撫楊永斌奏請仍復契尾舊例覆准通行至是戶部議駁河南布政使富明疏奏請於業戶納稅時將契尾粘連用印存貯每遇十號申送知府直隸州查對不知契尾經一衙門卽多一衙門之停攔由一吏胥卽多一吏胥之苛求甚且指勒駁查以致業戶經年累月求一執照甯家而不可得應將所奏毋庸議臣等酌議請嗣後布政使頒發給民契尾格式編列號數前半幅照常細書業戶等姓名買賣田房數目價銀稅銀若干後半幅於空白處預鈐

司印以備投稅時將契價稅銀數目大字填寫鈐印之處令業戶看明當面騎字截開前幅給業戶收執後幅同季冊彙送布政使查核此係一行筆跡平分爲二大小數目委難改換庶契尾無停攔之虞而契價無參差之弊疏上如議行 十七年停止大宛二縣鋪面行稅三年編審之例改爲按年徵收戶部議覆直隸總督方觀承等奏稱大興宛平二縣鋪面行稅舊例分別上中二戶按則徵收三年編審一次原以杜隱漏之弊惟是編定之後如遇該年鋪面減少則將下戶陞作中戶中戶陞作上戶加徵稅銀以符前數商民不無苦累如遇該年鋪面增多稅亦因之而多而報解仍止此數徒供官吏之侵蝕欲行稅之徵收皆歸實在誠莫若於鋪面之開閉隨時考核應請於每年二月令該二縣將各行鋪親身查點一次分別資本充裕者列爲上戶照例歲徵銀五兩稍次者列爲中戶照例歲徵銀二兩五錢並於由單內填註明白地方官祇須按鋪給單按單收稅無俟假手吏胥紛紛查報應如所請從之 二十六年議准徵收殺虎口油酒煙餉稅課并令守口員弁無得禁止出口農器戶部議覆前任殺虎口監督期成額奏言口外煙油酒三項向係由內地興販出口赴彼貿易是以該處並未定有起課之例今蒙古地方頗種煙葉雜糧口內民人赴彼造作油酒煙餉在歸化城一帶村莊售賣應行令現任殺虎口監督將此三項與皮張雜貨均附於落地木稅按則抽納至奏稱鐵器到口收課守口員弁人等以久干例禁不准出口查戶部頒行關稅全書內鍋杓鋤犁等項俱經列有科則並未禁其出口嗣後行令監督詳細查明除廢鐵料仍照舊禁止外如祇

係農器及民間日用器物卽行按則徵稅將名色件數註於票內毋庸禁止從之 二十七年定鳥
嚙木齊鋪面園圃分等收稅例駐劄烏嚙木齊大臣旌額理奏該處商賈開設鋪面房五百餘間墾
種園圃三百餘畝視其生理大小作爲三等其園圃按年薄徵從之 謹按鋪面開設卽日中爲市
之義以兼奏園圃生理故入雜徵

三十一年令民間稅契無司頒契尾者首明卽行補給其稅銀於原經手之州縣名下追完奉 諭
旨前據湖北按察使雷暢條奏民間田房稅契不粘連司印契尾者立限一年令業戶首明補稅以
侵隱而稽假冒經戶部覆准並令各督撫分別定限報部查核夫隱匿漏稅若在民間自應查明令
其補交若州縣官辦理稅契於契紙內鈐蓋印信並不粘用司印契尾是係不省有司意圖侵肥入
已所致其實小民應投稅銀業已照數輸納今乃令業戶首明補稅而不於原稅之州縣名下追還
是百姓重稅之累而侵隱之官吏轉安享其利於情理殊未得平著各該督撫詳悉出示曉諭凡民
間有已經報稅並無司頒契尾者令其據實首明卽行補給契尾其契銀毋庸重複補納以恤民力
並查係何員任內經手除事在五年以前及該員已經身故者查明免其勒追外其現任及陞調各
員著照原稅名數於各名下定限追完此次立法已後如再有止鈐契紙不連用契尾者各督撫卽
行查參治罪如此則閭閻既免重科州縣其知儆惕將來小契之弊亦可不禁自止著將此通諭知

之以上通考
以上雜徵

謹案通考征榷門有榷酤一篇通典通志不載此目伏查我朝定制但有躉麴燒鍋之禁初無釀務榷稅之官以視前代弊弊於酒課或占租取贏或納錢充緡甚且蠶樵雇薪抑配自納算畝起派反浮正額者邇不侔矣其初天津六縣及通州酒稅因循未革迨疆吏奏聞立行豁免卽通考所載杭州北新關舊例計罈稅銀殺虎口油酒煙餉按則抽納亦祇征之於關初非徵之於市其與逐鋪科銀者不有間乎是編所輯凡有關政典當務爲急者具加摘錄若廢而不舉之條一例從省雖今日酒稅業已舉行而當時榷酤之官未嘗一置敬遵初制酌省是篇自餘各門並皆倣此